

Литература Дагъистан

16+

Гьалмагъдеш

ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

Дагъиста асилси урши



6/2022

ноябрь - декабрь

Гіямарла Батирайліс - 205 дус





Гьалмагъдеш



ЛИТЕРАТУРНО-ХУДОЖЕСТВЕННЫЙ
И ОБЩЕСТВЕННО-ПОЛИТИЧЕСКИЙ ЖУРНАЛ

Учредитель: Агентство информации и печати Республики Дагестан

РУКОВОДИТЕЛЬ - БЕКИ РЕДАКТОР
Мурад МяхИяммадович ГИЯХИМАДОВ

РЕДАКЦИЯЛА КОЛЛЕГИЯ

Кь. ГИялисултIанов (*журналла редактор*)

Т. СягИдов

Кь. Мигърабов

ЖАМИГИЯТЛА СОВЕТ

А. ГИябдулмананова

И. Ибрагъимов

Х. ХИябидова

Х. Юсупов

И. МяхИяммадов

М. Къаратов

М. МутIалимов

М. БяхИяммадов

6

2022

ноябрь - декабрь

Кел бази гьачам
дурабулхъан

Журнал основан в 1952 году
Выходит один раз в два месяца

1952 ибил дуслизиб
акIахъубси саби

Государственное бюджетное учреждение
Республики Дагестан “Редакция республиканских литературных
журналов “Соколенок” и “Литературный Дагестан”.

ЖУРНАЛЛИЗИР ЛЕР:

Илини Дагъистайзиб даршудеш калахъун.....	3
Къади ГЯЛИСУЛТАНОВ. Бугаси девла уста.....	5
Аминат ГЯБДУЛМАНАПОВА. Гямарла Батирайла Гямруличила.....	7
Зубалжат ГЯМАРОВА. Гямарла Батирай.....	13
Гиса ГЯМАРОВ. Багирайличила чумал гъай.....	16
Хясайни ГЯППАЕВ. Чевяхъси далайчи.....	19
Рустам МУРТАЗАГЯЛИЕВ. Гякълукарри Батирай.....	20
Сарат ГЯЛИЕВА. Батирайла рурси Патима.....	21
Мяхъяммад ГЯБДУЛЛАЕВ. Дибъуклан шуйхри.....	29

ПОЭЗИЯ

Сайгибат ГЯБДУЛКЕРИМОВА. Хъумхертуру хIу, Гяйшат.....	33
Тавсултан СЯПИДОВ. Дунъяра дила нешра.....	36
Ильяс ИДЗИЕВ. Туманар дубура.....	40

ОЧЕРК

Мяхъяммад ТАХСУРМАНОВ. Багъудлумала урунж.....	43
Гяйша КЪУРБАНОВА. Бургъаб Аминат, хIела пагъму.....	51

ПОЭЗИЯ

Байгинат КЪУРБАНОВА. Сагали делкIунти.....	53
Мяхъяммад КЪАРАТОВ. БахъбикIаб, Серго, хIезиб.....	60
Гябдуселим ИСМЯГИЛОВ. Хабурти.....	65

ПОЭЗИЯ

Имин МЯХЪЯММАДОВ. Агъ, ишди партияби!.....	73
Зубалжат ГЯМАРОВА. АхIерти нешла някъби.....	76
Фазу Гялиева. Назмурти.....	79
Мяхъяммад ТАХСУРМАНОВ. Нешли хIеркъибси узи.....	80

НУШАЛА АСЛУ-МИНА

Къади ГЯЛИСУЛТАНОВ. Цуглантала гIядатуни.....	82
---	----

ПОЭЗИЯ

Хизри ЮСУПОВ. Сагати назмурти.....	85
Хясайни ГЯППАЕВ. Сагал дусла мубарак.....	93

ФОЛЬКЛОР

Зубалжат ГЯМАРОВА. Буралаби.....	95
----------------------------------	----

Регистрационный номер: серия ПИ №ТУ05-00416
выдан Управлением Роскомнадзора по Республике Дагестан от 22.04. 2019 г.

Типография: ООО «Издательство «Феникс - пресс»
Адрес типографии: 367018, РД, г. Махачкала, пр. Петра I, 61

ГЪАЛМАГЪДЕШ № 6 2022 г.

На даргинском языке

Подписано в печать 1.12. 2022 г.
Цена свободная. Печать офсетная.
Бумага офсетная. Формат 70x108 1/16.
Усл. печ. л. 8,75. Усл. изд. л. 4,23. Физ.печ.л. 6,25
Тираж 439 экз. Заказ №1320

*Редакция и издатель: Государственное бюджетное учреждение Республики Дагестан "Редакция республиканских литературных журналов "Соколенок" и "Литературный Дагестан".
Адрес редакции и издателя: 367000, РД, г. Махачкала, ул. Даниялова, д. 55.*

Электронный адрес редакции:
litdag@mail.ru

ИЛИНИ ДАГЪИСТАЙЗИБ ДАРШУДЕШ КАЛАХЪУН

Дагъистан мурталра давлачебсири асилти уршбачил, чунира Дагъиста гІямрулизи халаси пай каби хъибси. Илдала лугІилизив сайри гІямрула 93 ибил дуслизив бара гъалавван нушачивад шалгІевухъунси, Дагъистайзивцун ахІенну, арагІеб Россиялизивра хІурматла адам, Дагъиста республикалис байхъала даршдус бекІдеш дарибси, Дагъиста республикала Пачалихъла хІурматла председатель, РФ-ла Бузерила Игит, хІурматла МяхІяммадов МяхІяммадгІяли МяхІяммадович.

Илала хІулбала гъалар чум-чумилра политикла гІямру ва къллукъуни дарсдиуб, политикла гІямрулизир жура-журала аңцІбукъуни кадикиб, амма ВагІайс марси, пасихІкар политик нушани чихъли чейулра улкала тарихлизив илкъяйдали адатала уркІбазив ил муртлисалра кавлан.



ПАСИХІСИ ВА УРЕХИАГАРСИ

«Дила гъанбиклумазив ил муртлисалра гІямрула халаси ва бегІлара гъамси юлдашван кавлан. Сунезирра бегІлара гІяхІти къиликъуни лерси: гъабзадеш, урехиагардеш, бузериличи диги ва пасихІкардеш. ХІязлис ахІенри дагъистанлантани илала халаси хІурматбириси. Илала гъала хили секІал балнили ва ВагІайчи марти дигили, бегІлара жапати замунтазиб Дагъиста цадеш ва даршудеш калахъун».

*Дагъистан Республикала БекІ
Сергей МЕЛИКОВ*

ГІЯДАТЛА ДУБУРЛАН

Россияла ва Дагъиста тарихлизив МяхІяммадгІяли МяхІяммадовичла къадрила багъа бурес хІейэсли халаси саби. Дагъиста марси урши, пачалихъла ва жамигІятла хІяракатчи МяхІяммадов МяхІяммадгІяли гІямрулизивад шалгІевухъун. Илини 2006 ибил дусличи бикайчи Дагъистан Республикалис бекІдеш дирули калун.

*Владимир ПУТИН
Россияла Президент*

ХАЛКЪЛИ ХЪУМХІЕРТУ

«Халаси бетяхъри саби Дагъистайс, Россиялис, илкъяйда лебилра МяхІяммадгІяли МяхІяммадович валутас. ГІямрулизивад арякьи сай ВагІанна бегІлара гІяхІтазивадли гІяхІси, республика гъалабяхІ арбукес багъандан дахъал цІакъани харждарибси патриот.

Сунела республика вавалибяхъяхъес ва эркиндешличи арбукес илини сунела дахъал шалубар пагъму ва лерилра гІямру харждариб.

Сунела гІямрула бегІлара гІергъиси гъигъличи викайчи ВагІайс марли калун.

*РФ-ла Федерацияла Советла Председатель
Валентина МАТВИЕНКО*

ХЪУМХІЕРТЕХІЕ

1980-90 ибти къянти, халкъани - ургарти тяхІяр-къяйдара, политикала ва экономикала даражара къянси агилизибси дусмазиб МяхІяммадГІяли МяхІяммадовли мекелли халати устадешличил улкализирти къяндешуни дяхІяуртири.

Халкъли илала бируси халаси хІурматлара, тІабигІятли илис гибти пасихІ-дешлира Дагъиста халкъани ургарти узидеш ва цабалгундеш гъатІира цакаьдарибтири. Илди узидеш кумеклидиуб Хаттабла ва Басаевла вайнукъяби дугІаэс. Ярагълабиубти вайнукъябани 1998 ибил дуслизиб правительствола юрт буцибХели, МяхІяммадГІяли МяхІяммадовичли гъарли-марти урехиагардеш ва пасихІкардеш дакІударибтири ва Дагъиста цадеш калахъунсири. Лебтасалра ашкарси саби сегъуна къян кабихъес гІягІнисил дахъал миллатунар республикала духІнар цабалгундеш ва узидеш хІердарес багъандан. Илбагъандан сабри ил улкала черяхІти наградабачил шабагъатлаварисси. Бурес гІягІнибиркур, халкъли ил духуси политикцунванра ахІи, хІекъли урехиагарси патриотванра хъумхІерту.

*Политолог
Эдуард УРАЗАЕВ*

ГІЯДАТЛА ДУБУРЛАНТАЛА УРШИ

МяхІяммадГІяли МяхІяммадовичла дурхІядеш ЧебяхІси ВагІанна дургъбас гІергъити дусмазир ардякъун. 1949 ибил дуслизиб Лавашала урга - даражала школа таманбарили гІергъи МяхІяммадовли бегІлара хІурматла учительла санигІят чеббикІиб. Гъала-гъала учительли гІур директорли зули калун. КІинайс Лавашала районна халкъла багъудила управлениела заведующийли. Сецад ахъти къуллукъуначи ваиб виалра МяхІяммадовли адамдеш ахъли хІердариб. Ил гъар секІайчи халахІерхурли гІядатла хІялалси адамла хІулбачил хІерикІи. Нуни дила гІямрулизив илцадра тІалабкардешличил дарх жавабкардешра, чІумадешра, малхІямдешра дархдалгунси адам гІур валхІелас. Илала маслигІятла ва гъайла устадешла ахир хІебири.

МяхІяммадГІяли МяхІяммадович школала учительличивад вехІихъили, лерилра ганзухъуни ахъили хъалли, хамхІейубли, халкъличил бархбас бетхІехъахъиб. Республикала бекІли узухІелира иличи ацІес сегъуналра гъалабиз хІебири.

Дагъиста халкъла поэт Расул ХІямзатов викІусири: Дагъистайзиб МяхІяммадовхъали бахъал саби, амма МяхІяммадГІяли ца сай, « сайгъуна гІур цархІил агарси. Илин сунечи дугъаизурсиличи лехІахъес илис виубсигъуна кумекбарес замана бурги. МяхІяммадГІяли МяхІяммадовичла шаласи сипат мурталра нушала уркІбазиб кавлан.»

*Литературала Дагъистан журналла бекІ редактор
Мурад ГІЯХІМАДОВ*

Батирай акГубхГейчирад 205 дус дикнилис

Къади
ГІЯЛІСУЛГІАНОВ



БУГАСИ ДЕВЛА УСТА

Халаси пагъмула вегІ адам сайри Батирай, даргала поэзияла хазналис хьулчи кабахъибси. Девла пасихІдешличил барх Аллагъли илис жагаси ГІамара чугур бирхъес устадешра дедилри.

Батирайли белкІ-белчІ далути ахІенри. Амма итхІели лебри уршби ва рурсби къуръан делчІес башутира. Рахли Батирайлира илди делчІунси виалри, мажахІят дакъиши нушани илала пергер далуйти. Батирайлис девра макъамра ГІеббуран сабри сунела пергер чуллан чугур. БегІлара уркІи къакъабакІибси манзил илинири Батирайлис макъам ГІеббуриси. Мискиндешлира, ГІямрула


дархъагардешлуманира, сунела ГІямрула рархкъя Аминатличи дихъибти дигайлира ил валтули ахІенри. Илдала асарлиув ил жявли далуйти цаладирхъес бурсивиуб.

Батирайла замана динна агълула цІакъ халаси сабри. Илбагъандан давлачебти балГули хьалли, ил динчибачи челхъули ахІенри ил. Амма севан биалра, бархъдеш багъандан ил дахъал къияндешуначи вяхІигули сай.

Батирайла далуйтазибад тамай аргъес вирули ахІен, – далайибхІели разибиубли сунес шантани унц лугъули буибсил, яра ГІякІалис сунела унц лугъули буибсил. Эгер сунела унци лугъули дуибти диалли – Батирай мискин адам ули ахІен. Гъар далайибхІели, унц лугъули буили саби виКІалли бархъли бирар. Батирайла

далуйтазибад аргъесли саби, илди унци шантани лугъули диъни, сенахІенну ил бархъдешГІевли сайри далайикІуси.

Батирайла дунъя цаличи ца къаршити кІел бутІаличи бутІили саби. Иличибли аргъесли саби поэтла ГІямрура кІел бутІаличи дугІили диъни. Хъубзарла къиянти ГІямрулизир, сай чевяхІси далайчиван къабулварнилира илис имкан-бакІиб къиянси манзилличила бурес.



**«Гъишди шишимъулазив
Гъиш ХІурхъила шилизив
ХІябра къакъали ливра
Жагъдешла гІямрулизив!»**

Поэт низам-зегъа ва бархъдеш агниличи къаршидеш далахъес бурсивиуб. Дигайла далуйтазир цаличир итил цІакъти мешубуцуни лер. Поэт илцадра сагадеш баргес умцІули сай, хІятта телеграфла тІал риганайличил цугбурцули сай. Поэтли лебилра дунъя бузахъути дигай черяхІдирули сай.

**ВецІну шурайширил бац,
Дурарухъин хъа гъала,
ХІулби агвор сукъурти
Шалабякъис нуллион.**

Поэтли риганайлизибад халаси секІал тиладибирули ахІен. Улкъайлабад бекІ гъаббакІахъили хІерризни баили саби. Илала дурабадра, сунела риганайла жагадешли цархІилтира рази-шалабаихъубли дигули сай.

Батирайличила дахъал делкІес вирар. Сунела гъайлис марли калунси дубурлан сай. Гъайгъайра, камли ахІенри Дагъистайзиб чугур бяхъили далай белчІес балути, амма Батирайливан далайлизир уркІила хІялани аргъахъес гъарилли хІейри.

Иш анцІбукълизиб наб «Адам убкІар, у кавлан» ибси бурала гъанбиркули саби. Илкъяйда, Батирай агарли хъалли, илала у адамтала уркІбазиб муртлисалра кавлан.





Дагъиста халкъла поэт
Аминат ГІЯБДУЛМАНАПОВА



ГІЯМАРЛА БАТИРАЙЛА ГІЯМРУЛИЧИЛА

(Михъирлизиб џІа саби, хІулбазиб бурям саби)

ГІямарла Батирайличила гІяхІцад произведениеби гъанналаурал делкІи сари машгърти гІялимтани, поэтунани. Сецад делкІалра, илди дуркъдирути ахІен. Батирай «Даргала поэзияла дудешлизи» халирусири, ил классиклизи уйгІуси сай, гІякълукартазивад – вегІлара цаэсил гІякълукар ва пасихІкар.

Батирай акІубси сай 1825 бил дуслизив Сергокъалала района ХІурхъила шилизив. ХІурхъила ши жагати мер-мусаличиб, тІабигІят берхъибси, дубуртира диркъбикунира мерладиубси мерличив. Гъаб-убла адамтани бурни хІясибли, ил 8 дус виубси дурхІя далуйтаци карџси, далайикІес къайгъна виџиби уили сай. Илала дудеш хъубзар сайри. Батирайла неш Шамай, лергІер духуси хъунул адам, назмурти цаладирхъян, далуйти дигахъуси руили сари. Илини гІяхІцад асар барили сари сунела урши далуйтаци дигили виџахъес. Шамайра далайчи руили сари, халкъла далуйти дурчан ва илди цархІилтацира диахъан.

Дудешли урши, къуръан делџахъес къайгънази викили, Хайдакълизи ва УргІари вархъили сай, амма илини сунела назмурти, далуйти жагъилтас дучІули кали сай, ил багъандан илавад ил маллубани тІутІуварили сай. ХІурхъибра иличи, динна гІилму делџунсиличи лехІли кали саби. Дин бузахъантира, шила хІякимтира, давлачебтира Батирайли хІяя умутили, бархъдеш бузахъантили чебаили ахІен, ил багъанданра илдачи къаршили дураухъи, илди мучлаагарбирути хІябкубти дучІули кали сай, ва дудешла тилади бартаахъурли ахІен, ил багъанданра Батирай гІевурцути, илала далуйтаци лехІирхъути адамти мискинти ва гІядатла адамти кали саби. Илдани илала далуйти руркъули, уркІиличир, цаличи-џа диахъули, цабехІтани дучІра дучІули кали саби. Шила халахартани иличи ва илала далуйтаци гъими кабуцили, далайикІахъес къадагъабарили, гІякІа чебирхъули, хъа ваяхІ, дярхъларти унци, хІяйванти керисули кали сари. Амма Батирай кІантІиварес чилалра ахъри бакІили ахІен, ил гІурра даимиубли сай учІес ва хІякимти мучлаагарбирес. Бахългъунти мискин халкъли гІевурцули сай. Батирайла далай палакатси, бархъдеш агарси дунъялис чІумаси, уркІилизи атІеси хІярхІя бетарули саби.

Дигайла далуйти даимдарили сай Батирайли. Мискин адамтала децІ, ахъ дубургала ва тІабигІятла, хІуркІбала далуйта духІнакадуцибси Батирайла далуйтани гІядатла адамтас, мискин халкълис цІакъани лугули кали сари, гІямруличи гІира дебабикІахъули, ил далай даимлис дарданас дарманван халкъли бузахъули кали саби. ИшбархІи бикайчира Батирайла далай зайбикІули саби халкъла далуйтачил барх. Юлдашунала авидлизиб, мекъ-сяхІбатличиб, нешла далуйтазиб сирила мякълаб бучІуси. Далуйтачи адамтала гІяр заманализиб гІягІнидеш биубси саби ва бирар. Далай адам акІубхІейчивад бузуси саби, илала ахир я бехІбихъуд лебси ахІен. Далуйти кІел журала лерти сари эпический ва лирикала. Батирайла далуйтазир илди кІелра журала далуйти кІяршидиркур. Илала далуйтазир имцІалин кІяршидиркули сари дигайла далуйти. ГІайгІайра дигайла далуйтани ил учІес даимиубсири давлачебтала рурси Аминатличи дигай дихъибхІейчивад. Аминатла бегІтас Батирайличила аргъесра дигули ахІенри ва илис ил редес кІяршилири. Амма Батирайли ил гІярритІун ва унраличибси ГІяяла Махъилизи аррукиб. Илав ил лерилра гІямру деркІайчи калун. ИлхІели сунела шанти-халахарти иличи гІуррара гІимбукІиб. Рурсила бегІтаци кІяршидеш дакІударили, рурси гІярритІни цІахси баркъудилизи халбариб. Амма Батирайла дигай цІакътири сунела Аминатличи, дигайла далуйти гІуррара имцІадиуб, учІиб ил жагаси ва кагІебси тІамаличил. Батирайла далуйтачила адамти гапбикІухІели ца далуйтачи гІяшикъси, къумукълан адамли бурили сай. «Илцадра хІушани чевяхІируси далайчили цархІилтала мезлира далуйти дагъес гІягІнисигу». ИлхІели Батирайли касили чугур къумукъла мезли далуйти зайдухъахъи сай. ИлхІели ил къумукълан гІяхІялра лебилра лехІихъутира тамашабиубли лехІкахъи саби. Дигайла далуйтазир илини хъунул адам черяхІрарили, илала къиянси къисматличила бархъдеш бурули учІули сай. Илди замунтазир хъунул адамла ихтиюрти дуи кали сари, амма Батирайли ил сунела далуйтазир ахъанайтачи араахъили сари. Ил жагасилицун ахІи, рухІлизир, хІяялизир умусили, гІямру даимдирусил, дурхІни гІякълучебтили, духутили абилкъуси риъни кабилзахъули сай. ГІаланазир, Октябрьла Социалист революция кабизайчи я Батирайла, я цархІилти далайчибала далуйти-назмурти печатьлизир гІачамалра дурадухъунти ахІен. Илдала далуйтала хазна, адамтани цализи ца дурули, уркІиличир дучІули, адамтала далуйтачи хІясраттала дигили нушачи илди даахъибти сари. Батирайла ва халкъла гІяр-урла далуйтачи дигили саби гІяхІцад поэтунира лукІахъес гІуцІбарибти, далайла давлала рухІ белкъахъунти поэтуни бетаахъурти.

Даргала халкъла далуйтира нушачи даахъиб Батирайли, суненира мягІнализир мурхъги, гІарил учІанни ва лукІанни арзес хІейэсти мисалтиван образунани, эпитуна дицІибти назмурти акІахъуб. Революциялис гІалабси белкІла литература халкъла мухІлила творчестволичил, далайчиби – поэтунала творчестволичил бархбасунсири. БелкІла литературала вакилтанира, чула произведениебала геройтили мискин дубурлан сайри чеввиркІуси. ИтхІелла поэтуни-далайчиби чула гІядатла халкъличил уржили бархбасунтили кавлутири.

Халкъла далуйти дучІниличивад вехІихъибси Батирай сай аринти произведениеби цаладирхъусири ва саавторла даражаличи айкибси. Хаслира

даргала поэзиялизир реалистический образуни ак!ахъубси цаибил поэт сай. Илини саби даргала поэзиялизиб философская ва дигайла лирикала хълчи кабихъибси, илала поэзияличибад бех!бихъибси саби даргала сатирара. Даргала г!я!цад шимази ваибси, далуйтала г!алмагъуначил уржибси, шимала г!ямру гъарра шайчирад сипатдарибси, чузир гъарли- марти образуни ак!ахъубси , иш!елла поэтуни булан Батирайла творчествола сархибдешуначи, пагъмула лишаннизиб гъалабях! башути ва иличи хъарихъути.

Г!ямру сипатдирнила устадеш, образунала кагибдеш, изобразительный г!яг!ниахълуми чердик!нила устадеш ва даргала мезла давла пайдалабарнила даража х!ясибли даргала поэтуназирад Батирайличи айкибси ва иличил цугуцеси х!ейрар. Чевях!си далайчи Г!ямарла Батирайли сунела г!ямрулизи поэт сайлинра сунела устадешлис хълчи кабихъибти ва пагъму берхъахъибти фольклорла пергер произведениебачи халкыла дуц!арти диги ак!ахъуб. Батирайла далуйтазиб сабри бег! гъалаб реализм минабиубси ва берхъибси. Мискин хъубзарла ва шила давлачебтала образуни гъаргдарили, давлачебтала урк!бала чурхдеш ва х!ял-т!абиг!ятла къяркъдеш лертиван чедиахъутири, мискин адамла х!ялалдешличил, сахаватдешличил цугдуцили илдала къяршидешличила бурули уч!усиличи асар бирусири. Давлачебти ва динчиби дак!у-гъаргли балт!утири.

Г!ямруличи, адамличи, хъунул адамла образ гъаргбирниличи дигили парчбик!уси Батирайла поэзия даргала литературалис хълчили бетаур. Поэтла творчестволи челябкьутала поэзиялис ч!умаси бетуц белгибариб. Поэтла творчество мурталра халкыличил х!ебелхъуси рух!ла давла саби. Илала поэзия пулук!х!ебируси т!абиг!ятван мурталра кавлан. Даргантала ва дубурланта ла рух!лизиб дебъакабиубли кавлан. Батирайла далуйтачи г!яшикьти бахъл саби царх!илти миллатла буч!антира лук!антира. Чум-чумлира чуйнара урус мезличи ва царх!илти миллатунала мезличи илала поэзия шурбатес къайгъни дариб.

Гъарилла ил шурбатни гъарх!ебизур. Сенк!ун, даргала литературала мезличи шурбатес г!яг!нилири ил. Х!урхъан мез илцадра ункъли дагъес г!яг!нилири хълчиличирад илди дяркъес. даргала машгъурси поэт, Сарат Г!ялиевани чумал поэзияла жуз дуракаиб. Батирайла г!ямруличила ва илала поэзияличила жузра дуракаиб. Ил сари Батирайла гъамси, тухумлизирадси, илис гъамадлири иличила белк!ес. Дилара Саратличил уржибти гъалмагъдеш лертири. Нуша къяршидиркух!ели хаслира Батирайла творчестволичила дахъл гъай детарутири. Батирайла рурси Гулжанатра далуйти цаладирхъян руилри. Илдала х!урхъан мезли сунечи даахъибти произведение илини наб литературный мезличи шурдалти. Мяг!на мурхъти, х!екъли адам тамашавиэсти образуни гъаргдирули ририни набзи. Чуйна делч!аслира нуни Батирайла назмурти, илди сагативан дилзан. Г!уррара илдачи чарулхъули рирус, г!ямрула кеп чузисин, талих!ла бут!а лебсин гъанарар. Батирайла назмуртани гъаман нура гъуц!ирули рирус лук!ахъес, пикририк!ахъес. Гъанна назмурта лук!ути, далуйта буч!ути бахъ-бахъл саби. Дигахъаси илданира дуч!ули секъяйда Батирай уч!усирил, сегъуна поэзияла х!ебелхъуси дурхъаси рух!ла давла г!елаб батурал. Сунела г!ямрулизиб вебк!айчи илини бархъдеш бузахъи, х!яким-каримлис гапх!ейк!и. Илк!ун вирусири илцадра халаси

машгурдешличил давлачевсилис учѠес ва кеп-чеклизив хѠеркайѠс. Илгъуна хѠебариб илини, ил багъанданра нушаб ил дурхъаси сай сунела назмуртачивли, гъабзадешличивли, хѠяяла умудешличивли. Давлачебтани, шила халахартани къадагъабиркънила селра авара агарсиван ахъил хъа бяхѠла дуравхъи касили чугурличил гѠурра далай зайбикѠахъули сай Батирайли.

**Гъай, хѠула вегѠ верхѠна ибкѠ,
Тамашала дунъя либ!
ЦабехѠгас майдан дунъя
Ургуба гурдалисван.
ЦабехѠгас хѠяйран дунъя
Къярдла лутѠи къаплайсван...
Ва хѠула вархѠял вагѠибш,
Вайна дунъя либкъалли,
Някълар къарчигъа гушли,
Дугул хъулга хъямма диъ!**

* * *

Ахирличив гъалмагъунанира вархъкатурли, ухънара каили, дунъяла къакъличиб бархъдеш умѠѠули, къутѠкъути пикрумани савцибхъар Батирайли далай тѠашхѠеиб.

**Далайра сион иша,
ХѠябдусан урчилаон
Ва дила кункти тѠвяхѠми
Дила дамсулли делли,
Дехлиуб ябулаон?!
Далайра сион иша,
Тяйлайар ахътерекван
Дархъли дакѠиб дила чарх
КъухѠхъадизулли дели,
Сирислиур ваѠаон?!
Далайра сион иша,
Диъли далхул лачеон
Чархлизир къугъал уркѠи
Дила даѠѠили дели.**

* * *

**Шишимайра изайра
Чукурвякъили эсли
Буркъа махъе къямзани,
Заблиини бемхѠурил,
БархѠилиин бигубил
Ятимла хѠяка камъон
Ва ГѠямарла Батирай.**

Чум даршдус ардукьялра, чум наслу дарсдиалра, нушала литературала заклизир чум шалати зубари прахдухьялра, Батирай бегЛара халатигъунти ва бегЛара рухЛати зубаргазивад цаибсили даимлис кавлан. Батирайла поэзия бегЛара чумаси, даршдусмазибра хЛебульуси поэзияла хулчи саби. Иличи хъарахъибси гъачамалра хатГакеркур. Илала далуйти даршдусмазирра нушала халкълис зайдикУли кавлан, ил мурталралис нушачил варх сай.

Иличила гУрра дахъял делкес вирар. Сецад делкАлра, илди белкАни дуркъХедирар.

Берхъаб Батирайла далуйтала хазна бухъули верхКьярякъли. Тяниширули гъарил дарган ва илала тикрарХедирути образуначи карцирули.

Батирай нушала культурала ва рухЛа давла сай.

ДАЛАЙРА ВЕРХІНА ДАЛАЙ

Чили иба Батирай
Мискинси вири или?
Бири мулкра хазнара,
Дири чумал бугъара.

Амма далуйта илис
Балагъуни дашахъи,
Давлачебти балтУли,
Далуйти зайдулхъахъи.

Мискин – пакьирла гЯмру
Язихъдирули учИ,
Халкъла дарданачила
Агъула умеГ бужи.

Чинабадалра ХІурхъи
Къалпла далайчиби баши,
Абзбикили лебилра
Хужаимтас гапбикИ.

Мискин – пакьиртачила
Илдас авара аги,

Лерилра Батирайла
ХІябалцад хІябал бугъа,
Дабгили дуразличил
Хъули садирхъи сунна.

ХІяя умуси далай
Чинабалра тАшхІейи,
Батирайла далайли
Адамти дуракайи.

Арцли чус мабикГутас
Далуйти цаладирхъи.

Хъярчнигъунтири илди,
Къурушмани бурчулри,
Гапла къалпти далуйта
КъайХебикки бучІулри.

Илди далайчибира
Батирайли балтІулри,
ХІяя ва яхІ агартас
Далайилира чейгахъи.

Батирайчибси гъими
Халкъличиб чебихъули,
ГъимукІибси юзбаши
Халкъличи челхъулри.

Далайра верхІна далай,
Давлачебтас децІ аур,
Батирай къайикахъес
Чилалра ахъри агу.

* * *

Ахирра хІукму барес,
ГІякІалис бугъа белгъес,
Къасбариб юзбашили
Батирай къайикІахъес.

– «КъяртІилис белгъаб хІушаб
Дила хІялалси бугъа,
Букая!» гУрра ахъли
Далайиб Батирайли.

Гъанна далуйти гГурра
Зайдухъун ХГурхьикадли,
Дигайлара дардлара,
Халкъла гГямруличила.

«Жан асабгу хГушала,
КГел бугъа лерал гГурра,
Ну далуйта хГевчГяхъес
Дирудал яхГбарая!».

Арбукиб кГизсилра
Гъазали дурхьикадли,
Ца калун цацун бугъа
Калунси ил давлари.

Дураухъун Батирай
Шила дубла, анхълизи,
Сегъунарил юзбаши
Далай зайбухъун ахъли.

«ВебГалли гГяхГна гъабза
Хъунуйс гГелабадбирки,
ХГяри кайхъайчи гъабза
Айгъир буцес гъалакти»

Балагъ сай юзбашибас
«БикГар ил гГашиэхГе,
ХГурхъила шила шанги
Цахбарахъес хГелтхГе».

БегГла гГергъиси бугъа
Дуракаиб сунени;
«Мая, къасапбарая,
ХГяжурти, делкъеная».

Дуркавхъун гумайла,
Касили чуллан чугур.

Далай ахъбуциб гГурра
Дигайла, кахси дардла.

Гумайлизи цацали
Шанти чукурбиркулри,
ВиштГаси ва халаси
ЛихГби ауртин сабри.

Арцур дуклумар далай
ХГурхьикад дуньякадли,
Нушачира баиб ил,
МягГна буркъхГебнубли.

ИлхГейчирад шантани
Бугъни дуракайулри,
ГГякГалис юзбашилис
Батирайла далайлис.


Гъаннара зайдикГули
Батирайла далуйти,
Лерал, кавлан гГуррара
ХГурхьирра даргазирра.

ГГяхГгъабза гапирули
Усал гъубзни балтГули,
Дуклумар далуйтани
Даргала ахъбирули.

ХГяя умуси далай
Урцен, хГу, дуньякадли,
ГГяхГна гъабзала гГямру
ГГеркъадарес бузули.

Далайра верхГна далай,
Агъ, дурхъаси Батирай,
ХГебубкГар хГела далай
ГГямру дузули лерай.





**Зубалжат
ГЯМАРОВА**



ГЯМАРЛА БАТИРАЙ

Даргала поэзияла аслу-мина ва челябкьла белгидарибси машгурси Гямарла Батирай акIубсири 1817 ибил дуслизив. Илала далуйтачибад сабри бехI-бихьибси даргала миллатла литература. Далайчила гIямрули ва творчестволи даргантала культурала рухIичи, адамдешличи, гIабзадешличи барибси асар дебали халасири.

Батирайла гIямруличила белкIес халаси кIьйгIи барибсири Эфенди КIьапи-евли, амма дехIдихьибти ВатIа черяхIти дургIбани лерил дукьдуун.

Батирайла далуйтазиб гIяхIгIубзнас биуси кIьадар ца сабри: урхIлиини кахIевшалли, ил пачала сибирлизи урхью». Ил вахь дебали вархьсири. Пау-стовскийли лукIули кIьяйда: «Ил илцадра вархьсири ва илбагIандан чехIедаэс хIейри халкIьичирти кIьяян-жапа».

Батирай хIябIцIали дус виубси замана сабри дуньякад зайбухьунси жи, су-несра хьулчилибиубси; «Лебил дуньяла ялчни-хьубзури цадиира» ибси, ва Батирайла дучIути далуйти хIясибли, аргIесли сабри сай Батирай, Октябрьла революция биайчи кахIелни.

Батирайла замана дебали кIьяянсили уббухьун. Юзбаши Батирайла азадти далуйтас гIякIа чебирхьес вехIихьиб унци лугьули. ИлгIуна кIьисматри цархIилти миллатунала поэтуналара. Элдарилав агIулаварибсири, дигайличила далуйти дучIули или, далайчи Анхил Маринна кIунтIби дирбубтири, кIьумукьла диркIьаличиб гуж-зулмула танбихI барибсири Ирчи КIьазакIьлис, сунелара куцагарбарибси кIьаркIьала хIеркIьлизи лайбакIьибси. Нушани чебиули кIьяйда, ит замана кIьаркIьси буилири. Или биалра, нуша мукIурли диэс гIягIнилира Батирайлис, сенахIенну ил кIьаркIьдешличи, хIерхIеили сунела тIама ахьбуцни багIандан. ХIера илала далайла гехIел тугь, чузирра чедиахьути итхIелла гIяхIгIабзадеш:

**Урибси машгIур гIьабза
ХIябрази хIяри хIерхью,
ГIяхIна гIьабзала цIелда
КалтIа гIьунила дубла.**

**ГIяхIна гIьабзала гIямру
Дирар гIяну шура дус,
Я урхIлиини ил каршу,
Я сибирлизи урхью.**

Ил бегІ гьалав даргала поэтунала ургав дураухьунсири дакІу-гьаргли учІес далагардешуначила, итхІелла заманала цІябти шалубачила. Амма чедирхьути гІякІнанира гашанра, сунени сай вячІи сай или гьанбикили саби гІергьиси иш далай бучІухІели.

**Эгер декІси изалли
Эгер бекІлала децІли
ЦІурьала хІяка кьяйда
Къямзилизи игьалли
Ва ГІямарла Батирай.**

Батирайлис гьанбиркулри чархла цІакьличил барх рухІла шайчибси цІакьлира вархьвалтулра или. Ил хатІаикилри! УбкІуси поэтли, сунела чарх излума буцибхІелира балли, рухІла шаласи цІакь бетхІехъахьилри. ИлхІели илини цахІнабирхьули сай сунела бегІла гІергьиси далай, сабира бетаурси бекІли, лебил сунела бекІла агарси поэзиялис:

**Диру далцутазира
Сайсири ну азадси
Тяй урчиван сагназив
Азадли гІяйикІули
Кайсусири мурталра
Набцун пайла баибси
Алашаси бялчІули
Тяй урчили кьар кьяйда
Сагназиб гІяйикІули.**

ХІера илкьяйда хІериуб ва вебкІиб ГІямарла Батирай, гІядатла хьубзар ва даргала халкьла чевяхІси поэт. Поэт бегІлара кьиянси адамлис дарх чедикалли кьяраэс цундешла ва хьарциндешла кьудкьудеш. Илди кьяраэс чебикибсири Батирайлисра, сайра халкьлизивадси ва халкьличил калунси, сунела кьиянти гІямру керхайчи. БекІла агарти сунела далуйтала кьалипуни кайсусири халкьла ГІямрулизирад ва илдала лерилра шалуби далусири. УркІецІи агарси бархьдешличил гьаман ургьусири. ГІямарла Батирай 1902 ибил дуслизив вебкІибсири.

ГІЯМАРЛА БАТИРАЙ

**КацІили цаибил ганз
ХІела далуйгачибад
Сабригу бехІбихьибси
Даргала поэзия.
Ва ГІямарла Батирай
ЧехІебиулра нуни
ХІела пагьмула хІурмат
Агарагу гьанналис
ТІашбатурси памятник.**

**ХІела пагьму хьумхІерту
Дагьистан лебалцадхІи,
Марли, хІечи хІерли саб
Ирчи Къазакь, Сулайман,
ХІямзат, Расул, АбутІалиб.
Пашманни хІербикІули
АгархІели гумайлав,
Чучил лякьир бемжахьес
ГІямру кьиянти хьалли,**

МухІлила пагъ бугали,
Марли, къакхІебиубси
Ва ГІямарла Батирай

ГІярбукІла мургъи къяйда
Гъар мерличиб ухули.
Мургъи-арцла устнани
Мугъурван кабахъибси.

ДУРХІНИ

БегІла халаси давла
Аллагъли нушаб гибси
Иш дунъяла къакъличиб –
Саб нушала биштІати.
Мурталра илди нушаб –
Аллагъла уркІецира,
Давлара ва дусмира,
ПарчбикІуси игъбарра,



Къакъличир дуклумира.
Нушала гІямрулизиб
СабхІели нушаб дурхІни
Разидешла галгуби –
ДурхІнала дурхІни саби
Галгубачирти цедеш,
Нушала гІела гІебшни
Жагадарес аклубти.

ЮЛДАШУНАС

Лебилра юлдашунас,
Дунъякадли гІутІугас,
Наб дигули калунти
Гъаннара хъумхІертути.
Дигила ванадешли
Чули ванарирути,
Илцадра наб дигутас
Аллагълизи рулгулра
Дархъахъес чус ахъри-цакъ
Ва чІумаси арадеш,
БархъІебатахъес саби

Къиянси манзиллизиб
Аллагъла уркІецили.
Биаллира гІутІули
Дунъякад юлдашуни,
Дааб гъарилла хъули
ТалихІра уркІецира.
Савли булхъул шалаван,
УркІбази улкъайлабад,
Гъар балга-дугІя дила
Ва Аллагъла уркІеци
Диаб гъарилла хъайгІир!





Гиса ГЯМАРОВ

БАТИРАЙЛИЧИЛА ЧУМАЛ ГЪАЙ

Батирайла мицИрдеш халкълизиб саби. Халкъли ил се заманалра хъумхIерту ва чула пасихIдешла байрахъван мяхIкамли вихIу.

Батирайли дубуртала дукъбикад кацIибси гъарил ганзла къел-хIерзи даргни, илди чинадахI аркъулил белгидарни ва детхIехъахъни – чевяхIси далайчила лайикъси хIурматбарни саби. Батирайла гIяжаибти гIямрула къям сагати баянтачил чебицIахънили, Батирай ибси девла мягIна имцIали гIячихъбирахъули саби.

ДГУ-лизив учIухIели ва илис гIергъи, нуни гIяхIцад халкъла хабурти, далуйти, буралаби, багъираби дучира. ИлхIели нуни ГIямарла Батирайла гIямруличила баянти ва илала далуйти дучибтири.

Илдачила сари ишар гъайра, чузивра Батирай сунела шантала. узи-уршила ургав, бузерилизив ва гумайлав сегъуна уибсирил чейахъути.

Батирай поэзиялизивцун ахIенну, сунела бухъя-зегъализивра хIял-тIабигIятлизивра цархIилтазивад декIарулхъуси дубурлан уили сай. УркIи кIантIибареси далай белчIесван, ил уркIилизирад дукелцIи дурадилтIуси тамашала ихтилатчира сайри. Халкъли бурни хIясибли, Батирай буреси дев баргес кисмазив умцIхIемцIи, гIягIниси дев мурталра илала лезмила бехIличиб бири, ва гъарил анцIбукъ илини саринничил гъуниббалтусири.

Бурес чебиркур, илала кункти, дукелцIили дицIибти саринтани сунела узи-уршира барх алавбурцутири.

Къалпси дунъяличиб бархъдеш ва умудеш дигуси Батирайли илдала хIял-тIабигIятлизир къаршидиркути далхIейкибти баркъудлума лебIеб бугаси, амма уркIилизиб дяхъи хIебареси масхарала саринничил далтIули сай. Ил анцIбукъ Батирайла пагъмулизиб тIинтIли къаршибиркули саби.

ГIяймаумахъилан Рукъият МяхIямадовани бурни хIясибли, гъачам Батирайли сунела узи Сулайбанра илала хъунулра къалмакъарли биркъули баргили сай. ИлхIели Батирайли ишгъуна сарин цахIнабахъиб:

**«Къарчигъара пявара
Дявлизулли, бикІвар,
Къарчигъалин пява
ПяхІлала белтІун бикІвар...»**

Гяямахъилан Хамис ГяхІмадхановани бурули сари: «Батагъализи аркъухІели, Батирайла рурси ПатІимани Гуммахайс чуду кабахъили сари. Гъалмагъунани, Гуммахан шакра хІейкахъили, гъунчиб ил чуду берки саби. Ил хабарла бакъибхІели, Батирайли гІергъиси сарин цахІнабахъибсири:

**Чугурла уста ириб
ЧугІлан Хамисла ада,
Ухъалиши дихъибил
Сукъба шалбалла пада,
ДигІянти чудни дукул
Хабарла Кеске къада...»**

«Ражаб бикІуси дурхІялис мекъ барес дигули, Батирайла рурси Рукъиятличи сукни башутири, – бурули сари Хамис ГяхІмадхановани. – Рурсилис дарайла палтар хІедарили, мекъ хІебирис или, Батирайли бурили гІергъи, сукникъянабани илдачи гъуни хъумартур. ИлхІели белчІунси саби Батирайли иш сарин:

**Саттагъайла къадани
Шери ардашар Гъажар,
Мискин адамла дикъу
Гаша ахІибкІис бажар,
Дарайла палтарлини
Шиварухъибил Ражаб».**

Шери рукъес гъалар рузини Батирайлизи сунес арцли баршибси ири асахъес тиладибарили сари. Батирайли «Биургу ири сегъуна-биалра биубли гІергъи» или, ири асес пикрихІебариб. Илбагъандан рузини мекъличи живарили ахІен.

**«Муръидикъу варъали,
Жулгъа лукІа чурхали,
Наб алапа урдахъяб
ДешлахІярла уръали», –**

Ил сарин цахІнабахъибси саби ил анцІбукълис Батирайли.

Илди дукелцІила саринти Батирайлис сунела узи-урши хІейгахънила лишанти сари эс хІейрар; илини илдазирад гъарли-марти адамдеш тІалабдирули сай. ХІера, сецад диги ва ванадеш духІнадуцилил гІергъиси саринни:

**«ХІули дакъиб, хІерахІъиб
ХІула ГІябдул-Вагъабли,**

**Гябдулманап, ху наб ват,
Адайлара узби бат.**

**Мурга даршиб, гъайахъиб
Хула Гябдул-Вагъабли,
Гябдулманап, ху наб ват,
Хула Гябдул-Вагъаб ват...»**

Батирайли сунела гуяв Гябдул-Вагъаб гяйнив, кьукьубачи катурли виштлара, кьисиклуи варгили сай. Илхели, някъбачи ахъуцили ил дурхлара, белчунси саби, биклар, Батирайли далай.

Жагъси замана Батирай чичилра хъархларагарси, гъарзаси ва разили гямуру дуркуси адам вири. Амма гямурула кьаркъедшли ва чедакйибти ухънадешли илизибад вайлиубси ири лебгеб цлацлабарни тлалаббариб. Или биалра, Батирай гямурулис мутигваклес валилзули ахлен. Ил сай-вегси ванзализивад, дубурланнис лебгеб дурхъаси ва ахлерси хазнализивад улхули сай, амма гямуру сахаватли ва гъарзали дерклес узули сай.

Батирайла деглес ахъри агарти хъуми хледири. Къацлис дирцули, хъумира керхур, далайиклуи сайра мискиниуб, бекл хянбиуб, къакъ кьухибизур.

Илис беглара игъбарагарси дубурланна гямуру дерклес чебуркьубсири.

«Урхла аршира биршили чарулхъухели, – бурули сари ванашимахъикан Мусли Муртазагялиевани, – ца хъунул адамли Батирайлизи хъарбаили сари:

– Вамсхлемсурвив, Батирай-ази, таманбиубу?

– Дуцгрум цугдIBIL манзил

**Ихад адулхъан дурши,
Уркли хлергъибил алкван
Мискин адамла урши.
Тамандили, лявкъьялла
Мухъи-мяхларла арши»,**

– далай белчун Батирайли жаваблис къадин.

Марлира, гяжаибси адам уили сай Батирай! Илала бугаси гякьлула хазнара, илала пасихлешла гинизра, гяжаибти кьиликьунира гъарил дубурланнис давлала мягданни детарули сари.

Арбякьунси даршдуслизив Батирай лямцлбиклуси ва адатала уркйиб ванадируси дягимцлалали ветаур.

Челяркьути чумра даршдуслизивра ил чеалкьуси наслулис Берхила нурли хуси дягимцлалали кавлан!



Хיאсайни ГЯПШАЕВ



ЧЕВЯХИСИ ДАЛАЙЧИ БАТИРАЙЛИС

Батирай – даргантала
ЧевяхИси далайчири.
Ваши ил архИяличи
Шимази дубургтала.

Гядатла даргантас ил
ЛевГев дигахьусири,
Илала далуйтаци
ШипБяргИли лехИбилзи.

Хабардерхур илала
Далуйтала даргазир,
ГЯмурула вайра гЯхИра
Чедиахьи илдазир.

Бускрантас делчИун дургар
Батирайли далуйти,
Леб цабахИтас баили
Пагьму илалагьуна.

ХЕбалас нушала ша
ВакИбсирил Батирай,
Амма набчира баиб
Батирайла пагьла пай.

ХЕбалас ил пагьмула
Челяркьянал гье мурткИал,
Аллагьли гевуцили
Сабухь бучес биркурал.

НУ ДАИМ ИШТЯХИСИРА

Ну даим иштяхИсира
Лерсиличи малхямдеш.
МалхИямдеш сари ахьдеш
Дунья сагьли бихИути.

Дизе чебси саб илди,
Гьар инсайзир Дуньяла.
Илди агардиалли,
Агарбирар Дуньяра.

Уржахьу малхИямдешли,
Саби-ургаб инсунти.
МалхИямдеш лералцадхИи,
Гьарахьли дирар дургьби.

МалхИямдеш лайдакИибти,
Бурцу игьбарагрили.
Илди агардиубти,
Саби даим бургьути.

МалхИямдеш хьумартурта,
Кабуршу тИабигИятра.
ТИабигИятла гьарил жан,
Агардирули гьаман.

РяхИмуагардешличи,
ГьимбуркIар тИабигИятра.
Илгьуна инсунтаци
РазихИейрар Аллагьра.



Рустам МУРТАЗАГИЯЛИЕВ

ГЯКЪЛУКАРРИ БАТИРАЙ

Нуни дила белкани
Хасдирусира дурхнас,
Илдазир гъабзадешла
Гъаладирхъулра дурсери.

Дигахъис гъаман лукъес
Масхара яра басня,
Илдазирад кайсесли
Гякълула дарс учанни.

Вишгъахейчирад далес
Гягнити сари гямру,
Чевхелкни гъалавахли
Вашесли гъарил адам.

Чугур бяхъес хлебалас,
Далайчира ахенра,
Амма набра Гямарла
Батирай дигахъисра.

Илала далуйтани
Ну ясиручбсира,
Илала гъабзадешлис
Гъаман икрамикъусра.



Гяхгъубзнас дезаикни,
Вайгъубзни балтутири,
Жан Гямарла Батирай
Урехиагарсири.

ИГИТ САЙРИ БАТИРАЙ

Даргантала пахрури
Хабар халал Батирай,
Ишбархира зайбикар
Хела жагаси далай.

Гялам се бикаллира,
Хуван пагъмукар агу,
Балгаван хела далай
Нуни тикрарбирисра.





Сарат ГЯЛИЕВА



БАТИРАЙЛА РУРСИ ПАТИМА

(Ахир)

Ашкарсиличи мешули, Батирайла Гямруличила лукЎти гялмагъунани гЯхИл камли саби Батирайла хъунул Аминатличила лукЎсира. Дахъал делчунтазиб ишгъуна белкI кършибиркули саби: «Батирайла Аминат гЯхИл давлачебти узденти Къапихъали бикЎти тухумлизирад сарри ва мискин Батирайлис редхIелугухIели, гъарритЎнсири» или. Ил гЯхИл биштIаси секIай Батирайла дурхIнала аба Аминат гъарли-марли сегъунти адамтазирад сарсирил балхIебалахъа. Ил хIякьикъат сабаб барили, наб ишар имцIали тIашризес гЯгIниси биэсгу или гъанбиркули саби. Аминат акЎбси хъалибаргличила нушала бурхIначи садаили цакамти дезни лер – Аминатла ада Къапи кавшибхIели дарибти. Илди дезни делчунти диъни баянбирули саби Аминатли ва Къапила рузини. Бархъдеш багъандан бурес чебиркур, Къапила рузи лерси хIериъни ва Батирайла хъунул Аминат ада кавшибси замана хIябал дусцун риъни акЎбла риубси. Аминат бегIлара риштIаси рурси риъни Къапила шелра дурхIялизирад: Мутай, Баху, ГЯйшат, (адала у бихъибси кIинайс) Къапи ва Аминат.

Къапила рурси ГЯйшатли бурни хIясибли, сарира 1919 ибил дуслизир ребкIибси, сунела ада Къанбулатла Къапира Батирайла ада Сулайба ГЯмарра гЯхIги гялмагъуни бирутири, илди мурталра цаличи ца башутири, унраличиб хIерра бирутири, ГЯмар ва Къапи мурталра бикЎти саби нушала урши-рурси барх кабалтехIе или. Амма дурхIни биштIали лебалли, итхIели цабехI давлачебтала питни детаурхIели, илав цугикибси Къапи жагъти гЯмруличив каршули сай. Ил бетаурсири 1836 ибил дуслизиб. ИлхIели, халараибси рурси яра рузи агарси Къапис Батирайла аба Шамайни дарибти сари ца-чумал деза

**Гъай гъуя, гIеде Жамав,
ГЯхIдив дурис вакIибис
Велгъани се дакъаде?
Хъумъур сила дигъаде?
Къапи кавшили эли,
ХIу сенкъи музавхъаде?**

ИкІ дезалис гІеларадти гъай гъар мерлар ранг-рангли делкІи лер, цацадехІ мераначир мешухІеркулира сари. Ца нушанира гъанбуршехе:

**ВерхІалла таркантла ши
Урхъула гъумли дуцаб...
Ца бикІла верхІал къапІа
ВерхІалла харасанна.
Агъвай, Къапи, рузи дибкІ,
Ца чархла верхІдахІ палтар
ВерхІдахІалла архІяйла...**

Къапи кавшили гІергъи гІяхІцад замана арбякъун, дурхІни халабаиб. Гъалабла икърар хъумхІертурли, Сулайба ГІямар Къапила хъунул ПатІимачу сукни вякъун, уршилис Аминат гІяхІли ригни хъулчили буцили, амма Аминатла неш разихІерикиб, хІянчи хІебируси адамли далуйтачил дила рурси хІерриркъув или. Амма Батирайли се барибал хІушани баладая, ил багъандан селра халаси секІал хІелукІехІе.

Ишаб наб бурес дигуси цархІил саби – Аминатла халал узи Мутайчила, сайра даргала халкъла ургав гъаннабикайчи машгъурли калунси, иш илис хасбарибси далайличивли:

**Абани урши вакъаб
Къапила Мутайгъуна,
Газалини тйй дакъаб
Мутайла Хъанцагъуна.**

**Итагъаби хабалла
КІарахъан Шамилгъуна,
Итагъаби гІяхІгъабза
Къапила Мутайгъуна.**

Се барибсив Мутайли? Сен иличила гъаннара гъай калунтив халкълизир? Сен илала у нушани ишаб гъанбуршусив? Мутай кавшибсири 1848 ибил дуслизив. Чъртла гІинцІила бикІуси мерлаб, гумила мякълаб шел адам укабиили зумаси вацІализи, илдазибад хІябла уми халкъли гъаннара дала – цалис бикІусири Къаммала ГІярикІинтІ, цалис – Учла БяхІязи, цалисра ГІялигІямарла МутягІ. КІел адамла уми далули ахІен. Мутайличила, илала гІямруличила халаси жуз белкІес вири, гъанна анцІбукъ илизиб ахІен. Или биалра, ца гІямрула хІякъикъат бурехІе. Мутай валуси сай Шамилла дявла гІяхІгъабза бутІакъянчиван. Ил гІяхІгъабза уили сай. Илбагъандан ахІен Мутай кавшибси. Сай давлачебти, халаси лебдешла бегІтала урши виалра, Мутайли къиянна халкъ багъандан гІямру харждарибти сари. Ит заманала Дагъиста гІямру гъандикахъая, мискинтачи давлачебтала зулмурти. Халаси зулмулиуб хІербирути тухум лебти саби, сабира пакъирли, язихъли хІербирути, мурталра Учла БяхІязис бузути, чусра Узихъали бикІути. Гъачам сен БяхІязила хъу заябариба или, шила давлачебтани илди кабушес хІукму барили саби, амма

язихъ халкъ кабуршниличи къаршили Къапила Мутай (26 дусла гІямруличивси) дураухъунси сай ва ил БяхІязи бикІусилис буунсила къадар ва гІурра халаси багъа бедили, Узихъали берцахъили саби. Илдачи мешути дахъал гІяхІдешуни дарибтири сунела камти гІямрулизир Мутайли. Ил секІал шила давлачебтас гІяхІхІебизурли, чус ил урехила адамлизира хІисабварили, къасбарибси саби Мутай кавшес ва чедиб гъанбушибси тяхІярли ил кавшибси сай. ИтхІелила Мутайла гъабзадеш гъаннара дурули бирар гІямрула халати адамтани. Иличи – хабарагарли аркъуси адамличи хІярхІубала заб чекъурхІели, Мутайли илди багъурли, иш далай белчІни халкъли гъаннара хъумхІертурли лебал.

**Ивгъа хІуни, хІед нуни,
ГІялигІямарла МутягІ,
ХІуни тупанг даршайчи
Хъанцайли гъуни ихъу,
Даршибил къяйкдухъайши –
ГІяхІцад хІаркІли шин арху.**

Или викІуси сай Мутай, сайра 27 дус виубси. Илала акІнила ва вебКІнила тарих хІябличибси цІелдализир лер. ИкІ далайличил сунела хъанца урчиличив ласикІули, илини хІябал адам кабушибти саби ва илдани сайра. Илизи 32 хІярхІя чегибхІелира хІебкІили, варгибси сай. Бурни хІясибли, ил чеваибси сай мургукал МуртузагІялини, илини ца душман мякълавад аркъухІели, бяхъибси някъли уцили, ар агарси ханжай кавшибси сай. Иличила гъаннара бучІули халкъла урgab кали саби иш далай:

**Аръ агар къинжайини
Душман хъаршул багъадур,
Къаплан Къапила Мутай.**

Мутай вебКІибхІели, илала къаркъала лайбакІили, урчи буцибти кІел адам шилизи чарбиубли, урчи дуцІбарили «Мутай кавшира» или бурули саби. ИлхІели Мутайла рузикъар Тажли бикІуси хъунул адам урчиличи дугъаризурли сари.

**Эски душманти хъили
БакІ силиши бакІаде,
Гъиш ХІурхъила шилизи,
Дила Мутайла Хъанца?**

Ил гъайличил барх ХъанцІани ласбикІули къакъличибти убяхІбушибти саби, ва илдазивал ца, къяшми гъакІдирули, кавшибси сай. Ил багъандан саби «газалиин тѳй бакъаб Мутайла Хъанцагъуна» бикІути. Бурибси анцІбукъли зугъали зерзердарибти сари лебилра хъалибаргла уркІби ва чула ахІенну, чула дурхІналарга гІямру. Мутай Къапихъала жинсли ва шила мискин халкъли хъумартурси ахІен. Шакдеш агара, Аминатли, ПатІимала нешли, сарира 1916 ибил дуслизир ребкІибси, чуйна-чуйнара Мутайличила хабурти дурни, нушанира ПатІиматлизирад аргъибти. Сунела илгъуна машгъурси нешла узи хъумхІертурли, ПатІима илис ручІусири ва рикІусири:

Хура талхан эдлери?
Дубагор дубуллишир
Шихъ зубрела шалал бац
Шаладикгули лирай,
Махъадирхаб хула у,
Къаплан Къапила Мутай.
Дугили дашул цайкъа –
Мухили хили дицили,
Цайли дашул сартан биц
Къялши дибба дицили,
Къаплан Къапила Мутай.
Дугили цябли биган,
Къаплан Къапила Мутай.
Мирлиини ганзаон
Вайгъубзни зирзирбикъул,
Битив милгъла италгу,
Хъулга къямми пяхъиул
Къялшуби шанда шункъар.
Сибикъаде талхъунти
Хура талхан эдлери,
Къаплан Къапила Мутай?

Уди-шиди минтана
Ширан къазли бицибил,
Шиди шерила чянкIа
Арцла чолла дуцибил,
Гур шиди гяндан варгъи
Яплис ялгъан дуцибил,
Сибикъаде талхъунти,
Хура талхан эдлери,
Къаплан Къапила Мутай?
Аждагъала бикI альуй
Уталис хъадирхъани,
ГъалбицIла хулби сайтIуй
Чирагълис адулкани,
Къаплан Къапила Мутай,
Сибикъаде талхъунти,
Хура талхан эдлери?
Хъар забла урхъназирад
БархIедулхъули лирай,
Мадуаб хула тIама,
Къаплан Къапила Мутай.
Сибикъаде талхъунти,

Патимани дезализир дурути гъай ишарра гIяхIил мешули сари сунела дудеш Батирайла дугъбачи.

Патимала ца гъатIи деза гъанбуршехе. Ил белчIунси саби 1925 ибил дуслизиб, ца сунела дебали гъамси адамлис вайси бетаурхIели. Ил бетаурсири Хурхъила шилизиб ца адамла мекъличиб, гъалаб халкъ-ургаб бируси вайси санигIятличибли, мекъла замана лагъяхI къяйкбикIухIели, илад чарбиубси хIярхIяли някъбазивси авал дус виубси урши кавшибси сай. Ил секIайчи пашманиубси адази Патимала дугъабиз дебали пагъмучебсилизи халбарес дирехIе.

Мургъила шалихIябдиъ
Ширхъадихъили или,
Пашманили чаредив?
Мургъи мусни дуцили
Мяржли диргесго или,
ХIяйранили вакIадив?
Уцмела хъарахълизиб

Чубк гIеркъал цIуб мукъара,
Чубк-чубкли хъаргъишера
Бисули ада-аба?
Шарабла гIиниз-алав
Шалали дакIиб вава,
Уди дяхIи бакъили,
Шици шах хъабатулли,
Шахлиин игишера?

Пикрибаралли, Патимани севан бурулил адалара уршилара бархбасни, урши адани шалихIябдиъличил цугуцили сай. Ишаб сипатбирули саби халаси диги, ил иргъахъули саби «хIяйранили, пашманили» вакIадив ибсини.

**Духъала дицИиб мургъи,
Сури дицИиб хІяли арц,
ЦИидихъла цІуба вава,
Бисули хІула бегІти
Сион заяишера?**

Адамтала суал акІес асубирар, сен мурталра рисусив ПатІима или. ХІебиубсирив илала гІямрулизиб шаласи замана? ХІедиубтирив гІяхІти бурхІни? Гъайгъайра, гъар адамла гІямрулизир къяйда илалара дирутири гІямрулизир гІяхІдешуни. Бурес чебиркур, или биалра, ит заманала сегъуналра ихтияр агарси дубурлан хъунул адамлис сунела уркІила пикруми далайличил арзес гІяхІил гІядабли бири. Лебсирив гъатІи цархІилти Дагъиста хъунул адамтас чула тІабигІятли бедибси халаси пагъ халкълис пайдалабарес ихтияр?

Нушани гІурра балуси саби, ПатІимала дезнала ва жагаси тІамала хабар аргъибхІели, Батирай шила юзбашини тІалабварили бурни: «Батирай, нушани аргъира хІела рурси хІечи мешуси далайчи сари или, рахли илинира хІунигъуна гъуни буцалли, унци ахІенну, хІела хъура кахІевлан». ИлхІели Батирайли ибси саби: «Диъбачол дарх лерилра гІянжира хІушимал деб», ва рурсилис сегъуналра къадагъа хІебариб. Амма ПатІимани мурталра ил секІал гъанбиркахъи, рухънараибхІелира ил гъанбурши. Ил мурталра рикІи, Совет хІукумат кабизурти дусмас гІергъи: «Ну жагъси замана сен ишгъуна дунъя агарсирира?! Гъанна дила уркІи къутабиубли саби, рухънара раили, шимимтара ригубли».

Сунела ада Батирайличив калунси уршилис барибси биштІаси нусбала чуду (къакба) сипатбирули сари дурибти гъайли. Муруйс селра гъанхІебикахъес рикІусири икІкъяйда, барибсира чебаахъили или, бурули рири ПатІимани.

ПатІимани барибси халаси назму лебси саби сунела рурси Акайсра ва узи МяхІяммадлисра. Ил назму тамашабизеси саби, амма нушани ца-кІел тахта ахІи далули ахІенра. Ил белкІунсири нуни, сунени бурули. Пашмандешличил бурес чебиркули саби ил заябиъни, цакамси ахІенси. ГъанбуршехІе ил:

**Къадакад дашул къапла
Къакъла сиртла дабре вагІ,
Авзи ватаб адайла.
Хъа бурхІри икъул бурхІяр
ГІилавад хъуливкъяхъес
Авзи ватаб Акайла.
Гилан хъумурра сайра
Авзи ватаб Акайла.
Къарабагъ урче мурда
Абзи ватаб Акайла.**

Чедиб гъанбушибси тяхІярли ребкІибси сунела шери редес хІядуррарибси рурсилис рикІуси сари:

**Ахъанирад хъар хъули
Акай хъа дикъуллану,
Хели бакъис ахІкъяллау,
Ва урубела хъунни?**

Сунела риштІаси рурси Хадижатлис сунени белчІунси далай саби иш.
Сунени бурили, нуни 3-ибил класслизир ручІухХели белчІунси, гъаннара кали
набзиб леб:

**Ва дила Хадижатла
МуцІур мучІучІунела,
КІунтІуби дукІул арцла,
Цулби цІуба игІяйла.
Ва дила Хадижатла
Гиркъми гІямайди гІинтІла,
Къянкъ лугъайлан Батирла,
ХІулби манай улугъла.
Ва дила Хадижатла
Анда шагъри кагъарла,
Къама – базар архІяйла.**

Сунела гІямрулизив гІяхІил сунечи валкайкибси, сунес дигуси гІямрула
гъалмагъличи, сайра къисла уста вируси, ПатІима ишкъяйда дугъарилзули
сари масхарала далайличил:

**Ва дила шалайла
Шарабла хІулби
ХІарахІдикІулиго –
ХІулла дикъули.
Ва дила вавайла
Чакалла уркІи
ГъайахІдикІулиго –
Мурга диршули.**

Ца адамли, «Батирай сен къайхІеркусив мурталра далайикІули, сен шила
халатала зегъа чехІейсусив?» или Батирайличи гІяйиб барибхІели, ПатІимани
ишгъуна жаваб бедибси саби:

**Къарчигъали ав айсу,
Къямми алав къядикІар.
ГъунцІайли гъунар дикъу,
ХІявбуцІи хІаркІхъад дашар.**

Батирайла къугъаси тІамала яра гъайла мягІна хІебалути адамти иличи
гІяйибта биркъули буили саби, Батирайлис «бунагъ биур» или, «чугурличирти
гимми хІярамти сари» бикІули. Илдас жавабли ПатІима рикІули сари:

**Урцуллишир хІябал гъиз
ХІярамли дирар, бикІар,
Урцуллишир хІябал гъиз
Дирардели хІярамли,
Гъаруш хъадалтул ула
Гъизла силис дикъора.**

ГІурра Батирайличи гІяйиб бирухІели саби, илини держ дужули сари или.
Илис жавабли ПатІима рикІуси сари:

**Бунагъ биур, бикІорго,
Шин-гІярякъи дужантас,
Бунагъ сен ахІбиура
Шараб хІулби дужантас?**

**ХІакъ хъалукІа, бикІорго,
ЦІуб чакурта букантас,
ХІакъ сен ахІхъалукІара
Чакариширра муръил
ДухІнар уркІи дукантас?**

ПатІимани бурули рирусири ва сунела гъалмагъ хъунул адамли дурхІни
батурли, хъали буэс хъулриубхІели, руахъес багъандан нуни ишгъуна далай
белчІунра или. Ил нуни белкІи кали леб:

**Абдал дигайла бегІтас
Диъби агор лигби деб,
Гъай аман диъ-диъ или,
Лигбаши хъямбикІихъес.**

**МахІур карцІайла бегІтас
Шин агорил шурми деб,
Гъай аман шин-шин или,
Шурмаши лямбикІахъес.**

1914 ибил дусла дургъбала замана Германияличи къаршили бургъуси
Дагъиста мурдабала гІяскарлизив вируси жагъил адам чархІевхъунси замана
ПатІимани гІелар калунси гъалмагълизи бучІахъес ишгъуна далай бурибси
саби. Рурсилизи мурталра далайлизив гъануршен рикІусири ПатІима:

**ХІинтІинни дуцІул гІутІи
ДирцІарайши ну хІалли,
ХІалли дириб байталман,
ЦІудар гІянжила цІяб хІяб.**

**Щубли далхул алича
Дяхлораши ну хлалли,
Хлалли дириб байталман,
Хьянцл гинайла дикл гъангуз.**


Нуни ралуси замана ПатИма рухънараили, цунни рири. Бурибсиличи мешули, жагъли, хъа хЕбарили хИябалра дурхИя алхунтири, ца бегЛара виштЛаси МяхИяммад бикЛуси урши дура мерличив вирусире мурталра. ГъатЛи ХИурхъила шилизиб я узи, я рузи, илдала дурхИни лебти ахЕнри. Лебилра хЕрбирутири ГПямахъилизиб. ПатИмала гИямрула гЕргъити бурхИни разили архИяджъун. Сунна яшавра ункъли хЕбири, наб ункъли гъанбиркур, ахъти шурмала бяхИла чедибси халаси юрт, гьаларла тяхИярла хъулрира сабира, ила кариибси цайси, халаси пагъмула, къугъаси тIамала регI Аба или бикЛути. Янилизирра ил биштЛаси хъули кариусире, хЕб биалли гьаргалар рири, биштЛаси цIабилкъла гьала кариили. Юртла удиб халаси къадара бири, сунезибра дягI камхЕбируси. Сарицун калунси замана ПатИма рикЛусире:

**ХИябилла дитИли лир
Дацхъадухъунти хъулли,
ХИябилла анцIдукъи лир
ВагI агарти юртани.**

Гъанна анцIдукъунти юртани яра дитИибти хъулри агара. Сари ребКили гЕргъи бахъли кахЕли юртга гъятИиб. ЧархЕвхъи гIур шилизи бегI гелавси урши МяхИяммадра вебКиб. Гъанна лерси ца рурси сари: МяхИяммадла рурси ПатИма.

АхЕрти гьалмагъуни! Ахирличи бикиб Батирайла рурси ПатИмачила камси хабар. Дебали камти сари нушани далути илала далуйти. Халаси разидешли бетари делкIунтани хIуша бара-баралра тянишдарадалри Батирайла рурсила гИямрула шалубачил. Нушани балехЕ, лебилра даргала халкъла хъулразиб Батирайла у гъанбуршни, илала далуйти зайдикИни. Нушаб дигахъира гъаннала гЕргъи Батирай гъануршуси мерличиб гъанбуршули Батирайлис дебали ригуси, сунелагъуна пагъмула регI рурси ПатИмала ура.





МяхІяммад ГІЯБДУЛЛАЕВ,
философияла ГІилмуртала доктор,
профессор



ДИЪБУКИАН ШУЙХРИ

Дагъистайзиб накъшибандила тІарикъатла шуйхрала силсила (рахаж) секъяйда даимбиублил хІясиббарибхІели, ну тамашала анцІбукъличи вяхІягира. ИшхІелла Дахадаевла районна ДиъбукІла шилизиб хІербируси ца жинслизибад авал шайх акІубли буили саби.

Будунтала ил жинслизивадси цаибил шайх МяхІяммад сайри (ил жинслис илкъяйда бикІутири илизибад шила чумал будун дурабухъни багъандан). Ил Къурба урши сайри, диъбукІантала ургав ил Къурбан-МяхІяммад сайливан валусири. Къурбан-МяхІяммадли ХІХ ибил даршдусла 20-50 ибти дусмазиб Урусла пачала хІукуматличи къаршиси Дагъиста ва Чечняла дубурланта мильатла-азаддешла хІяракатлизир жигарла бутІакъяндеш дарибтири. Гур ил имам Шамилла насихІятчибазивад цали ветаур. Къурбан-МяхІяммад илкъяйдали имамла мякълавси Гъази-Кумухлизивадси шайх Жамалудинна муридра сайри. Шайх Жамалудинни сайри ил муршидла даражаличи айкахъибси. Пачала хІукуматличи къаршиси дергъ пунтбиубти дубурланти удибикниличил таманбиубхІели, МяхІяммад хІяж барес вякъунсири. ХІяжи ветаурли чарулхъуси ил Цудара урхъукад куртІбикІули чарбулхъуси гамилличив вебкІибсири ва урхъула дублабси Поти шагъарлизивад гъаряхъли ахІи мерлабиубси татартала ца шилизив хІяриихъибсири. Гъанналичи бикайчи ил шира кали буили ахІен.

Илала урши МухІаммад-устазра муршид ветаур. Илгъуна даражаличи айкахъибсири ил Къазанишлизивадси шайх Айди-хІяжини. Сай Айди-хІяжи биалли Кази-Кумухлизивадси Жамалудинна муршидли калунсири. Нушачи даибти баянти хІясибли, МухІаммад-устаз дахъал шалубазив гъалавахІ арякъунси, пикрикар адам сайри. Сунела заманала бусурмантала ГІилмурти дяркъес бажардииклири. Иличиб бучІули калунтири ХІурехъивадси машгъурси динна поэт ГІябдуллагъ-хІяжи ва ХІямривадси Зубайру- хІяжи. КІелра илди Сергокъалала районнизибад сабри.

Шайх МухАаммад-устазла урши МухАаммад-хАяжира исламла гИлмуртази дебали мурхьикибси гАялим сайри. Ил Дагъистайзибти ит заманала бегАлара бурибти гАялимтачив учУли калунсири. Ил учУли калун Согъратлила шилизивра. Пур ил Хайдакъла-Табарасанна округла къадили катурсири. МухАаммад-хАяжи жагъли левалли накъшибандила тАрикъатла хАяракатлизи керхурсири ва, гИлмула ил бяхАчибизла теория бяркърли гЕргъи, ХАямривадси устад Зубайру-хАяжила сипталичил шайхла даражаличи ахъуцибсири. Илис пурбанбарибсири муридуну тАрикъатла гИлмуличи бегАбирахъес. Муршидунази накъшибандила тАрикъат руркъяхъес ил Мугривадси шайх Хизри-хАяжини вяхАчаибсири. Сунела замана шайх Хизри-хАяжи Согъратлила шилизивадси машгурси шайх ГАябдуряхАман-хАяжила муридли калунсири ва илини шайх ветаахъурсири.

1927 ибил дуслизив МухАаммад-хАяжи бусурмантала гИлмула хАяракатчи сайлин Совет хАукуматли урчАемал дуслис туснакълизи катурсири. Урегал дусличивра имцАли Архангельскла губернияла мер-мусаличирти Соловецкий лагерътазив калунсири. Пур ил хАеряхъес Астраханьнизи вархьибсири ва илавадра арукъяхъес пурбанбарибхАели, Дагъистайзи чарухъунсири. Амма МухАаммад-хАяжис сунела шилизив вахъАи хАерихъес хАебикиб, сенкАун 1936 ибил дуслизив хАлибаргличил варх ил Къригъизиялизи дураибсири. Сегъуналра гАяйиб агарси адам, батахърли сунела шира шантира, хАлибаргличил Къригъизиялизи дураибсири ва илав вецАну гехАра дус хАерирули калунсири. Сталин вебКили гЕргъи, илисра сунела ватАйзи чарухъяхъес пурбанбарибсири. Ил имкан МухАаммад-хАяжини пайдалабариб ва хАлибаргличил варх Дагъистайзи чарухъун. Къригъизиялизивад чарухъи хАябал баз дикибхАели, ил вебКиб ва сай акАубси шила хАябразив сунела дудешла мякъла хАяриихъиб. Илдала хАябрачи бахъал бусурман адамти зияратли башули саби.

Шайх МухАаммад-хАяжила авал урши лебтири. Илдазибад кАел ЧебяхАси ВатАа дергълизиб алхун. Калунти уршбазивад 1916 ибил дуслизив акАубси МухАаммад-Аминни дудешла санигАят даимбариб. Илала дудешла ит замана дебали давлачебси библиотека лебсири. Дудешра дахъал делчАунси пикрикар гАялим сайри. Амма шайх дураибхАели, илала лерилра жузи кАундацАиб. Илди сунечил дарх касахъес шайхлис пурбанхАебариб. МухАаммад-Аминра илхАейс гАяхАцад гИлму дяркъес валкъаурлири. Камти гАямруличив левалли ил учАяхъес Табасараннизи вархьибсири ва илав мударрис ЯхАя-къадичив калунсири. Урши учАяхъес урхъухАели, дудешли урши махварибсири: «УчАен, дила урши, илхАели хАуни мезра далад гИлмура. Дила хАечи халати къасани лер».

Сунела хала дудешла у бихуси шайх МухАаммад-Амин-хАяжила урши МухАаммад-хАяжини бурули сай: хала дудешли дила дудешлис гър бархАи дурсри кадирхъутири или. Илала хала дудешли ва гАур илизивад бурсивнубси дудешли гър бархАи дугели уки гЕргъи усес кабихъайчи замана накъшибандила тАрикъат руркънилис харжбирусири. Хала дудеш уршилизи гИлмурти руркъяхънилизив узусири Дагъистайзивад дураили гЕргъира. Къригъизиялизив МухАаммад-Амин механизатор ветаур, трактористли ва трактортала бригадалис бекАдеш дирули МТС-лизив узули калунсири. Дагъистайзи чарухъунхАелира МухАаммад-Аминни хАянчи баргиб. Узес ил шилизивад Къаякентла районнизи гечууб. Къаякентлизирад сарри илала

хала нешра, илаб хЕрбирули лебри илала гьамтира. Пенсияличи арукьяйчи колхозлизив трактористли узули калун. Къаякентлизиб илала халкъли халаси хГурмат бирулри. Ил унраличирти районтала халкълира ункъли валулри. Ил исламла гИлмурти дяркъурси ва Накъшибандила тТарикъатла гЯлим сайри, илала муршидла даражара лебри. Жалани акГубти анцГубкуназиб районна шимазибадти адамти челукъути суалти бекДарес икъала барахъес иличи дугъабилзутири. ШаригЯтла тяхЯр-къяйда ункъли далуси, бурес агарли духули вяшикГес балуси адамли илдала суалти ирзутири.

1981 ибил дуслизив МухАаммад-Амин унраличибси Къарабудагъкентла районна Параулла шилизи хЕрирес гечиуб. Ил шила адамти дин бузахъниличи имцАли чекабизниличилра декАрбулхъулри, илаб Накъшибандила тТарикъатличи кабизурти бусурмантира бахъал лебри. Илав ил гьатГира халаси хГурматличил пайдалаирулри. Иличи суалти арзахъес кумекбарахъесра дугъабилзулри бучЕсра башулри. Иличи цархИлти районтазибадра адамти башулри. Илини гымбукГибти адамти даршубирулри, цархИлти челукъути суалти бекДарахъес бусурман адамтас кумекбирулри. Ил дебали гъай бузуси адам ветаур. Илала уршили бурни хЯсибли, илдала юртлизи гЯхЛли хьурахЕбиубси цалра бархИи хЕбири, чумал гЯхЯл бакГибти бурхИни имцАли дири.

1999 ибил дуслу июльла 7-личив Парауллизив МухАаммад-Амин вебГиб. Ил Парауллизив хЯрира вихъиб. ВебГес гъалаб МухАаммад-Аминни сунела урши МухАаммад-хЯжира ва МухАаммад-Мухтар Бабатовра тТарикъатла баркъуди даимбарахъес махбарибтири. МухАаммад-хЯжи мурхъти багъудлумачи вегИубси адам сай. Тарикъатра ункъли балуси сай. Исламла гИлмуртазивра урибси сай.


Ну МухАаммад-хЯжичил къаршиикира ва ихтилатикГули калунра. ЛевГев тамашавиубра илини гЯраб мезли, урус мезли ва Дагъиста миллатунала чумалдегИ мезли умули гъайикГес балниличи. Багъудичевси ва ахъси культурала даражаличи айкибси адам сай ил. Ил Исламла университетлизив белчГудила шайчивси проректорли узули сай. Иличил гъачамалра къаршибикес къадарбиубти адамтани иличила гЯхГти пикруми дурули саби.

Тарикъатла вакилти сабливан хала дудешра, дудешра, уршира селичил декАрбулхъулив? Идеологияла ва баркъудила суалтазиб илди Накъшибандила тТарикъатла дазурбала бухИнаб бузули саби. Илди гЯмруличи духули хЕрбикГути сабри. Амма сегъунти-биалра къанунтачи сукъурли чекабизурти адамти ахГен, илдани бусурман адамтанира светский багъуди касес гЯгГниси биънилизил халбирули саби, декАр-декАрти саниГЯтуни руркъяхъес ва саниГЯт хЯсибли чула хъалибаргунасра жамигЯтлисра чула шайзибад гЯхГдеш биэсли бузахъес адамти жибирули саби. Халкъла хозяйстволис хЯжатти саниГЯтуни дяркъурти адамти агарли жамигЯт гъалабахИ башес хЕбирар или бурули саби илдани. Илдани чула дурхИнасра илдачибад акГубтасра динна багъудира бедлугули саби, амма светский багъуди касахъесра илди бяхИчиули саби. МухАаммад-Амин-хЯжини гИлмурти руркънилизиб бузугала халаси хГурмат бирусири, халкълизил светский багъудлуми кайсахъути хЕдиалри, нушала улкара халкъра ишбархИла даражаличи ахъбиэс бирути ахГенри. Амма ил адамлис рухИла шайчив гъалавахИ вашес багъандан динра хЯжатси биъниличил

чумали вирхусири ва динна гилмуртира гяладяхI дашахъес хIяжатли биъниличила бурсири. Иллини аргъес вируси ахIенри, сен коммунистуни динничира Аллагъличира кършили кабизуртил, илдани дирутазир дахъал гIяхIти шалубира лерри, амма илди динничичи кършили дурабухъни халаси хатIа сабри. МухIаммад-хIяжини бурули сай, сунела дудешла хуулиб радиоприемник бири ва дудеш сагати хабуртачи иштяхIличил лехIихъи или. Тамай цIябти бетаурти, динничичи сукъур шайчиб чекабизурти адамтани ил радиолитчи лехIихъни кябулбурси ахIенри или бурсири. ИшбархIира леб динчибала ургаб светский багъуди кайсахъниличичи вайтIа хIербикути. Илдани баянти тIинтIидирути гIягIниахълуми мучладирули ахIен. Къръан булан багъуди касниличичи кършили ахIен. Адам гуждан бусурман ветаахъес вируси ахIен, диннизичи адам сунела уркIила жи хIясибли левкъуси сай. Гърил адамла ил гъуни сунела бурси саби. Дурхъаси идбагла замана булан исламла дин бузахъутала мякълаб иудейтира христиантира хIербирутири ва илдачи гужзулму дирути ахIенри. ИшбархIи биалли бусурмантала ургаб булан цабехIличичи цабехI кършили бургъути кършибиркули саби. Диннизичи гуж биэс гIягIнисичи ахIен. Динничичи адамти цабехIличичи цабехI гъамбиахъес, уркIиби иргъахъес, даршули хIербирахъес сари жидикIути, цабехIличичил цабехI бургъахъес ахIенну.

Шайх МухIаммад-Амин-хIяжи цархIил динна вакилтачичи вайтIа хIербикиниличичи кършили дураулхъусири. Лебилра адамти ца Аллагъли акIахъубти саби, илдачи идбагунала кумекличил Аллагъли дархъибти сари иудейтала ва христианта динанира. ЖугъутIунира христиантира нушала идбагла заманара бусурмантала мякълаб хIербирутири. ГIярабунала халифатлизиб жугъутIунира христиантира жавабла ва черяхIти кьуллукъуначичи кабалтули калунтири. Илдала хIурмат бурсири.

Шайх МухIаммад-Амин-хIяжини гIяраб мезли делкIунти гъаличир имцIали гилмула хIянчи гIелар датур. Уршили бурни хIясибли, илди адабла, этикала, динна декIар-декIарти масъултас багъишладарибти сари. Илдала ургар илкъяйдали тIарикъатличил дархдасунти суалтала хIекълизирти хIянчурбира лер. ГIяхIсири илди урус мезличичи шурдатес ва дураэс, илдикIун декIар-декIарти динанала ургар гIяхIти бархбасуни кадизахъес икъаладири.



Сайгибат
ГІЯБДУЛКЕРИМОВА



ХЪУМХІЕРТУРИ ХІУ, ГІЯЙШАТ...

(Тазаева ГІяйшат МахІяммадхІяжиевна гъанриркахъули)

(Поэма)

Бурес дигулра хабар
Ца унра рурсичила,
РиштІахІелил рузиван
Наб ахІерсилечила.

Гъанбиркур ца гъаргалар,
Нуша хІязтадиркъули.
ДурхІназирадра, ГІяйшат
Рири декІаррулхъули.

Рири лергІер духуси,
Гъар секІайзир гъаларси.
Я къяна бурхІебури,
Я шилтахъ бирхІебири.

Зизи Султанатла ил
Ургарси рурси сарри
Ази МяхІяммадхІяжи
ХІекъли пергер дудешри.

ПасихІкарти бегІтала
Духути дурхІни алкІни
Лебтас гІячихъси саби
Вавначир вавни дашни.

ЦархІилтачи мешуси,
ХІебири ил хъалибарг

Халкъли мяштІбаресири,
ДурхІнас бедлугуси бяркъ.

Нешлара дудешлара
Гъайличиб чебхІебулхъи.
Шантала ургаб хІурмат,
Чула халаси бири.

Унра бухъна хъиялис,
Гъаман кумекбирахъес.
ХІялалти, саберхурти,
Дигичебти биахъес...

Леб бурули даргала,
Ца ишгъуна бурала:
«МурчІхІели хІебелсунси,
ГалгахІели хІелусад».

Халабиулри рурсби
Гул вавниван жагати,
Хайдакъла тІабигІятван,
РухІлашал сахаватти.

БегІта кайхъибти дурсери,
УркІиличир дяркъурти.
Дубурланна асилдеш
Гъар ганзлизир дагъарти.

Шула кыматуначил
Бучутири лебилра.
Баркьуди гИбратлар
Лебил зилантас чула.

Школа таманбарили,
Ахьиб бузерилизи.
Бузерила гьаркьяна
Сарри бригадализир.

Халаси хИурмат сархиб
Комсомолтала ургаб.
ХИябал дус рузули гИур
Даимбариб белчуди...

Жуз белкес пикри лебри
Дила ГИйшатличила.
Ватаннара халкълара
Сархибсилес баркалла.

Гьанна хабар бурулра
Къакьаси уркИличил.
Гьандуршули дурХядеш
КИантИдикУти нургьбачил.

ВатИайчи бяхИбиубси
Хабарагарси изай,
Къябаиб хИела гИямру,
ГИйшат, рахь жагъли лерай.

Амма, хИуни адамтас
Дарибти гИяхИдешуни,
Кавлан даим мицИрли,
ХИед балгнани дирули.

Тяп регИлара гьамсиван,
Гьанрурушулри ралуга.
ГИядабли саби белкес,
Гьанна агара или...

БегИтазирад букьурли
Даибти асилдешли.
Ахьриубри, хИурматла
Ихьули ахьанайти.

Мурталра гьираличил
Белчудила гьаркьяна.
Някъ гьаббашули бири,
Барх бучутас кумекла.

Рамсурдеш хИебалуси
Бузерила гьаркьяна.
ХИела гьарил ганз бири,
Барх бузутас гИбратла.

Халати жавабкардеш
Дири ВатИанна гьалар.
ЧИумати тИалабкардеш,
Дебш дири хИела жайзир...

Хамдеш гьамХИедарири
Ахьти къуллукьуначир.
Гьарилла уркИ аргьес
Къас бири уркИлизиб.

Кумек гИягИниси мерла
Къалабали риادي.
ГИярга, чулахь, мискиннис
ХИу икьалариради.

Дурули дурес хИейрар,
Лерил хИуни дарибти.
Баркаллагилес я гаплис
АхИенрину дарибти.

Бургьантала нешанас,
ГИязизси рузиванри.
ЦИуръа, ятим биштИатас
РегИла гьамси зизир...

ВатИайс марси патриот,
Дубурлан асил рурси.
Чумла яшав белшуна
ХИела сахаватдешли?

АкИубси шилизира
Рашади хИу зумали.
Шанталара зугИлуми,
ХИелаван чедиули.

Мижитлизира шин киб,
Мякълаб гинизра белшун.
Шантала шинна суал
Асил рурсили арзиб.

Пагъму бири Гяйшатла
Лукъес, уркИи бисесли.
Карзахъили гъарил дев,
Мурхъси мягИна биэсли.

Савгъатунала лугИи
Бурес хейрар ишабра.
Мургъила къалумтазиб
«Леб мургъила чАкара...»

Даршудеш цАкъбикАхъес,
Диги имцАдикАхъес,
Неш ВагИан уркИилабли,
ХИялалли хербиахъес!

Ил жи сабри Гяйшатла
Сунела зилантази.
Сунела баркъудлума
Гибратли глеббуруси.

ГяхИдеш барес гъалакли,
Чуйнара гъанкИ батурри.

Гямрулизиб цайналра,
Рамсурлира хеири.

Ахъри камти ахъбуцес,
ЦАкъ камти дебшлабарес,
АкIубсигъунари ил,
ГяхИбаркълис харжжариэс.

Гямрула ца бархИилра,
ХебуркIуси акъули.
ХIурматла уркъузирад
Сар гъанна херрикIули....

Гяйшат, хелла шилизир
Сари дуцIарти бурхИни.
Амма хелла агрили
УркИи саби буцIули.

Гъамтасван ахерлири,
Шантас ва хIу ралугас.
ХъумхIертести къел-хIерзи
Датурлири наслубас.

Зам-замван саби шантас,
ХIуни белшунси гиниз.
УркИилаб саб гъарилла,
Хелла шаласи сипат.





Тавсултан СЯГИДОВ

ДУНЪЯРА ДИЛА НЕШРА

I

Нусила ва хълтала
Чудни диру нешли наб.
Реторанна поварта
Биралли илди дараб!

СягЯт гьалар лерри ил
Анхълар хълта луцУли.
Тамаша, илцад хъярхъли
Чудни севан дуцУли?

Чуднала кАбатI саби
БерхИли тIембикУли.
Пишряхъили, неш сари:
«Ца халдара!» – рикУли.

Сарира дила мякъла
Тахличи карирули,

ДуцIарти чудни сари
Кункли бутIнаддирули.

Чинаб калуна кърмяв
Хъярхъли хъули чарбиуб,
Нешла мякълаб, тахличиб,
Талхъанван мерлабиуб.

Нешла чудула бутIа
Илис гьала кабихъиб.
Сунела пайра берги,
Ил кър бучIес бехIбихъиб.

Бизитира сарригу
Нешли дарибти чудни!
Илис гурра гяхIдизур
Житали дариб балгни.

2

Къям-кIуцУл дирцили, неш
Дила мякъла карииб.
ВиштIал дурхIялизиван
Ил гъайрикIес рехIрихъиб:

«Чебаа, сагаси ши
Жагъилта саб лушули.
Кам-Камли виадра хIу
Сайри набчи вашули.

Шагъарлизирти гIямру
АхIену хIед детIили?
Лебилра халкъ сен сабил
Сабгу гъанна тIутIули.

Мукъри булан гъанна сар
Шагъуртазир дирули,
Хала бегIтала мез сар
ДурхIнани хъмуртули.

Хъумачи ца хІеризи –
ВацІа сар детаурли!
Сен хІуша дубшутира
Илгъуна мер батурли?

– Агъ, дила неш, дунъяван
Сарра хІехардиубли!
Се гІяхІсил ва се вайсил
АхІенрагу балули...

Шакалра хІедикили,
Дусми сар ардашули.
Дусма цІуба хІяка саб
МуцІурличиб бушули.

Хала дудеш сайригу
Ну жявлил ветаурли:
Уршила урши сай наб
ГІякълумани угъули...

МухІли буртли бясахъи,
ХІела жита чебаа,
ГІурра хІербикІулину,
Се дигулил хъарбаа.

Неш, хІела сурат саби
Гъанна дила уркІилаб,
ГъигъикІули левцадхІи
Кавлуси бургар илаб.

ХІу лерхІелицад тІагІям
Дунъялизиб агара,
Муэрли чераасра,
Нуни байрам бирулра.

ХІябличи вакІибхІели,
Ну хІечил гъайикІулра.
ХІела малхІямси тІама
Нуни илаб иргъулра.

ХІела цІабильклизибад
БяргІиб къямцІа кайсулра,

Иличира хІечиван
ХІулба дугъаилзулра.

Дила неш, нуни дунъя
БиштІал биъни багъурра,
ХІу лерхІели, ил халал
Бирни гъанна аргъира.

ХІела някъла кІантІидеш
Сайра хІясиббирули.
УркІи саби бисули,
ХІела гъайла иргъули.

ХІуни лявдирул чякни
Гъанна нуни далхулра.
БацІ кабухъун азбарлар
Илдицун чедиулра.

Бетахъили агара
ХІела ахІер житара.
ГІямзилаб тІашли саби
Буртли бирицІул пяхъура.

Дургба бицІили бирул
БацІли саби чугара.
БацІкабухъун лебил къятІ,
Алкун улкъай агара.

«Дугила муэр саби», –
РикІади хІу дунъялис.
«Бархъси саби», – вицІулра
ХІуни бурибси гъайлис.

Дуги бариб дяхІили
Ши саб шалабарили.
Марлира, хІу хІерируду
ДяхІи бушкес ракІили?

ХІу рикІуси мурэ саб
Дила хІулбала гъалаб.
ХІу рикІулигъунали ил
ДурхІнала дурхІнас калаб.

ПАЗИЛА ШАРКЪУРА КІАНРАРА

Басня

ГъимбукІибси кІуркІурван
Ремдурли сари Пазі,
ГІярГІяла гидгура ил
Рарили сари рази.

ШагъарлизиркІун илди
Итмадан исули сар,
«Дармандирути сари»
Гидгурас бикІули саб.

Пазила пІаркъубазиб
Ца халаси ГІярГІя леб,
Илала гидгарира,
Марлирагу, хункІцад леб.

Гидгари баркъибмад ил
Ахъли «гуд-гу-дягІ!» бикІар.
Илала вјав-чІяр аргъаб –
Унра виргули вирар:

– Тамаша хІебиалли?
Ца гидгари баркъилри!
Ил пиша гъунарлизи
Сен хІуни халбарилри?!

ХІу балтуси гурдала
Авалра къяш изай дуц!
Пазила юртла-алав
БикІулри къалли хІу дуцІ.

Пазила юртла ГІелаб
Аршила ургуба саб.
БархІехъуназиб илаб
Ца кІанра бучІули саб.

Пазила унра вирар
Иличи лехІихъули,
КІанрала макъам булан
Чугурличиб бирхъули.

ГІярГІяла вјав-чІярличи
Ил кІанра музабухъун.
«МицІирли пяхІлала ил
ЛутІулив?!» – пикрибухъун.

ХІярличи абацІили,
ВјавбикІули ГІярГІя саб:
«Гуд-гу-дягІ! Гуд-гу-дягІ!
Дила халал гъунар саб!»

– Заклизи хІербикІули,
Селичи вјавбикІулри?
ГидгарикІун, баркъили,
ХІуни таманбарилри!

– Сецад халаси лебал
ХІуни ил ца чебаа!
Пазизи иличила
ХІуни хабар бурахъа!

– Гурдас бикилив или,
Ну дуцІли сабаира,
ХІела мехІурти пишна
Ну тамай уркІаира.

ДурхІни чинара хІела?
Наб чедаэс дигулла.
– Дила дурхІни агара!
ХІези бархъли бурулла.

Пазини сар диркъути
Дила лерилра жибхІни!
ТІакъа бицІили, дику:
«Ма хІед ишдира дурхІни!»

Ну гидгура биркъулра,
ГІур ахъли вјавбикІулра!
«ЛихІби изули сари!» –
Вижгурли сай унрара.

– Дила гидгури хІуни
Чедаибти хІедургар.
Лерилра гидгурачир
Чедаэс бируд гавгъар.

«Нуни дарибти сари»
Илдачила хІебикІус.
Севан дашулил дурхІни
Бамсайчи ну хІербикІус!

БархІехъ ца далай белчІес
Ну шурличи абицІус.
Гурда алав агарал
Сахъдеш бирули бирус.

– ХІела Пази агара.
Бура, чили балхулрил?
– Ургубаларти арши,
Баладу, чила сарил?

– Яни арши хІедирар!
Севан яшав бирулри?
Наб цІулкъямлис Пазини
Дирцули сар гидгури.

– ХІу гурдала ишпион
БиъІебиини рахли?

ГІебшни яшав кабирхъис
Ишди къяшма мах-махли.

«Гидгари баркъира!» или,
ХІу ахъли вјавбикІулри.
Пазира рузахъули,
Кеплизиб хІербирулри.

ХІечил хабурта бугъес
Ну ялкъузли ахІенра,
Пукъаларти дурхІначи
Ну гъанна гъалаклира.

Нушаб бурес дигуси
Саби хІера ишгъуна:
«Дунъяличиб бархъдеш гъеч
АхІенгу лебсигъуна:

Ца укули, ужули
Даим сяхІбатличив сай,
ЦархІил пакъир валтули
АхІен бурахъес ца гъай.

Гъар кацІибси ганз булан
ВайтІа саби иргъули,
Хъямчиби саб кеплизиб,
Пакъир левал ургъули.





Ильяс ИДЗИЕВ

ТУМАНАР ДУБУРА

Бурагу дубура хЕд
Сен Туманар бикЉутил,
Илцадра дигиличил
Халкъ хЕчи хЕрбикЉутил?
КЕл унра шила-ургаб
Къарауйчиб тАшлири,
ГЯмрула дарсдешуни
Чумилра чедаири.
Дубурти-ургаб цалра
Агу хЕчи мешуси,
ХЕчи саби БерхИра
БегІ гъалаб абулхъуси.
Чум наслу барсбиуба
ХІу набван дигахъути,
Чум гЯхІладли бакІба
Ну къяйда карцІбиубти?

ВецІну кІира шухІари
ХІуни чинар дагибти,
Хабурта буруливан
ХИла хІуркІба дарибтив?
Дагъистайзи хъямчиби
Гъарали бакІбхЕли,
БикІар илдала хИла
ХІуркІби кадухъунтири.
Ца гЯскал душмантала,
Итил – дубурлантала,
Дяв чебаири хІуни
Шушкнала, ханжултала.
ЧархЕбухъун гЕлабяхІ
Чумра ламартла душман,
МицІирли калунтира
Биубгу хЕкельи пашман.

ДИЛА БИШТІАСИ ВАТІАН

БархЕхъла гъунира,
Шаласи Бацра,
Гъуни къантІбируси
Гъалакси ганзра,
Макъамтазиб дягІла
БучІул вацІара.

Дила биштІал ВатІан,
Лявкъулла хЕчи,
ЛехІзес карцІлира

Дарган гъайличи,
Виасра тядили
ВахъІи хЕчивад,
Муэртазив вашус
Ит дякъличивад.

Чебиис лебилра
Лебти-агарти,
Адамдешла чузир
Нур пархдикЉути.

Мурталра унрубас
ДяхІ-някъ шалати,
Дубурла яхІ-ламус
Чузир калунти.

Бухънаби арбякъун,
ГІямру деркІили,
Багъадуртала у
Нушаб батурли,
Чули дарибтала
Къел-хІерзи лерал,
Ванзали гъаннара
Гъандиркахъули.

ХІябцІали дус ванза
ХІерли сабигу,
Гъуни хъумартурли
Халкъели хІушачи,
ХІерли саби илди
Пенсиябачи,
ДакІибмад дуцІдарес
Базриганти.
Чинара нерх-нусби
Дубурлантала,

Дубурла ванзала
Чузиб тІели лебти?

Чинара маза-мас
Авлахъ бицІибти,
БукІунна хІерлиур
ИмцІадикІути?

Дила биштІаси ВатІан
БелтІунри хІура хъулкна.
Лябкъян бархІи дурдибси
Чула хурумла чакма,
Бузерили гІуррара
Цалабирхъу шантира,
Харабли хІердикІути
Сагадирар шимира,
Даимбиру къялкъяли
Сагализиб далайра,
Имиала къадаван
Важдулхъан маза-масра.
Аршила ругертазиб
Жагъбирар ургубара,
ХІурматагар диубти
Чардулхъан миршра къякъра

ДИЛА ДУБУРЛАНТИ

(Багъишлаби)

ГІямрула ахъанайти
Ахъили ганздикІути
ГІяхІял хъураварили
Дай уркІи гъаргируси,
БархІехъла шадибгъуни
Шадли дурабуркІуси,
Калаби дигуливан
Шинкъя-къаламла хІурхъан

УркІила дигилизив
БерхІиван пархикІуси.
Марти гъалмагъдешлизив
Гъарил бархІи буркІуси,
Уржибси къушумлизив
Далай зайбулхъахъуси
Верхъаби хІебла анхъван
Анхъла талхъан хайдакълан.

Къаркъубачи гъе дегІи
Гъар дус сабухъ бурчуси,
Ахъси даражаличи
Бузери ахъбурцууси,
Ванзала лигІматуна
Базурти дицІахъуси
ГІявали калаб ванза
ГІяра бурцан ахъушан.

БархІи-дуги узули
Хъат някъби делкахъунси,
Янилира дукІ-дураз
Дамсайчи дузахъуси,
ХІурхъила арбягІ базар
ДакІу-гъаргли «бигІунси»
Гъалаухъаби гІурра
ЯхІлизив хІу мулебкІан.

Дубургани айкъурси
Майдай хьураварибси,
Бируси хІянчилизив
Бахълис гъалахъунси
Дубурла гІядатунси
Дарх дихули вашуси,
Дусма деблаварибси
Къада батурил герган.

Дунъяличив машгъурси
Уста хабар халаси,
Мургъи-арцла тІалхІяна
ДелкІи някъиш дируси,
ГІяхІмадха хабуртазив
Чуйнара гъанушибси,
Арцаби гІурра ахъли
Мургъи някъбар гІярбукІан.

БехІ тІулбала устадеш
Жагали гъардакІибси,
Вачар-чакар дузахъес
Багъудила виубси,
Узи-уршила ургав
Уржили валикибси,
УчІаби варачанван
Бухари къапІнар цІудхъран.

ГІянжи ляв-лядарили,
ЦІализи къуздарили
ТІалхІяналис дебш диран,
ХІела гІянжила гажин
Багъур пачани булан,
Дагъистайзив ца хІури
ГІянжи дирцуси Булхъран.


Шамашила тукенти
ЧІянкІила умудиран,
Чархличи далдикибти
АрхІяла палтар диран,
Жагътала, бухънабала
Дуркъа-къяс сагадиран,
Пахру сайри шантала
Палтарла уста Шадлан.

ГІямрулизир яхІ-ламус
Гъаладушили вашан,
Илди камхІедиахъес
Бахълизи гІякълу буран
ГІяхІладли вакІибсила
Вируцад хІурматбиран,
Бахъ камлигу хІугъунти
Ламус халал Цизгъаран.

Азир мазала дурзам
Дубуртачир гІяйдиран,
БалкІа тІерхъара хІура
Муза-къада къяйцІдиран,
ГІяхІялла хІурматбарес
БегІ халал кигъа лугъан
ХІед къар-шин каммадиаб
Диъби дахъал Уркухъан.

ХІу агарси виадри
Батирай се викІиба,
Зайбулхъуси далайлис
Макъам чинаб бургиба?
Вирхаи, дигахъури
Виадлира дурашан,
Тутла галгала душман
Чугурти дирул КІишан.





**МяхИяммад
ТАХСУРМАНОВ**



БАГЪУДЛУМАЛА УРУНЖ

(Очерк)

*«Нуни мурталра игитунази халбирути
саби бузес балути ва бузери дигути адамти».*

(М. Горький)

Гъар бархИи Хъаршарад Хъарша верхИел сягИятра хИябЦали минутличирад, цацахИели дягИван къалабали, цацахИели гИянтИикIа гунзрачил багълали рашули цаургабси ахъдешла, адабчерси, яхИ-сабурла, хИурмат-хатирла хъунул адам чераэс вирар.

– ВелхИунрив, адаузи? Гъунби гИяхИдираб, хИела уркИила мурадуни детааб! АрхИяли Аллагъли арукаби, Аллагъли ара-сагъли кавкаби, хИела мурадуни детааб, адаузи Къади...

– РелхИунрив, неш, къули хИенкълизиди гъунирдалтулрив? БархИехъ ниъли чухдикИули чардиаб...

– Дахъдагъ хъяша, сен жявли айзурсири?! ХИела буруш ванабирули хИевъули! Чи сари гъатИи ил, илцад жявли хИянчила рашуси?

Ил – МикИхИила цахИнабси багъудила урга даражала школала ва ХИямид ХИямидовла училилси МикИхИила гимназияла нешла мезла ва литературала мугИяллим Мажидова Аминат Мужагъидовна сари.

Илкъяйдали, халатала ва биштIатала хИурмат бирули, ванати яхши-хуш дирули, адаб-хИяяличил, иштяхИ-гъираличил, къаршибикибтала гъав ахъбурцули, гъар бархИи гимназиялизиди – багъудлумала гинзи – рашуси хИурматла мугИяллим сари.

Ил акIубси сари 1957 ибил дуслизир Лавашала районна МикИхИила шилизир. МугИяллимла санигИят бегIлара дурхъаси, чебяхИси, хИурматла, дурхИнас багъудлумала дунъя гъаргбируси, багъудлумачи диги адилкъуси, дурхИнас адаб-хИяяла ва рухIлашалси бяркъ бедлугуси санигИят саби, къиянси, амма жавабла.

**Зак-ванзала ургарти
ДурхІнази далахъути,
Нешла мез хІедебкІахъес
ГІямру мяштІхІедирида,
Дурхъати мугІяллимти.**

**МугІяллим ибси дев
Дурхъаси, ахІерси саб:
БерхІигъуна ванаси,
ВерхІел-рангли ухуси,
Дигили ламбикІуси.**

**Багъудила гІинзурби,
ГІилмула мурхъти хъулчни,
РухІ ва адаб-хІаяла
АхІмакъ чІумати гъубзни,
Багъадур мугІялимти.**

МугІяллимла къянси санигІят гъарилличи балхІебиркур ва гъарилли бузахъес хІейрар.

МугІяллимли лергІерал халати къайгъи-хІяракат диру, сунени бучІахъути дурхІни дурхъаси гІямрула гъуйчиб чебхІебалкІахъес, бархъси, сунела гІякълу-дагъриличи мешуси гъуни бузахъес.

**Ва дурхъаси мугІяллим,
Убяхъили къукъара,
ХІед икрамбирула
ХІела адаб-хІаялис,
ДурхІнас лугул багъудилис.**

МугІяллимла бегІлара халаси, дурхъаси, хъумхІертеси бузери саби дурхІнас багъудлумала дунъяла унза къяли-къяйчи гъаргдарили, багъудлумала урхъулизиб дурхІни куртІбирхІяхъуси.

Иличиб халаси ва хІурматла гІур сегъуна баркъуди-гъунар бирусив?!

Аминат Мужагъидовнала бегІти гІядатла адамти сабри, бузери дигути, илала хІурмат бирути, чула къяйчил хІялал залалли хІербирути, шантани халаси хІурмат бирути, жамигІятлис дебали багалабирути.

БегІтани Аминатлизирра риштІали лералли бархъдеш, хІялалдеш, уркІеци-рхІму, бузериличи диги, халатала хІурматбирни, зягІиптас кумекбирни, разидешра децІра дарх дуртІни ва цархІилти гІяхІти къиликъуни адикъур. Аминатра бузерила хІурмат бируси, саремцІурси, азгъиндеш хІедалуси, цархІилтас гІяхІдеш барес хІядурси, яхІ-хІяяла, ламус-хатирла регІ, адабчерсили халараиб.

Журналла бучІанти Аминатла бегІтачилра тянишбарес дигула, сенахІенну илала дудеш – Мажидов Мужагъид шилизив, районнизивцун ахІенну,

Дагъистан Республикализивра хабардерхурси печани диран ва хъулкри мегъли кадурцан уста сайри. Илини мегъли кавцибти хъулкри зубарти-ургаб бацван цархИлтазирадекIардулхъан. МикIхИла шилизиб илини барибси печь агарси юрт мажахIят леббис. Мужагъидли шилизир дахъал хъулчри мегъли кадуциб.

Илдигъунти къел-хIерзи гIелар датур илини. Ил багъандан ил халкъли гъаннара хъумуртули ахIен.

МикIхИла ши халаси сабхIели биэс гъатIи, ил шилизиб гIилмуртала кандидатуну, академикуни, поэтуни, писательти, партийно-советский хIянчизарти, мугIяллимти, тухтурти, мицIираг адилкъанти, бахъал саби. Ил шилизиб хаслира бахъал саби пагъмучебти мугIяллимти. Мисаллис бурасли, 1950-1970 ибти дусмазиб Лавашала, Къакъамахъила, Няскентла, ЭбдалагIяяла, Сулайбакентла, Тагъзиркентла, ДитIуншила, УллугIяяла, Хъарлябхъула, Жангамахъила школабазиб мугIяллимтили ва директортили бузути микIхIенти сабри.

Аминатли МикIхИла урга даражала школа 1976 ибил дуслизиб гIяхIти къматуначил таманбариб. Ил дуслизир Дагъиста пачалихъла университетла филологический факультетла урус мезла – Дагъиста мезанала отделениелизи керхур. ДГУ-лизир ручIухIели, Аминатли бузери-белчIудилизир жигарла бутIакъяндеш дири.

Факультетла преподавательти иличи мурталра дебали разили бири. ДГУ таманбариб 1981 ибил дуслизиб.

– Аминат, сен хIу цархИл институтлизи кахIерерхули, педагогический ВУЗ-лизи карерхурсири?

– РиштIали рирухIели, мугIяллимла санигIятличи дебали хIяздулхъи. Хала нешли дурути халкъла хабурти дигахъира. Дарган мезличи набзир диги акIахъуб дила адани. Илини мурталра «Замана» газета ва «Гъалмагъдеш» журнал къулбасдирули вири. Нуни сагали бакIибси газета ва журнал дучIули рираси. Къяббердниагарли гъаннара къулбасбирулра ва бучIулра. Нешла мезличи диги лерхIели сари нуни дарган мезличила баянти дурчути. Ила кадурхути сари микIхИла фольклор, шила шантачила делкIунти макъалаби, даргала ва Дагъиста поэтунала произведениеби, классла дурар дурадуркIути хIязани, хъарбаркъуни, багъираби, буралаби, дарган мезла мугIяллимтачила баянти ва цархИлти. Багъудила майдайчиб бузери Аминатли МикIхИла урга даражала школализиб бехIбихъиб ва ишбархIиличи бикайчи гъира-иштяхIичил, хIялалдешличил, сабурличил, уркIили чеббикIибси санигIят къацIра шинра къяйда дигули, уркIичерли рузули сари.

Илдани сари ил гъаннара рузахъуси, уркIичерируси, къяяндешунас мукIурхIерикIахъуси. Иличи ургIебли, сабурла микIхIен дебшли ил гъатIира чIумарариб. Дарсла даража, гъарбизуни, илала сабухъчебдеш иличи гъар шайчивад ункъли хIядуриънилизибад, бучIантала уркIази бархъси гъуни баргнилизибад, малхIямти дугъбачил гъайкIнилизибад, дурхIнази дарс анцIхебукъесли бурнилизибад, илдази дарсла материал гIяхIил иргъахънилизибад, методикалалашалти устадеш ахъдикIахънилизибад, санигIятлис мардешличил узнилизибад дигахъу – хIера ишди педагогикали ва методикали мардарибти гъай, белкIани Аминат Мужагъидовани сунела мугIяллимла бузерила хъулчилизи кадихъиб.

Дарсличи хІядуррирухІели, учебникла дурабад, илини МяхІяммадсягІид Мусаевла, А. КъадибяхІяммаевла. А. ГІядбусаламовла, М. Сулайбановла, ГІ. ВяхІидовла Н. Сулайбановла, З. ГІяддуллаевла, Р. МяхІяммадовла, М. БяхІяммадовла жузи делчІи, дурсри сабухъчертили, тамашалатили, анцІхІедукъестили детарахъули сари.

Мажидовани дурхІнас анцІхІедукъести гІядатли хІедиубти дурсрира дирули сари, чузира даргала фольклор, хІязани, буралаби, багъираби, айтуби, сценкаби ва цархІилти тамашала секІал духІнакаибли. Дарган мезла дурсрачи дурхІнала диги акІахъес, илди анцІхІедукъесли детерхахъес, пикрибикІес бурсибиахъес гІядатли хІедиубти, хІязла лишанти пайдаладирули сари.

Масала:

1) Ф – дарган мезла аслу-минала дугъбазиб бирару?
2) Ца шайчибяхІ бузан хІярп бурая?
3) Чиди базлизиб халкъ камли гъайбикІара?
4) Ишди дугъбас синонимти даргая? (гамуш, мекъ, авадан, къаркъала, абдал.

5) Омонимти даргая, (биса, дуги, ита, жявли, лаг).

6) БерхІи ва дуги селичирли тамандирулив?

7) Ванза, се саби илала дайлабси?

8) Жузла бехІбихъудлизиб се леба?

9) Ца девлизирад кІел дев дарая! Гавлаг, – гав, лаг, жикъи, ула, байцІа.

10) УргІерли делчІен: бекІ-хІеб мякъ- къям, бехІ-хІеб къацІ – цІакъ.

– Аминат Мужагъидовна, ишбархІи ну дарсличи хІядуриубли ахІенра.

– Сен, дила урши?

– Дудешли къулала яргала хІенкъличил дуки вархъира.

– Селра хІебирар, дила урши, дудешлара ибси барес гІягІниси саби. Къуласра къуллукъбарес чебси саби. ГІурла дарслис хІядуркайубли вакІи.

– Аминат Мужагъидовна, нуни нукъсанси чебедеб предложение бикІуси дарс белчІунра, амма аргъес хІейубра.

– Гъанна сагаси дарсличи лехІахъи, дурсрала гІергъи кален, хІези иргъахъесну.

– Севан пергер, секъяйда гІяхІсил адам, эгер ил гъарли-марси адам виалли! Педагогла бузерилизир диэс гІягІнити дурхІни бучІахънила устадеш, санигІятлашалси пагъму, опыт, багъудлумала даража лерилра Аминатлизир даари лер.

Гимназияла дирекцияли бурни хІясибли, илала дурсри бучІантала гъира-иштяхІ имцІадикІахъули, анцІхІедукъесли детурхули сари. Илала хІял-тІабигІятлизир гапдарести лишанти сари: дарсличи ункъли хІядуррирни, дарсличиб зегъачебдеш, тІалабкардеш, гъайлис мардеш, кабизалачебдеш, сагакъяндеш.

– Сархибдешличив тІашхІейзурли, гъар мурталра гъалавахІ вашес, сагасилигІив умцІес чебиркур, – рикІи Мажидова. Марлира, ил мурталра умцІлабазир сари. Ил секІал якъинбирули саби илала дарсличи вякъунхІели. Аминатли имцІали бузахъуси методикала тяхІяр саби, гъарил дарсла сагаси тема дарсличиб иргъахъни, дарсличиб тема гІур хъумхІертесли таманни кагахъни, гІур хъайгІиб хІебелчІалра класслизиб дарс буресли. Ил тяхІярли саби илини бучІахъути дурхІнала бажардибиркни ахъси даражаличибси.

«Бегла гяхси нешла мезла мугяллим» сарлин дурхнас лайикти кьматуни кадалта, илди гапбиру, белчудиличи диги аклахести, урклила гьав аклахести гьай, насихятуни дуру.

Аминат дурхнас багьуди бедили паргьатрирули ахенну, илди чедицлахесра халаси кьайгьилизир сари.

РФ-ла цахнабси багьудила хурматла хянчизар сарлин Мажидовани дурхнази мурхьти багьудлума касахьес, илди бяркьличи бикахьес, ламухатирчебтили, сабур, диги, бархьдеш-хялалдеш лертили, хял-тлабигятлизиб малхямтили, урклиби чуматили, гяхгьубнили, гьякьлучебтили, рухлалашал давлачебтили абикьес хяракатлизир сари.

Дурхначи ва сунечи тлалабкарсира сари. Мажидова сагаси ибси аклахьес даимал умцлабазир рирар. «Мугяллимла чебла саби – дурхнас гяхизесли узни, илдала диги, хурмат, бирхауди сархни» (А. С. Макаренко):

Ишди Макаренкола пасихити гьай Аминатлис багьшдарибтигьунти сари.

Сунени бучлахьути дурхнала хял-тлабигят чететаахьили дала Аминатли. Илбагьандан илдачи тлалабунира даимал деклрти дирар.

Дурхначи нешван дигичерси, урклецичерси Мажидова хьарти дурсри дарили паргьатрирули ахен. Белчудилизиб хярхитас, дурсри кьийчил иргьутас чеимцлати дурсри дирули сари.

Гимназияла мугяллимтала диги сархили, дирекцияла игьдибар марбирули рузули сари Аминат.

«Гяхси учитель ветает дигалли, хуни кабирхьуси предмета хуни бучлахьути дурхнира дигахьен. (А. Ключевский).

Ключевский виклуливан, Аминатли сунела предмета чебетаахьили балули сари, нешлис кьайда дурхнира дигахьули сари. Аминатла гьар бархиллати кьиликьуни сари: разидеш, сабур, малхямдеш. Илди лерсила урклира умули бирар, адабра ахьси бирар.

Аминатли сунела бузерилизир азгьиндеш гьачамалра чехедаахьили, жагьилтас гьибратли риесли рузули сари.

Гямру мурхьли дяркьурси, вайра-гяхира далуси, гямрула анцкьи-децл чямдарибси адам сари Аминат. Даргала литературала мез умули дихьес, илди давлачердияхьес, гьаладяхл ардукес, чеункьдиклахьес, микхен дурхни литературный мезли гьайбиклахьес бамсхлебамсурли ва чекабизурли бузули саби Аминат ва илала бархкьяби дарган мезла мугяллимти Арсланбекова Райхянат, Гямарова Патимат, Сулайбанова Нуржагьан.

Гимназиялизиб 2005 ибил дусличибадал дарган мезла ва литературала кабинет леб. Илис бекдеш дирули сари Аминат Мужагьидовнани. Илала кабинетли районнизиб бегла гяхси нешла мезла кабинетла конкурсличиб цаэсил мер буциб, Аминатлис хурматла грамотара бедиб. Нешла мезличи диги аклахьес багьандан жура-журала хьарбаркьуни цаладирхьули сари, абзани дурадуркьули сари. Имцаливан бучлантас дигули саби класс клел бутгаличи бутили дирути абзани. Литературный мез гьаладяхл дашахьес, гьаликли детарули сари халкьла фольклорра литературный кружокра.

Кабинетлизиб «Дарган мез» бикьуси газета леб. Ил гьар базлизиб сагабирули саби. Гьар байрамлис бяхла газета дурайули сари. Литературала дурсрочир кадирхьули сари «Лачин» журналлизирад биштатас хасдарибти хабурти

ва назмурти, «Замана» газетализирад ва «Гьалмагъдеш» журналлизирад гЯхИтигъунти произведениеби, макъалаби.

Аминатли сунела бузерилизир интерактивная доска, компьютер дузахъули сари. Интерактивная доскаличир дурсри дурадуркУли сари.

Аминатли гьар дус къулбасдирули сари ва дучУли сари «Замана» газета, «Гьалмагъдеш», «Лачин» журналти. Газетализи илини дарган мезли макъалаби ва назмурти лукІа. Илини кроссвордуни цаладирхъули сари. Дурхъати ва мурхъти багъудлумала гъели сахаватли релгУли, дурхІнас адаб-хІяяла, адамдешла ва рухІлашала бяркъ бедлугули, дурхІнас сагаси технологияла ишхІелла халати тІалабунала дунъя гьаргбирули, уркІила дигиличил, чедибдешуначил ва сархибдешуначил 41 дус рузули сари Аминат.

Аминатлис сунела санигІят къацІра шинраван дигахъули сари. Ил сабухъчерси, баракатла къалагъуна адам сари, мугІяллимтала коллективличила шанти-жамигІятличил вава-къарван ралги сари.

Сунечи хъарбарибси хІянчи Аминатли уркІила дигиличил биру. Илини бучІахъути дурхІнала хІял-тІабигІят дурсрачир, дурсрала гІергъити баркъудлумазир, бегІтала хъали-хъайгъи рашули руркъули сари.

Культура, багъуди, тарих, мез гъаладяхІ ардукес сунела замана мяштІхІебарили рузули сари Аминат Мужагъидовна.

Илини МикІхІила шила фольклор бурчули сари. ДурхІначил барх ва дурхІнази ил руркъяхъули сари. фольклорла жураби хІябкубти, буралаби, айтуби, хабурти авал бутІаличи дуртУли сари.

Фольклорли бучІантаци гІяхІлашала асарбирули саби. бегІтала, хала бегІтала гІяхІти гІядатуни руркъули сари. Илди гІямрулизир пайдаладирули сари. МикІхІила фольклорла альбом нешла мезла кабинетлизиб бихІули сари.

Дарган мезла дурсрира дарган мезла ва литературала кабинетлизир дурадуркУли сари. Кабинетлизир бяхІлизи черяхІкахъили дахъал чебаъла ваяхІ лер. ЛебгІеб халаси баркаллагичи лайикъси баркъуди саби Аминатли районна ва республикала нешла мезла ва литературала олимпиадабачи 20 дус къяббердагарли дурхІни бикни.

Гурра халаси гъунар саби Аминатли хІядурбарибти дурхІнани 20-ра дус гъаларти мерани дурцни. Сецад яхІ-сабур, черетаибдеш, жавабкардеш, вегІли бируси хІянчиличи диги диэс гІягІнилив адамла? Илди Мажидовала даили имцІарадухъари лер.

Аминат Мужагъидовани бучІахъули калунти дурхІни, чебяхІси даражала багъудира касили, ишбархІи деклар-декларти хІянчурбачиб бузули саби. Илди Аминатлис даим баркаллабикУли саби. Халкълис ва улкалис пайдалабиэсли бузули саби.

Сунени бучІахъути дурхІнани, дурхІнала бегІтани, мугІяллимтала коллективли, гимназияла дирекцияли, шанти-жамигІятли Мажидова Аминат Мужагъидовнала халаси хІурмат бирули саби.

Сунени хІялалси дигиличил, иштяхІ-гъираличил барибси хІянчи чихъли къьматлабариб. Илис «Россияла цахІнабси багъудила хІурматла хІянчизар» у бедиб. «Багъудила отличник» сари. Гимназияла дирекцияли, Лавашала районна багъудила управлениели, ДГУ-ла филологический факультетли хІурматла грамотабачил шабагъатларариб.

– Аминат, илгъуна машгъурси, хІялаласи хІянчилис, бузерилис бучІантани, бегІтани сегъуна хІурмат бирулив, сегъуна кьимат лугулив?

– Нуни бучІахъути дурхІнани, илдала бегІтани, шанги-жамигІятли дила халаси хІурмат биру.

ДурхІна бучІуйхІибад мубаракла, баркалала кагъурти, откриткаби дашахъу, шилизи бакІибхІели школализи бакІили, яхши-хуш диру, чус багъуди беднилис баркалла балахъу, халабархІила байрамлис къабулдарахъес хъайгІи башар, лерилра байрумтачил мубаракрирура.

Чинар къарширикасира бетІтира чула дурхІнас багъуди ва гІяхІси, хІялалси бяркъ бедни багъандан гъар мурталра баркалла бикІар. Наб арадеш, талихІ, гъарбизуни дулга.

Шанти-жамигІятлира селичи гІягІнирикасира, дила мурад биру, баркалла биаб чусну.

Аминатли выбортала, переписьла ва цархІилти баркъудлумазиб, сунела адани къайда, шила администрациялис, жамигІятлис чебетаибси икъала биру.

Мажидова сунечи хъарси хІянчи чебетаахъили бируси, дирекцияла хъарбаркъуни ункъли тамандируси, дурхІнала ва бегІтала баркаллализи рикибси, классла руководитель сари. Районнизиб дураберкІибси классла руководителътала конкурсличиб Аминатли хІябъибил мер буциб (2019 дус) ва «БегІла гІяхІси классрук» бикІуси ХІурматла грамота сархиб. Аминатли сунени бекІдеш дируси класс (5-ибил) 11-ибил класслизи абаахъили сари, 11 класс тамандарахъили, гІилмула урхъулизи гъуниббатурли сари.

Илис сунела предметра дурхІнира дигахъу. Илини нешла мез ва литература гъар шайчирад чедетаахъили далули сари.

Илис бикъридеш дирули сари ишди гІергъи гъандуршути далилтани:

Нешла мезла ва литературала районна ва республикала олимпиадабачир мурталра гъаларти мерани дурцули сари, школала ва районна конкурсуначир, классла ва школала дурад дурадуркІути далдуцуназир гъаларти мерани дурцули сари, илини бучІахъути дурхІни университетунази «4» «5» кьиматуначил кабурхули саби.

Гъар мурталра дурсрачи гІяхІил хІядуррирар, дарган мезла грамматикала чеимцІати методикала пособиебира литературара делчІи. Дурсрачир чебаъла ваяхІ пайдаладиру.

Сунени бучІахъути дурхІнас нешла мезла ва литературала мурхъги багъудлуми дедлугули сари. ДурхІнас гІяхІси бяркъ бедесра гІяхІил бажардириркули сари. Илини бекІдеш дируси нешла мезла кабинетли районна конкурсличиб цаэсил мер буциб.

Сунела багъуди ахъбуцес чекаризурли рузули сари ва цаибил квалификационная категорияла имтихІян чедибдешличил дуциб

Аминатли лицейлизир ва районнизир нешла мезла учительтас гъаргти дурсрира диру.

Мажидова мурталра сагасилигІир умцІуси сагакъянчи сари. Илини дурсри жура-журала тяхІуртачил диру: гІядатлати ахІенти дурсри, дарс – КВН, дарс – жал, дарс – семинар ва цархІилти. Илала бузериличи гимназияла директор И. Д. Дибиров тамай разили сай.

– Аминат Мужагъидовани дигиличил ва чебетаахъили сунечи хъарси хІянчи биру, се хъарбаралра ил барес хІядурли рирар.

Классла руководитель сарлин дурхІначил ва илдала бегІтачил дахъал хІянчи диру. БегІтала хъали-хъайгІи рашар, илдачил педагогикала темабала ихтилатуни диру. БегІти школализи тІалаббину. Заманаличир классла бегІтала собраниеби диру.

ДурхІнала хІялани, хасиятуни чедетаахъили дала.

Дарсличир сунела предметличи диги алкІахъути устадеш лер илала.

ДурхІнас мурхъти багъудлума дедлугули сари. Илала выпускникуни гъар дус ВУЗ-анази кабурули саби. Илди бучІули саби Москвализиб, Астраханьнизиб, Ставропольлизиб.

Нешла мезла учительтала дурсрачи рашар ва илдас теориялашал ва методикалашал кумекбину.

Пергер тІабиГІятла ва малхІямси адам сари Аминат. «Классла дурхІнала неш» сари ил.

Аминат къайгъичерси, черетаибси, тІалабкарси сари, бархъдешла гъуйчир рузуси, дурхІнас бархъси кымат бедлугуси мугІяллим ва классла руководитель сари.

Илини дурхІнас адаб-хІяяла, адуцала-бяркъ бедлугули сари, дурхІни хІурмат-хатир бирутили, инсап лертили руркъули сари. Илдани рухІлашалси бяркъ гъатІира ахъбурцули саби.


МяхІяммадрасулова Разият, бегІтала коллективла руководитель.

Медальтачибра, грамотабачибра, дипломтачибра, гимназияла дирекцияли, бучІахъути дурхІнани, илдала бегІтани, шанти-жамигІятли бедибси кымат гъатІиралра дурхъаси саби, чебяхІси саби.

Гъаннала гІергъира дурхІнас мурхъти багъудлумира, кагибси бяркъра дедлугахъес хІед арадешра, савлила нурли ухуси талихІра, гІямрулизир гъарбизунира, хІулбукІрира, разити, аваданти, нурли ухути духъянти гІямрура дулгулра!

**Игъбар, талихІ, арадеш
ХІу-алав каммадиаб,
Анкъи адаб-хІяяла
ХІела даимал ухаб.
ХІу-алав мажлислизир
АхъдикІаб хІурмат-хатир.
Аминат, дерхъаб хІела гІямру!**





**Гяйша
КЪУРБАНОВА**



БУРГЪАБ, АМИНАТ, ХИЕЛА ПАГЪМУ

Нешла мез калахъес, илди гъаладяхІ дашахъес багъандан лергІер къайгъилизи рикибси пагъмучерси даргала поэт Аминат Гябдулманапова, ил мурадличил чумра районнизи, чумра шилизи раибси сари. Шагъарла школабазир детурхути дарган мезлис багъишладарибти далдуцуни Аминат Гябдулманапова агарли дурахІедуркІу аллира къяна бетхІерар. СенахІенну дурхІназир нешла мезличи диги адилкънилис хасдарибти конференциябачир, конкурсуначир, вечертачир ил камхІерирар. Гъарил инсайс вегІла мез дурхъати ва ахІерти диъниличила, илди мезли лукІуси адамла гъар чинабалра хІурмат ахъли биъниличила, чеалкІути наслубазир дарган мезличи диги адикъес гІягІнили биъниличила, илгъуна хІянчи барес багъандан «Лачин» журналла имканти лерниличила гъаман гъайрикІар.

Дахадаевла районна Хъярбукла шилизир 1946 ибил дуслизир акІубси Аминатли миллатла рухІла давлаличил чумра дарганна уркІи разибариб, сенахІенну илини сари акІубси шила школализир, Дагъиста пединститутла физико-математический факультетлизир, Москвализисси М. Горкийла уличилси Литературный институтлизир ручІухІеллил уркІигъаргти, адамтачи дигичерти назмуртачил девла устнала ва бучІантала пикри сунечи битІакІиб.

Тухтурли рузули калунси, амма сунела агри жявли дурхІнази багъахъес чебуркъибси нешлис, мегъла устала хІянчи асилдешличил бируси дудешлис Аминатли дигили дицІибти назмула чумра тугъ багъишладариб. Авлахъла хІянчилизиwad акъуухъунхІели, миршби, къялкъни дируси дудешлис пушни пушдарес кумекбируси, иличил парх авлахъла хІянчиличи рашуси Аминатла тІабигІятла жагати суратуни назмула агиличил зайдикІахъес пагъ жявли дакІубухъун. ХІера, се рикІулил ил «ХІеб» бикІуси назмулизир.

ХІЕБ

**ХІебли хІулрукІахъили,
Гъаргала карицІулра,
ХІерсиван чучи дунъя,
Назмуртани лукІулра.**

**Забра къутдикІули сар
ХІебла гъели делгІули.**

**Шиниша къалумта сар
Авлахъуни рурхъули.**


**ХІебла гІяхІял чатІара
Саб далуйта бучІули,
Къалам касадли, дугъби
Нуни дурис бикІули.**

Художественная литератураличи карцси поэтла назмурти районна ва республикала газетабазир, «Гьалмагъдеш», «Лачин» журналтазир чуйнара дурадухун.

Даргантас тяништи сари илала «АхIерти адамти», «Неш хъайГирхIели», «Унеу», «Хъярбук», «Поэт» бикIути ва дахъал цархIилти жузи.

Гъанна ил «Лачин» журналла редактор сари. ДурхIнас хасбарибси журнал жагасили бетаахъес къайгъичерси Аминатла гIяхIдешли ил белчIес иштядухъеси бетаурли саби.

Халкъани-ургарти, Лебилроссияла ва Дагъистан Республикала конкурсуначир чуйнара чедибдеш сархибси хIед, Аминат, арадешра, разидешра, талихIра дулгулра! Тяп лерсиван адамтас уркIи гъаргли, хIела пасихIси пагъму гъатIира мурхъра бягIура бикIули, хIерриаби хIу



Байгинат
КЪУРБАНОВА



МАДИРХЫД БИКІИ НАБЗИ

Агъ, дигай, хІял буцІарти,
Гергъи аркути хапли,
УркІби далхІедикалли,
Дурцути декІси децІли.

Дихъирагу нунира –
Чисалра гъанарти,
Жал ирзули бамсурти
Къагъдешли буцахъибти.

Чум ардякъуна гъатІи
ГъанкІагар бархІи-дуги,
КъацІла ихтияр булан
Чебашута буцибти...?

Дихъибти пашманбирар,
ХІедихъибти къясбирар,

«Мадирхъид, – бикІи набзи, –
ГІяхІси букен ва русен...»

БикІутачи рирхишав?
ХІу викІуси баришав?
ХІейгиварибти гъайли
ВайтІа децІагахъишав?

Се балбуцалли гІяхІсил
Дила уркІили бала,
Виэс хІейрар духуси
«УрхІ бикІута виркъуси...»

Агъ, дигай, хІял буцІарти,
Гергъи аркути кункли,
Гъардизаб гъарил инса
ДицІибти муридешли.

КЪИСМАТРА КЪАЦІРА

Гелаб балталли дунъя,
Адамли мурталралис,
Гелар зукъити нургъби
КертІу, гъунивалтули...

«Чина архулав» викІес
ГъайхІебикІар мухІлира,
Геларадли хІердикІес
ГъаргХІедирар хІулбира.

Хъумарталли бетарар
ГІяжаиб бархъагардеш,
ДацІ някъби гъакІдирули
ГІямру дугІли дуркІнира.

Лебдеш тІалаббинури
ЦархІилти бузухІели,
ХъайгІиб селра агарси
Ил сай жявлил вебкІибси.

Къисмат бегІла къутІкъуси –
КъацІ каберхурси бархІи,
ДацІти някъби духили –
Аллагъличи аркъуси.

Агарану чархлизиб
Никала хъарцад гІяйиб,

Жан айсул ряхІмула вегІ
ХІеръа, бара уркІеци.

АкІубрану ца хІела
Кумекличирли чихъси,
Сукъур балагълизибад
Берцахъа наб гІязизти.

ЧЕРИУЛРИ НУНИ

Урши
Дирихъван кабилхъули
Агри хІу чераибла,
УмцІулра раргес къасли,
ХІу чинар лерри вара?

Рурси
ХІед гъундури гІяхІдираб,
Къадарси цугрикили...!
ГІяйиблизи руцили,
Игмайгид вавни чІянкІли.

Урши
Лер дила уркІилизир
Марти дигай ца хІедцун,
Гъалакли къутІбикІар ил
Даахъес ца хІечицун.

Рурси
СирхІязибад ХІябшима
АхІен гъуни гІеркъаси,
Се кІеба ватихъадли
Дигадли каэс набчи?..

Урши
Чериулри хІу нуни
Дурхъали мургъиличир!
Багъа ахъцун бикІуси
Гъар алхІят базарличиб.

ЦахІнаб
Къисмат хІебуунхІели
Гъарбизлизи буйгІули,
ХІеркадирулра нуша
ТалихІлис гапдикІули.

* * *

Абулхъул берхІилис гъунириули
Карилзули рирус ну къиблаличи,
ДехІибала ахІи, давла, сейкІадра,
АрхІеху вебкІалли, вирхаи набчи.

ЦархІилтани чарх-бекІ, палтар чегъурли,
ЖагабирухІели урхІ хІяйранбарес,
Аргъала, уркІи-хІял, вари, дарсмайрид
УркІила ухІнав хІу вии умули.

КъияндикибхІели мякълав агарси
ГІягІнилив виубли хІед гІяхІилхІели..?
Сунела саркъира, цархІил умцІуси
Виубли сейрусив мурул лев или?

ТІАШЛИРА...

Араціра зярхіси, аязси бархіи
Цай кьяшмачил шила ахѣти шурмачи,
ПарчбикІулри урунж дарма шарабла,
АхІебиркул цархіил умудешличи...

Дубурла бяхІлизиб биризла ваціа
Ціуэри иргѣули хІеркабикІулри,
Ахьдурцули гІилму марти дигайла,
Ахьлир кІайдяхІилри хІер бугал чІакни.

Мирхьира дузулри, варѣа бурчули,
ЧатІнира дучІулри, пукьни лушули.
Сабаили сягІят уркіби атІунси
Ясирбуцилри ши сяхІбатунани.

Нушала дигайла бемжурси ціала,
Балгунси анкѣилаб шангван рурхьѣти,
Чебиркур дурхьаси, хатІа агарли
Дукес ахьдешличи талихІ бабгибси.

Тіашлира шурмачир, хІегІир умціули,
ХІуни гибти дабри някьла дуцили...
Ургулри урунжла мякьлав хІу хІерли,
ХІела хІерлизир ну риціулра хІекьли...

ДуцідикІаб дубурла хІуркіби умути
Урхьнази карціайла рамч хІебилшѣти,
ИштяхІ имціабикІаб гьарил бархіила,
ХІечилщун ахьахьес милги гІямрула.

Кадирулра кІелра аязси бархіи
Шурмала ургабси гІинизла мякьла,
Дигай миціирдарес хІулбала лямціли
Итира игукьѣи, абикьурли ціа.

ШИЛИЗИБ МЕКЪ

Савгъат гьанни мекьличиб
Бирар гьуни бурцули,
ГІядатуни минала
Даимдарес бузули.

ХІурмат барес дигули,
АркухІели цікуруи,
Шила шанта, жагьилта
Разидеш балахьѣули.

Дерхъаб ая, дукена!
Далай ая, дулхъена!
Анкъурбазиб баракат
Имџабикџаб дикџена!

Датдухъи шадлихъличир,
Дарая делхъ дамсайчи!
Иштяхџла – хџушалайчир,
Хџедирарну, дарганти!

Мекъ дигахъисра набра
Цугси, хасси лебтачи.

Авид батси, гъарзаси,
Чи укъялра иличи.

Уркџазир жагъилтала
Алкџаб диги умутла,
Берхџиван ламдикџули
Хџяланазир умути.

Дигахъис, бакџибтала
Хџулбазир нур улкуси,
Гъарбиз булгули кџилис
Кџел уркџи цадируси.

БАЛУСИРИ НУНИ

Чуйнара, разили, талихџ булгули
Умубарра гъуни – набчи левкуси,
Дугелира хџулби паргъатхџейрули,
Дигули вакџили, гъала рашуси.

Чина викибара, гъайбикџар уркџи,
Сабурла ункъси хџял къакъабакџили.
Яра хџед маллани, сунес къабулси,
Раргибу гелешмеш субхџян бузуси.

Дарсдиуб пикруми, дигайла шала
Уркџила хџулбани хџисаб касибла.
Лагъбикџар хџечила хъуланала ца,
Ванадеш бихули чиллализибра.

Дягџ хъурабиралли, хџебла тџабигџят
Булъан берхџилиуб камси ургайчиб,
Ишди гџямрулара кахџевлан тџягџям,
Хџела у дилайчил цахџебиалли.

Диннизиб умудеш саб бегџ гъалабси,
Бархърахџебалтехџе, кункси умџули,
Хџу берхџира кили, ваши ца набчи
Дигай алкун хџулби цџябхџедарили.

Дашули ихъехџе гъуни гъарахъси.
Гушлира хџейкџехџе, дигай лералли.
Улкехџе зубарти ахълар зубрала,
Уркџи бучџухџели, дучџаб чатџира.

Балусири нуни хІу сархес рирни,
Хабарлизиртицад дигай хІедирни.
БурхІназиб гІямрула дурхъаси байрам
Бетарни ца бархІи – хІура чарулхъни.

Ну хІела цақълира қьибламалира
Ретарусра, ахІер, мицірли лерай.
ГІяхІси даражара, ахъси қьиматра
ХІейрарну адамла лайикъдеш агнар.

МАР ДИГАЙ ЛЕРСИЛА

Дебарарили хъайгІир
Адамван дагъри камси,
Қьасмабиридра руцес
ТанбихІлизи буцаарси.

Жагъдешла цІала лами
Гъачамлис хІебишунну,
ХІебирарну қъяббердес
Чи мар дигай лерсила.

Булбулти хІедучІарну,
УркІи батхІебухъалли,
Дигайла, дард билтІули,
Гушдешлизи дуцалли.

ҚьардхІелхъан қъяшла гунзри
Карцайли лагъдарибти,

Ихъуцад гІямрула дякь
ХІялла ца цақъбирути.

Ахъруцаба някьбачи,
Лагъни алав урцахъес.
Қьисматла дяхІимцІала
ЯхІбара хІебамкъахъес.

КІилалра хІулбала хІер
АтІунси нурла берхІи,
Хъурабарес нушачи
Гъаргдара улқъай қъапІти.

Дигай, чум дус ардукъялра
Мурталралис умули,
Мурхъси хІябла кайхъалра,
Кавлутину мицірли.

ҚЬУДҚЬУМАЙРИД

Варъала бурхІнину, хІу қьудкъумайруд,
Мирхъи вавначиван, урцен гъардаим,
БерхІи булхъуцадхІи, дяхІ хІед шалали
Рирусну малхІямли гъунириули.

Варъала бурхІнину, набчи хІеризи,
Даимлис муридеш бутГес валкъаи.
Дигай, нуша кІила гІямру аркъуцад.
Дукес талихІличи хъя бара набчил.

Вари, дила шалай, хІу қьудкъумайруд,
Қьадардариб дусми дара жагацун.
ШягІирти лукІахъес бамсхІебамсурли,
Дихъа дигай набчи лятІнатхІеэсти.

ГІЯМРУЛА АХЪДЕШЛИЧИ

Алки лерилра шалми
дила шанда айгъирла,
Дубурла гъуникадли
Ну хъули гъалаклира.

Разидешли, хІяйкатли
УркІи саби бицІили,
Мякълар дигай лерхІели,
Вай пикруми дицІули.

Машиналар хІечилра
Сагъдирули дяхъурби,
Дигай дихІубли рухІла,
Цакъдирули дуклуми.

Зак даршал дигІяндешла
Алки саб зубартани.
ИмцІадирули сари,
Нушаб шалал къасани.

БуцІар цІали алкунти
Дугъбани дирцІулира.
ГІямрула ахъдешличи
АдацІес някъ бурцІула.

Адалкунти шалмачил
Гъуни ахъиб машина
ТІашиулра хъа гъала
ЦІа алкунси анкъила.

ЧЕБАРГЪЕС УРКІИ

БерхІи гІелабикиб
Дубуртачибад
Ца бархІила хъарси
Гъуни ахъили.

Калунрагу нура
РакІес дигули,
Амма хІералтулра,
УркІи бургъули.

Къуймур цІяб дугила
Бац дакІубиуб,
Чили саррил илис
Зубарти алкун.

Дахъдаиб пикруми
Дила бекІлизир,

ХІературра илда
Русахъес бекІлил.

Жаваб гъеч агара
Дила суалтас,
ХІейрудра, ахІерси,
Кумек – гІянд арзес.

Шаладикиб, дариб
Кам-гъамти забра,
Агарси чебиънаб,
Бегъуб зурхІябра.

Белики, чебаргъес
ХІелара уркІи,
Исбагъи рурсила
Дагъурли къайгъни.

ЧЕХІЕБИИДРА ГІЯХІДЕШ

Дуклар дихІяхъес дигай
Ца шайчи лайхІекІили,
Нешагар мукъарлисван,
Саби хъули буцибси.

ШивкІиврикІира гІяшли,
ЦІуэриван чейгули,
ХІечи ГІяшикъти хІулбас
Паргъатдеш хІебиули,

Даргира кьалли дигай
Хабуртазир агарти,
Илдала мягІна бурес
Дугьбазиб цІакь агарти.

УркІилизи дакІили,
Бурбуниван алІули,
Буйрухъцун рикІахъули
ДецІ гІурра цІакьбирути.

Загъру зумабарили,
ГІямру дигуси уркІи

Хебелкъахъи шадешли,
ЦІяб хІяри арбухести,

Набчи чуйналра игъбар
Ца гъамалра хІебиуб,
Тяй урчили лутІиван
ЛайракІирану хІуни.

Агъ, хІела багъа буъла
ТалихІ буунси хъанцІ бецІ,
Багъи, багъи, чехІебиид
ТалихІ, наб батурли децІ.





МахИяммад КЪАРАТОВ

БАХЪБИКИАБ, СЕРГО , ХІЕЗИБ

Дунъялис машгъурдиуб
Хіела гъабзадеш,
ДяхІ-дяхІли хІерикІули
Душмайс мутИгІхІекІури.

Балукъира вайгъубзна
ГІямру къябиъни хіела.
ДехІсурхІерри дяхІла ранг,
Тилади хІевхъунри хІу.

Агъ гъабза, сегъунти бегІта
ГІяхІгъубзна айкъурсири,

Шандайчирра чІумати
Адамдеш гили хіези?

Сецад чІумал биалра
Шанда гъабзадеш хіела,
Даршнади чІумали сар
Хіела гъабзадеш ишар.

Машгъурбарри дунъялис
Хіела ши Сергокъала,
ГІурра машгъурдарри
Лебил Дарга-Дагъистан.

ДЕГЪСИ ВАНЗА БЕЛКЪАХЪУН

Чихъ зубри сар «дисули»,
Бахъ вайтІа дегъбнубси,
Берубли вай хІяйчибси
Ванзалис заб дурхъули.
РяхІматли белкъи, ванза
Хіекъли саби хІулкІули,
Заклизи хІербикІули,
Илис икрамбикІули.
БерхІила буцІардешли
Язихъбариб тІабиГІят
Сабигу чебиргъули,

Марка дарили гІергъи.
Зак ургъи дуги-хІери
ДахъхІи хІедариб забли,
Къиркъирдеш хІедарили,
Белкъен, ванза, хІу или.
Заблис гІергъила бархІи
Абухъун ванал БерхІи.
РяхІматличил ванзалис
Ванадешри гІягІниси.
Сабригу хІяйбатурли
БуцІардешли инжитси.

СЕН?

Разидешуни камли,
Сен дахьалу шишимти,
Илцадра дахьал илди
Пикридарибтив чили?

ТалихІла бурхІни камли
АнцІкьира сен дахьалу,
Сен агартив мурталра
Разидешра талихІра?

Иш шалал дуньяличир
ГІямру гили сар камти.
Илцадра камти илди
Сен бахьлис анцІдукьунтив?

Иш дуньяла кьакьличир
Демжурли дургьби сартив?
БиштІати дурхІни булан
Кьурбунти бетарутив?

ЦабехІти белкьунхІели,
Бахьалгьунти сен гуштив?
Иш халал Дуньяличир
Сен ризкьи хІедиутив?

Иш жагал дуньяличир
ХІеделгІули дургьбала,
ДелгІалри ризкьила гье,
Детихьутири гаши.

ВИРХІЕЙРУС ИЛ ХЪУМАРТЕС

Ургубалаб бухьуси
ХІунтІена жанай вава,
Авлахьла вавни ургаб
БегІла жагал хІури наб.

Илцад жагасихІели
Бургуд хІу гІямру кьантІа,
БекІбнубхІейс бикьурли,
ПяхІбируси кІапІрала.

Дила жагь гІямрулизир
Кьарширикибгу набчил
Вава хІечирра жагал
Дубурлан дарган кьуймур.

Разилири, хІулкІулри
Илис гІяхІизниличи,
Гьаб-уб чебаиб рурсби
Хьумартахьур лебилра.

Аммаки, жанай вава,
Марти дигай нушала

Урдухьунгу дахь кьантІти,
Ил хІела гІямру кьяйда.

Итцад сари дигул ну
Ватурли аррякьунгу,
АхІерси итцад дигул
Мерла чилра чархІелхьул.

ГІурра гІяхІси, жагаси
Кьадарриуб наб рурси,
Амма цаибти дигай
ХІейрулрагу хьумартес.

Ца сурат саби лебси
Илала наб калунси,
ДяхІла жагал сипатра
БекІлилра хьумхІертуси.

Итала гІергьи гІурра
Ардякьун шуцІали дус,
ГІурра сецад каласра
Ил хьумартес вирхІейрус.

ДУНЪЯ САБИ ХІЯРАМЛИ

ЦабехІти хІербирули,
Халал хІянчи бирули.
СецадхІи бузаллира
Яшав ункъхІебирули.
Хъулкнира хъямчибира
Саби хІекъли батбухъи.
Илди сели биркъалра
ХІебалтуси агара.
ХІукуматла хІякимти
Сабира хъулкни саби.
Хъулкни хъулки хІерцини
Якъинси секІал саби.
Къиянна халкъ илдази
Мабирахъид инжитра.
ЦацабехІти буцили
Туснакъла кабалтули,
ДигІунти арц дедили,
Саби дуракайули.
– Иш дунъяличиб бархъдеш

МурткІал биубси ахІен.
ЧинкІиртани булан ил
Бурули саби къалли,
Ил се гІяламат сабив?
Ил балуси левсира?
Дунъяличиб ил хатІа
Гъарбарес хІейрусира?
Хъулки чихъли чейули,
Хъямчи сай хІурматчевли,
ХІялалсира вархъсира
Абдайзи сай уйгІули.
Бархъдеш лебси, азадси
Агарсира гІур Дунъя?
УбяхІси дунъяличир
ГІямру аниддукъи сари,
ИкІ нушала БерхІили
Ванабирул гІяршлизиб
Илгъуна агарли саб.
Чинабалра лебара?

КАММАЙАБ...

Адамла уркІилизир
Пикруми дахъал сари.
Илди лер гІяхІгачила,
Илкъяйда вайгачила.
Илцад биштІал илизир
КІел журала илдани
Сегъуна мер бурцулив
Секъяйда кадурцулив?
Илди илар, уркІилар,
ДекІхІедикІни ца мадар.
Илди декІти диалри,
УркІили яхІ хІебири.
Амма вайти пикрума
УркІи разихІебиру,
Арадешра булъахъу,
Чархра вайтІа биркахъу.

Сен хІейрутира гъатІи,
Дагъри лерти инсанти,
Далгунни хІерра диэс,
УряхІдешуна хІейрес?
Сай алавти биргІнира,
Илдачи къячикІнира
УвахІсила пишни сар.
Ил бахъли балуси саб,
ХІебалас саб убяхІга
Саби чузи буйгІулил,
Нуни къалли буйгІулла
УбяхІти хІяжуртази.
ХІярамтани букутас,
Аллагъ, биренгу танбихІ.
ХІярамта укусила
Варглар чяр-гъяр каммайаб!

НАБ ДИГУЛРА

Дила уркіла пикри
Даим сунезиб лебси.
Дигулира наб бурес,
Юлдашуни, хІушази.
Наб хІекъли дигулира
Ну алав юлдашуни
Биубли хІялал гъубзни,
ХІярамдеш хІедалути.
Гуррара дигахъаси
Ил хІушала дурхІнира
Биубли хІушагъунти,
Гъубзни сабли хІялалти.

Наб гуррара дигулра,
Ил хІушаб савгъатбарес
БекІла чедиб амъур зак,
Къяшмауб даршул ванза.
Гуррара дигахъаси
ХІушала азбарлизи
Гъубзницун абицІули.
Шадлихъуна диркъули,
Даршулира шадлира
Калабая мурталра,
ХІушаб гиб гІямрула пай
Дигуливан буркІули!

ДИГАЙРА ДИГИРА

ГІямрулизир дигайра
Илдачил дарх дигира
Диубли гІергъи далги,
ГІямрура дирар далги.

Илди кІелра далгунни
Диалли гІямрулизир,
Хъалибаргла гІямрура
Дирар къалли далгунти.

Дигули карибси
Уррухъалли рахъ къяркъси,
ВеГІ викІул хІерикІалли,
ГІямру дирар дуунни.

Дигай сари викІули,
Диуб дилара илди.

Дигулли уркіи хІергъиб,
ГІямрура заядиуб.

Илгъуна анцІбукълизир
ГІямру зайти дирар.
Уркіи хІергъуси рархкъя
ХІериубли гъалар сар.

Гъарилла гІямрулизир
Дигайра диаб марти,
Гъарил хъалибарглизир
Диги диаб чІумати.

Лебилра дунъяличир
Диалри дигай, диги,
Иш гъаннаван бижгурли
ХІебишигу дунъя...

АГАРА ГАПБАРЕСИ

Агъ, гъундури, гъундури,
ХІябра дахъал ахъира.
Ахъира хІуша нуни
Дархътира далкІунтира.
Хан гъундури ахъира,
Машинтачи айрули.

Къяшла дукъби ахъира
Дила къяшмара кункли.
Я дархътани хІевкира,
ХІевкира далкІабара
ТалихІ, бархъдеш лебихІи.
Се гІяламат сабира?

Чумра гъунчивад вякьи
ХЕбаргирагу бархъдеш,
Бархъдешличи аркъуси
Марли агарсив цалра?
ДавлаличивяхІ вархъли
Аркъуси гъунилигІив
Нура умцІерхІевхъунра,
Ну хІялалли калунра,
Калунра мискиннира.
Ил гъуни чеббикІили,
Ну пашманра хІейубра.
Амма левси уршилис
ХІейубра юрт тІашбатес,
ВиъХІейубрагу илис
«Мегъла дягара» асес.
Илгъуна агиличив
Ца ну ахІенра къалли.
Язихъли хІербирути
Бахъал саб дунъяличиб.
Дунъяла гъарил инсайс

Сен талихІ хІелугусив?
ЦабехІти белкъунхІели,
Бахъалгъунти сен гуштив?
Бархъдеш агарси дунъя,
Сен илцад убяхІсирив?
ХІезиб бархъдеш биалри,
ТалихІли бурги бахъал.
Чина дикибти вара
Гъаннала адамтала
Умути яхІ-намусра
Дахъ чихъти адамдешра?
Се леба, Дунъя, хІезиб
ХІу гапбареси секІал?
Сецад пикриикІасра
ХІебалулра илгъуна.
Дунъяла леб гапбареси,
ТабигІятцун саб лебси,
Панабирули саби
Бахъбаиб хІехараба.

ДЕТХІЕРХЕСТИ ПИКРУМИ

Зубарти, дигахъира
ХІушачи шадив вашес.
ГІяршла ахъдешлизивад
Дунъяличи хІерикІес.

Илавад виишигу
Лебил Дунъя чебаэс,
Дунъяла шикъатІала
Вииши тамай дагъес.

Дунъяла чиди мерлаб
Халкъ севан хІербирулил,
Саби ургаб балгунти
Ва ургала бижгурти.

Чебаиши бяргІибти,
Илкъяйда саби гушти,
ТалихІли хІебаргибти,
ГІямру гъархІедизурти.

Нагагъ ахъри биалри,
Иладли лебтасалра

Бурхъасигу талихІра
Илкъяйда балгундешра.

Дигахъис лебтасалра
Шала ва ванавикІес.
Илди саригу дила
БекІ бицІибти пикруми.

Балулрагу, зубарти,
ХІушачи аэс хІейрни.
ХІуша къяйда дунъялис
ХІейрнира цІилцІиликІес.

Ге, балулра, пикруми
ГъархІедизести сари.
Илди саригу дила
УркІилис гъандиркути.

ГъархІейзести диалра,
Лерил пикруми дила,
Аммаки наб дигулра
Дунъя даршули кали.

Гябдуселим Исмягиловлис - 75 дус

Дагъиста халкъла писатель
Гябдуселим ИСМЯГИЛОВ



Хабурти

КАНИЛА ИЗАЛА

Сунес ярга сабаибси рабза ва декIси хъунул адам бара унзализи рацхIерикили тухтурличи арацIиб. Халаси къияйчил ил кариибси мерличи раиб.

– Ада! ХIу саррив, гъари, уркIрухъи хIерризур тухтур.

– Марли хIералулрав?

– Чераибмад рагъесли ахIенри. Се бетаурли хIед? Дебали рарсриублиригу.

– Ну дебали декIриублира, дила рузи Нурият. Къяшма хIилхIи рихулла.

– Чум килоличи абиркулив хIела битIакI?

– Дахъал килоби лер, жан Нурият. Илди хIедуралра чебаэсли саби. Селис гIягIнилив дурес?

– Русни-рукни сегъунав хIела?

– Русра русулла, рукесра рирулла.

– ХIед мурталра сагъли рукес дигахъади. ИмцIаси беркалара диргалабулхъули бирар.

– Ну дахъал дукни багъандан цIерхъриубсира или гъанбиркулив хIед?

– Берклума хIериадли, гIур се сабаб биэса? ХIу зягIиприкилрив?

– ЗягIиплира ахIенра, жан рузи. Давлениера лебсигъуна саби. Къяшми изули, ахъдирули ахIен.

– УркIи севана хIела?

– Хебалас, гъигърикIес декIли саби.

– Гъари, гъамрии, ахтардибирехIе.

Карикесила урехили, Адани сари кариибси ута гъяж-гъяжбариб, сенкIун хъулибси утара бячунсирину.

– Рузули рургуд, Ада?

– ХIерузули гIямаб бетхIерулигу, дила ахIер. Гъалабла мерличир дурхIнала анхълизир рузулла.

– Хебиалли, Ада, хIела баари яшав лебли саби.

– Нуни дахъал дукули дургар или гъанбиркулив хIед?

- Лерли гІергъи сен хІедукути?
- Аллагъличира дахъал дукули хІерирус. ЦархІилта букуси бирар нунира букуси.
- ХІебиалли, илдир ахІед гІелабулхъутигъунти ахІен.
- Берклуми лер диалли, илди хІедеркес, заядарес, лайдакІес асухІебараргу. БишгІатара сецад гІелар далтулив илди?
- ХІу жагъил адам сарри, Ада. ХІела чархлизиб селра изусира агара. ХІезир челукути имцІати берклуми сари. Илди камдарес чебиркур. Бахъ хъярхъли букъули саби хІела шинкъан! БагълахІебарадли, хІу гІур ишди унзаларад набсчи арацІес рирхІерируд – унзала рухІна кахІерурцуд. Ну хІечи дура рашес хІерирус. ХІела изуси кани саби! ДекІбикІусира ил саби.

ГІУР СЕ БЕТАУРА?

- Дила аги бурес агарли гІяхІсири, – вехІихъиб Гъарун. – Шагъарла дураб юлдашуначил барх бархІи беркІира. Дурхъаси машиналичи тІинтІиубли кайили, итара ишара кІел сгІятцадхІи дашулихъалли, бамсри се сабилра хІебагъурра.
- Гъарунна хабар гІеркъаси гъаяван зузбилтІни балули, Арун викІар:
- Дахъал гъай селис гІягІинити? Се бетаурал къантІли бурагу.
- Валлагъ, хІу сабурагар уилри!
- СецадхІи лехІихъусив хІечи? Буриси бурили бекІбарагу. Гъу, гІяхІси сабину – таманбара гІур се бетаурал.
- ГІур ну шагъарлизибад башуси машиналичи кайира.
- Юлдашуна хъули хІевкадив гъатІи?
- Илди шагъарла цархІил шайчиб хІербирули саби. ГІягІинилирив илди инжитбарес? Илбагъандан маршруткаличи айира. Ил бархъли нушала хъа гъалаб гІашиуси саби, юлдашунира иличи къабулбикиб.
- Бархъси саби. ГІур се бетаура? ХІу маршруткаличи кайири.
- Ге, кайира. Се чебаирав нуни? Шилизибси нушала яхализиб къулайли бири, иличибван ахІи. Кайрути мерани няслири, къасурби чедидуцибти чІянкІи дурдилри. Юх, уркурличиб гъалаб ахІенри илгъуна машина.
- Илдир нуни далути сари, нушала шагъарлизир адамла уркІи разибиэсти маршруткаи камли къаршидиркур. ГІур се бетаура?
- Агъагъай, хІябра сабур агарси леври къалли!
- СецадхІи лехІахъес гІягІинили хІечи? Селис дурути илди хІуни набзи?
- СелискІун, ца чеадри хІуни рульличи кайибси? ХІяблгІунси бяхІ, гъазли берхъибси бекІ, нясти гъез. Нясси хІева!
- Астагъпируллагъ! – гІясиикІули сай Арун. Нунира сегъунти-дигара адамти чебиулра. ГІур, гІур се бетаура?
- Ит шупирлис гъанбиркули бурги, сунела машиналичибти адамти ахІи, вацІала хъитІми дургар или. Итцад тІяхІбикІахъес гІягІинисив машина?
- Аллагъу акбар!
- Сабурбарагу, хІела сабур каберх! Набчил бетаурси бурили бекІиэс хІейрар или гъанбиркулив хІед?
- Гъу, се бетаура беталра?

– Эй, гьалмагъ шупир, – ира нуни илизи, – се машина сабив иш хІуни адамти бикуси?

– ЦархІил агара биалли, се бариша? – викІи. – ЦархІил лебси биалри, иличиб бикаси.

– Машинала бухІнаб камсилра умудешалра барес хІейрусив гъари? – ира нуни кІинайсра.

– ХІед хІебигули виадли, дураухъен, – иб.

– Набчира шупирли дурутачира лехІахъили, машинала бухІнабта ну гІевуцира:

– Машина бухъна биалра, умули бихІес ва жагали бикес вирусигу. ХІези гъайибси иш мурул адамлизи «хІебигули виадли, дуравхъен» викІулри хІу. Гъу, нушара дурадухъишав?

Илда гъайлиса шупирли дубхІехъиб ва машинала бухІнала чебиахъуси дяхІимцІала бархъли набчи бяхІчаиали, гІясили хІерикІесииб.

– Сен илини ил секІал барибал баладу?

– ХІебалас.

– Нуни балас, амма бурхІебурис.

– Сен-биалра, ну дила къакъализи каира. ЦархІилти арц агни багъандан нуни илизи даршал къурушла кагъар бедира, – тІама гІяшбикІесбяхІиб Гъарунна. Илини наб чардарес гІягІнити арц гІясили дила някълизи дурхІиб. Унза къяпІдарахъес ва арцличи хІеризахъес наб имкан хІегили, илини хъярхъли машина гъайбариб ва хІулбала гъалавад ветахъиб.

– Нуни багъес вирули ахІенра, хясала гъуникад аркъуси бухъна унцла зипІбикІуси жихІван кахІебурхуси хабар хІуни селис бурсирил?

– Буришав селисал? Ил увяхІси шупирли набзирад цархІилтазирад сайсутала дурарад гъал къуруш имцІякъра сасили увухъун.

– ХІела лерилра гъай-мезлис гъал къурушцун тІашкаилив? – дукІелцІидухъун Арунна. Эгер ит шупирла мерлав ну виаслири...

– Се бирадив?

– Дила машиналичи катхІейрахъади, хІела дурантира хІура.

– ХІера хІугъунтира лебни балухІели саби илди илда биркъути. Я хІебиркъули хІебуар, – хабар каберхур Гъарунна. Гъал къурушра илцад дахъал арц ахІен.

АЛЛАГЪЛА АДАМ

Сакинат-адай зягІипли гІяхІцадхІи рирулри. Мурул РяхІмайсра илала зигаръала анцІдукъири. Хъулирти лерилра диранти дархъкадатурли, гъачам карирули, гъачам арилзули, мерани дарсдикІахъулри.

Савли хъуливад арякъи, хІери гІергъи чарухъунси РяхІман тамашавиуб: хъунул аризури, буруш-гІянала далдарили, къям-къуцІул, палтар-къяш ицули паргиб.

– Агъ, хъунул, хІу къалли гІур атхІерилзас рикІусири. ХІера арариубли! Наб жявлил дура арукъес гІягІниси буили саби, хІу аризахъес багъандан.

– Валлагъра, гІур атхІерилзас или гъанбикисири, аризахъурра вакІибсини.

– Чи вакІибу?

– Сакинатли, хІулбира чедихъили, бурхани тІул бяхІчиаиб.
 – Нушала унза лертигу! Сен унзалавад вакІхІекІибсив ил? Унзалабад хІебашути адапти гІяхІти хІебирар.
 – Ил вашули ахІенри. Арцурлири. Арцурли вакІра вакІиб арра арякъун.
 – ХІела къагъдешли хІебагъурси рургуд. Белики, хъулки урги ил.
 – АхІенри гъари! Зубрала малаик сайри. Хъулкнала муцІурти цІудараби дирар. Итала муцІур цІубари.
 – Гъу, се барес вакІибсири ил? Белики, нушала се-биалра арбухили ургар?
 – ХІу набчив чевдукаркІулри, РяхІман. ЗягІпси адамличи чи вашарал хІебалулрив хІуни?
 – Тухтур вашар, гІур чи вашару?
 Илдигъунти гІяхІла нушачи гъуни хъумартаб, я Аллагъ! УркІрухъи аризурсирагу ну!
 – Гъу, вакІибу, хІед дарман гибу, се бариба илини?
 – Я дарман хІегиб, я набчи къячхІейкун. Ца гъайцун буриб.
 – Се иба? Вайси-мага бурибу?
 – ГІяхІсира ахІенри: хІядуррии викІи.
 – Чина? Больницализи?
 – Ига, лебилра арбашуйхІи.
 – ХІуни се ири – ляркъяс ирив?
 – ХІуни дила жан асес вируд, дурхъаси адам, – ира нуни. Цакамси гъатІи ратабагу, – ира. – Дила дахъал дарести гІелар кавлули сари. Ухъна чичи хъарли вагиша? Ну агарли илини гъанхІедурцу. Илмадан кІантІиикІур. Дила уршбирурсбала баркъибти хъаллабарес дигулра. Илдала баркъибти къукъубачи кабатурли, цитІитІбарес дигулра. Ратаба, – ира.
 – СейкІив, ралтари викІив?
 – Я ралтари, я хІералтари хІеиб, валлагъ, цулбира къярждарили, вакІибси тяхІярли арра арякъун.
 – ХІебиалли ратурлири хІу илини. Ца адамла гъарбилзуливан, гъарбизурли саби хІелара. Игъбарла адам руилри хІу, – викІар РяхІман, хІулбидирули.
 – Сарра, РяхІман, сарра. Нугъуна Аллагъла адамличил хІериэс бикни хІелара халаси игъбар саби.
 – Илкъяйда биубли гІергъи, хІед гІур цІум-зигаррикІес асухІебирар. ЦІумрикІес рехІрихъадли, хІечи ил гІурра лявкъян.

ХЪУНА БИЗИСИ ТІЕМ

– Байрамличиван дямизурли, чина гъайбарилри, Шамсудинович, – викІар ил чеибси унра.
 – Бурис хІура набчил варх вакІадли.
 – Гъайгъай, лявкъяс, гІяхІси мерличи аркъуси виадли.
 – Ваши, хІу къаршихІейкесара или гъанбикибсири набра. ГІяхІси бетаур хІу цугикни.
 – Чила-биалра мекъличи ахІи, тукейзи яра базарличи аркъутирав?
 – Дахъал секІал хъардиид къалли, – викІар Балаевич. – Гъайбара чебиидну. Шамсудинович Балаевичличив гІямрули халасири. Илкъяйда илди цаличи

ца дугъабилзути чула ургарти юлдашдеш гІяхІти диъни чебаахъес багъандан бурги. Балаевичлис Шамсудинович гІевуцес, гІяхІси гъай бурес чевкъулри, сенкІун, хъунул ребкІили, дусцадхІи цунни сайри.

– Ваши, ит кафелизи адацІили кадирехІе, – викІар Балаевич, Шамсудиновичла гъав ахъбуцес дигули, – итар гъархІели дерцІибти гІяргІнира, хІед дигахъуси капустала салатра дирар. ГІярякъира сасили, датдухъес гІяхІсири.

– Ил секІал кІинайс бирехІе, – къабулиркули сай Шамсудинович. – Гъалагъала базарличи дякъи, наб дебали хІяжатти секІал исехІе.

Ирчи Къзаказъла къакъалабси базарличи абаили, илдала гъай кадерхур. Лагра-катра башути адамтала бахъдешли, илдас барх башес имкан аги. Илбагъандан Шамсудинович гъалав вашулри, Балаевич – илис гІелавад.

– БахъхІи башули, Балаевичла сабур каберхур.

– СелигІир умцІутирав нуша? – хъарбиули сай Балаевичли гъалав вашусилис гІевваили.

– Чебиид, – жаваб лугули сай Шамсудиновичли.

Гъар туке гъалаб тІашбилзули, илаб бирцуси гъар секІайчи хІерикІули умцІалра, Шамсудиновичли хІяжатси секІал бургули ахІен.

«Се сабира ишис хІяжатсилра?» – сунези сунени хъарбиули сай Балаевичли.

– Вамсурлирагу, юлдаш, сецадхІи умцІутирав нуша гІурра?

Ца туке гъала абаибхІели, Шамсудинович гІелавяхІ шуряхъиб.

– Садаилра вара? – гъигъбатур Балаевичли. – Садаибтигъунтира.

Шамсудинович гъярли тукейзи ухІнаухъун ва рабза туkenчизи хъарбаиб:

– ХІед ну гъаниркулрав? Дус гъалар хъунулра нура иш тукейзи дакІибтири.

– ДакІили диэс асубитар, – гъузгъалдириуб туkenчи. – Лебилра бакІибти гъанбикахъес хІейраргу. ХІушаб се асес дигулрав? Дила гъар журала гІядикалунти лер.

– Ириъ хъунуйра нунира ишар духиби асибтири.

– Асубитар. Сегъунтирив илди? Се бикІил гъанхІебиркуру?

– ХІейрулра гъанбикахъес. Шишара лайбакІилра.

– Се рикІиша ну хІези, багъадур? Ура хІебалули... шишалра сегъунари?

– ХъанцІа рангла сабри.

– ХІера къасурбачир сецад кІерал хъанцІа рангла. Се бикІутирил багъес гІягІнили къалли. Хъунуйзи сен хъархІебииди? ХІела телефон агарав? Ма, дила каса.

– Дила телефон леб, хъунул агара.

Туkenчи рархиб. Лерилра чедаахъес касибти шишни къасурбачи урасиб.

– Се адам сайси иш? – тамашариуб ил. – Иш хъунул раргес умцІусив, ахІи – духиби даргесу? ГІяжаибти адамти бирули саби.

Шамсудиновичли чІумадариб:

– ХІуни сен илди гІеладахІ кадирхулри, дила рузи? Кадихъа иша, диха сунтІдарес. Нуни тІем хІясибли баласну.

Туkenчи, се рикІусил хІебалули, уркІкарухъун. Се-биалра бурили, муштарчис вайбизахъишагу или урухра риуб.

– Эй, бусурман, хІу набчил хІязта иркъес вакІилрив? ТІемличибли севан баладу хІуни? Нуни хІед лерилра къяпІти шишни абхъес гІягІнилив?

– Се баралли гІяхІсира, дила рузи?

– Духиби сегъунти диалра се деклардеша? Иш яргалис цархИлти аса.
– Деклардеш хЛебиалри, ну иша ляхИякьира. Илди цархИл тукейзирра асес
вираси. Наб хИяжатти тят ириъ асибтигъунти духиби сари. Дила хъулиб баягъи
ит бизиси тЕм биубли дигулра – дила хъуна бизиси тЕм.

УркКарухъунси тукенчи кумекиахъесван Балаевичличи вякьризур –
чевикалри набчивад иш адам!

– Шамсудинович, – иб урух-урухли Баллаевичли, – цархИлти тукентазира
гъардикIехIегу, хIед итдала ура гъанхIебикесал. Белики, ишар хIедурги хIушани
духиби асибти?

– Ишар сарри! – гIясили кайзур Шамсудинович. – Ватаба хIуни ну!

Тукенчила яхI каберхур ва тукейзирад дурарухъун. Илис гIелабад кIелра
юлдашлира тукен бархъбатур.

Илала гIергъи – гIялавван Шамсудинович гъавиубли, гIелавад Балаевич
вашули, дахъал тукенти чедидахъиб. Амма сунела хъунагъуна ит тIягIямла
тЕмла духиби даргес хIебиуб...

БерцIибси гIяргIяла дияла тЕмра духибалайчиб гIелахIебулхъи, гIярякьира
вайти ахIенри. БикIуливан, илдала къяйда «къялубачиб» сабри. Ихтилатра
бемжурлири:

– ХIушани дила уркIи иргъхIергъулрая, бусурманти, – сагали чарулхъулри
Шамсудинович тIягIямла тЕманачила бурсуличи. – Хъунул ребкIили агарли
риалра, илала бизити тЕмана ну ряхIятирулра. Амма дахъхIи агарли илди
таманни детихъни балулра. Ил юртлизи чарухъесра дила иштяхI бубкIули саби.

Илгъуна агилизивси адамла децIли Балаевичла уркIира буциб.
Шамсудиновичличи уркIецIидухъун, илис кумек гIягIнили биъни чебаиб

Сен-сабрил гIергъила бархIи Балаевич баягъи ит даг саби бякьунси тукейзи
ацIиб ва гIямрулизир бегI гIялар хъунуйс савгъатлис бегIлара дурхъаси хъанцIа
шишализирти ахIмакъ духиби асиб.

КУНБИ

Юнусра Къудусра бахъхIила тянишуну саби. Илдас юлдашуну саби
викIесра хIейрар. ХIал-гIабигIятра цагъуна ахIен. Амма илдала, кам-гъамси
биалра, мешудешра леб. Масала, кIилалра кунби цагъунти сари – халати.
Кунбала халадешли, илдала букIри диштIали чедиулри.

Паркла бухIнабад Юнус или ахъли тIамадариб. Бахъал адамти ил шайчи
шурбяхъиб.

– Ва Юнус! – тикрарбиуб гIурра тIама.

Юнусличил варх парклизиди вакIибси жикьи бирхъян Рамазай хъарбаиб:

– Чи саю хIела у ахъили жиикIуси?

– Ил Къудус сай.

– Чи саю Къудус, жан узи?

– Чейид, сай гъанна ша ляхкъянну.

– ГIягIнилив нушаб ишдицад халкъла ургав итцад ахъли вявикIуси адам?

– Набра ил иша вакIхIекIили дигахъира. ШалгIевухъесгу.

Амма Къудусла шалгIевухъес пикри аги. Ил вархъли илдачи ляхкъулри:

– Юнус! ХIядурии! ЧIумали кабуца хIела кани! БекI мяхIкамбара!

Някъбира къакъла гѐла детуцили, канира гъалабяхІ дямбизахъурли, ахъли дукаркІули илдачивяхІ ватихъилри Къудус.

Жикъи бирхъян Рамазан хІерикІалли, Юнусра ца шайчи витІакІили КъудусличивяхІ ватирхъули сай. Някъбира къакъла гѐла детуцили, кани гъалабяхІ дямбизахъес вархъиубли, гъарзали гунзри кайцІули вашули сай.

– ХІед се биубли, эй Юнус? Се куц саби хІела, марга кІуркІурлайчи мешуси? – тамашаирули сай Рамазан.

– Юнусли Рамаза гъайла бикъули ахІен. Илини сунела лебилра пикрира, хІулбира, лихІбира Къудусличи дяхІчаили сай.

ВахъхІиличивад валуси виалра, Рамазай Юнус илда виркъули беГІ гъалав сайри чейуси. Ганзра багълабарили, гІур се бетарарал хІерикІесииб ил. Итил шайчивад лявкъуси Къудусра Юнусличивра гІяжаибзеслири – цІерхъси канира хІунтІена дяхІра сайра. Илала вашнира бурхІерла замана къуйрукъра пушбизахъурли булхъуси тѧп марга кІуркІурлагъунари. Иличибли илини итабадра ишабадра сунечи хІербикІутала пикри битІикІулри.

– Элелей, се уонтив ишдани далдуцибти? ПикриикІулри Рамазан. ГІур се барес къасал ишдала?

Цаличи ца сабаэс башуцадхІи, Юнусличи ва Къудусличи бахъал адамти хІербикІулри.

ХІера илди цаличи ца сабиули. Ва чумал ганзла къадар тѧйдили лебай, дяхІес хІядурдикІути кигъманиван букІри адуциб. Рамазайс гъанбикиб, гъанна илдани букІри дирхъу ва, дяхъили, кІибайдиэсли дялча или. Амма илдала букІри къяххІедикибну, тѧп нехІли дицІибти гІагъниван чябхъдикІути кунби чегиб. Илдала ил баркъуди цализи цала салам бииши гъатІи.

– ХІя-хІя-хІя! – дурабушиб Къудусли.

– Гъи-гъи-гъи! – гІеббуциб Юнуслира.

Цализи цала кунби ибкъаили гІергъира чумал ганз гІеладяхІра кайцІули, хІяйнара-сера «хІя-хІя, гъи-гъи» иб.

Чучи адамта гІяйибихъниличила илдас авара аги ва чула дуркъа пишни гІашиули ахІенри.

– Гъу, сен сайри, Юнус, – лебил парк бучІахъули хъарбиули сай Къудусли.

– Кеплизив сайра! ИмцІякъ гІяхІли биэсра хІебирар!

– Сен чехІейусири хІу? Набчи гъавалра хІейкІулригу!

– Се гІяхІ чебаиша нуни хІезибад?

– Кунби дяхІяхъес, гъай-гъайкадухъес биалра – вайсив гъатІи?

– Юх, – викІар Юнус, хІеризи алавчар, – цалра адам чейулрив хІуни нушаван мехІурта иркъуси?

– Се саби, Юнус, хІуни буруси? Ишди адамтачил цугдурцулрав хІуни хІура нура? НушакІун дагъни сарра, ишди гІяргІни саби. Нуша кигъми сарра, ишди – чахъни саби.

– Урузиэс, цІахбизес гІягІнили саби, юлдаш Юнус, – гъандуцес хІейуб Рамазай. – Вати ишра, хІура ваши ишарад аркъехІену.

– Гъу, диур гъанна, – викІар гъарли-марли Юнус Къудуслизи. – Диур дарибти масхурти. Халкъласун ихтилат бирехІе. ХІянчи-секІал баргиририв?

– Нугъунтас хІянчи калив гъатІи? Баргаслира, узхІевзус.

– Кани букІулхІебиахубли севан бихІиду?

– Халаси канили халаси яшавра тІалаббинули саби. Ил балхес дила арц агара я дирхІедирар. ГІур хІелайчил дила кани бирхІяхъес бетхІерар. Илбагъандан, ваши, гъачам гъатІи дуцІдухъи, сагъли кунби дирхъехІе.

– Ваши, хІебиалли!

Тяп кигъмиван гІелам башули, гІяхІцад декІарбекили, някъбира гІеладахІ кадуцили, цаличи ца бетухъун.

Даргдердесли дяхъибти кунба пянчасахъили тІамадариб.

– ХІя-хІя-хІя! – дурабушиб Къудусли.

– Гъи-гъи-гъи! чарбариб Юнусли.

ХІера чула бегІла гІергъиси кунбала хІязра барили, кунбира хІяршдарили илди декІарбекиб.

– Шишимала агарли хІерирули ахІен ил пакъирли разисила гІердируси, – иб Юнусли, илис гІелавад хІерикІули.

– Наб къалли гъанбекиб илини сунес дигуливан кепла гІямру дуркІули ургар или, – сунес Къудусличила вайси гъанбикниличи пашманиубли иб Рамазай.

– АхІен гъари! Иш шагъарлизир даршани хъулри делшунси ахІмакъ уста, бареси агарли кайили сай. Илгъуна адам адамван хІерирули ахІен. Лерилра илала думяхІ – иш нушала бархібси заманалис карикатура сари. Агри хъумартес, вегІличибси хІял чебхІебагъахъес тІяхІикІес, вявикІес чевкъули саби. Ил хІяйчи ветикили сай ил гъарибра.

Шурдатурси.
ХІябиб КЪУРБАНОВ



Имин
МЯХИЯММАДОВ



АГЪ, ИШДИ ПАРТИЯБИ!

Цасира цархИлтира...
Чум лертира лерилра?
Агъ, ишди партияби
ЦабехИта цабехИтачи
ЧярхИдирули бугътанги.

Ахъдурцу гъуя-гъарай
ТахИярагарли ахъли,
Тяп дагъниван каибти!
Шантала тIамри сари
Илдас ургадикибти!

Шанти гушхИебиахъес,
Абздикили дузули,
Дила ВагIа майдунги
МаранкИили делгIанти!

Шанти чIянкИхИебиахъес,
Диркъанирра дубрирра
Азиртадли дурзамги
Къас-къасли адилкъанти!

ЖагъхИели, хIу-исбагъи
Жайранна жагадешла,
ХIуван къугъарилзуси
ХIериуб итхИелира.

Ца къас саби леблалра
Нагагъ чедебикалли,
Улкала ари буцес
Къия халкъела хазнала
Къани чузи кабуцес.

Гъай дарман! Чидни вара
Шантас гIяхИбаркъела гъубзни?
ХIялал-залалли марти?
Дила бархиси ВагIан
Къяшмачи тIашбатести?!

II

ХIялалси бузерила
Сабухъ хIябкабарахъес,
Ванзалисра заклисра
ДехИбайчир дулганти!

Хъубзури, дила узби,
Улкала къакъбяхъуни!
ХIушала партиялис
ТIама лугулра нуни...

* * *

Амма хIяндеш хIяйнали
Жагати сари хIела,
ХIуван къугъарилзуси
Агара наб гъаннара.

ГІяхІгъабзала у сархес
Лѣбтасалра дигули,
Ил бихес, няхІебарес
БажардихІебиркули.

* * *

Камлигу, дила узи,
Ил бихути хІуниван,
ХІечи бахъ балбикили,
Жагали бирсибсиван.

Ванзалисра заклисра
Хъя барибти мардешла
Хъубзара партияла
Сайри дила дудешра.

* * *

Дусла авалра манзил
Душманван азгъиндешла,
Уршби-рурсби абикъес
Дудешван рузиб нешра.

ГЪАРИГУ, ДАЛАЙИРИС...

Гъаригу, далайирис
ГІяршлизибта бакъесли,
Дардли варг игулину,
Далай дарман биэсли...

– ДацІ хІябкубтар далайчи,
Дардла далуйтазив хІу

Чис ургъусирив или
Шантали хъарбаалли,
Ургъулра, – ирис, – муйлас,
Хъунрани шурбулхъутас,
Къуръа хІекъти къанунти
Дуэс алавбухъунти
Хъунча падахъусунас!

Гъари, делхъ гъатІи дирис,
Мусни гардардухъесли,
Чарх бахъ хъипІбуцилину,
БиркІунти чераргъесну...

– Ункъли улхъуси делхъчи!
УлхъухІелира валли,

* * *

ХІу, терсли, илцад вайли,
Чис уркъсири? – алли, –
– Уркъулра, – ирис, – муйлас,
Хъунчала гъай мезличил,
Улка бархахъес къасли,
ХІявбуцІала гъигъличил
Дила ВатІан балтІутас!

Хала бегІгачирадли
Букъурли наб даибти
Минала гІядатуни
ГІямрули гІердурибти.

* * *

Мас-хазнаван, ярагъван
Шантас хІяжатти сари!
Илди дуи, дехъалли
Шира белхъуси саби.

Гъанна гІяхІгъубзначила
Далайэс чебли гІергъи,
Далайирис вайгъубзни
Къясдешли къацІбуцесли!

* * *

Дезадирис ВатІайсра
ГІяхІгъубзни абилкъуси,
Алав унруби-улкни
МяхІгалли мяштІдикІесли.

ХІЕД БАГЪИШЛАБИРУЛРА...

Игъбар саби адама
Халаси узи левни,
ХІекъли халаси игъбар –
Узи гІяхІгъабза виъни!

Илгъуна гъалаилзан
ДяхІ-дяхІли бунагълисра,
УбкІалра гІемухІелзан
Гъанагар балагълисра!

Ил нартли виштІал узи
ГІевурцу баркъ-бацлизив,

ГІибрат сай ил виштІаллис
Адаб-рухІла баркълизив!

ВиштІал узи узини
Бунагъкар ветхІерахъу,
ГІяхІси баркъла сайгъуна,
ГІяхІгъабза ветарахъу.

ХІера ца гъатІира нарт
ИмцІавиуб шилизив!
Иличи хъарахъибси
КъардхІелхъан гІямрулизив...

* * *

Далай агар мекъ хІейги,
«Мавлид бариб» бикІарну,
Мекъ агар дигай хІейги
КІарзали халируну.

Цаличи ца карцІала
Шилизир мукъри диги,

Мекъла мява бамсайчи
Шанти булхъули диги!

Далай-делхъла аблизив
Ну гъавкъянали диги,
Набчиб динна агълули
ГІяйиб хІейхъули диги.

УРШБАС ВАВНИ ДЕДАЯ

Нешли урши ляввариб
Гадла далай бучІули,
Начи –тупанг гъабушиб,
«Нешлис къяйкбара» – или.

Чарх чихъбизур... тІашлира,
Пикрумазив вархили,
ВиштІалли симкъ тІашаиб,
Начи – тупанг сархили.

Духъули сай нешла ний,
Мамаличи цІапІаки,

Гапвариб нешли виштІал,
Андаличи байрики...

Ванзаличиб дарула
Тем хІебатес дашути,
Даршудешла лишанти
ГІялам цабулгахъути.

Уршбази хІебла вавни
Дедаягу, нешани!
ХІябилра детІилину
Ванзалис тупангуни...





Зубалжат
ГІЯМАРОВА

АХІЕРТИ НЕШЛА НЯКЪБИ

Иш дунъяла къакъличир
БерхІила къяли къяйда,
Сари бегІла ванати
АхІерти нешла някъби.

МалхІямси дягІли къяйда,
Урхула рамчли къяйда,
Нуша кІапІсадурцути
АхІерти нешла някъби.

Уршби гъунибалтути,
Уршбас гъунидиути,
Уршбачи сари хІерти
АхІерти нешла някъби.

Марли гъайхІедикІалра
МухІли къяйда малхІямли
Нуша ванадирути
АхІерти нешла някъби.

АхІерси хъа улкъайлаб
Алкунси шала къяйда,
Нушачи сари хІерти
АхІерти, нешла някъби.

Нуша паргъатдирути
Къьяндикиб замана,
Ва гъунчирадуршути
АхІерти, нешла някъби.

Ванали кІапІдуцили,
МалхІямли гІердуцили,
ГІямрулизи дурхути
АхІерти нешла някъби.

Аллагъли арадеш габ
Дахъ малхІямти, чІумати
Дунъяла зак бихІути
АхІерти, нешла някъби.

ДИГАХЪАСИ

Дигахъаси, риубли
Нушала иш Дагъиста
Ахъ дубурти къяйдали
Хамлира азадлира.

Дигахъаси биубли
Хасиятра чІумали,

ХІела ахъ дубургала
ДиштІа къаркъуби къяйда.

Дигахъаси, биубли
УркІира умусили,
ЦІуба дяхІи къяйдали
ХІела ахъ дубургала.

Дигахъаси, риубли,
Сахаватлира марли,
ЧяI-чяIиби къяйдали
ХIела ахъ дубургала.

Дигахъаси, диубли
Набчил чинар диалра,
Ну чинар риаслира,
РухI ахIер Дагъиста!

ПИКРУМИ

Гъунила хIябкъяйличир
Пикрума руцибХIели,
ХIечила пикрирухъес,
Марли, бекIриишара?

ДелкIес бекIриишара,
Дила ахIер Дагъистан?

Атлантида къяйдали
КIундациб анцIбукъуни,
Дурес бекIриишара,
Дила ахIер Дагъистан?

Мурталра зайбикIуси
ХIечи дигайла далай
БелчIес бекIриишара,
Дила ахIер Дагъистан?

ХIела чебяхIги гъубзни
Ахъбирути макъамти

ХIу агарси мерличир
ХIечила пикрирухъес
Марли бекIриишара,
Дила ахIер Дагъистан?

ГIЯМРУ

ГIямрула секундуни,
ГIямрула минутуни
Агарав нушала цIакъ
ГIямру гIела чардарес?

Цайна гъатIи нешана
Михъирличи гъяжбарес?

ГIямрули хIебелкъунти
Дигайи хIябяхъибти,
КарцIайли хIебицибти
Мурадличи баахъес?

Амма, гIямрула ругер
ГIелабахI чархIебирар,
Барсбирули сунени
ГIяламлис гIергъи гIялам.

Хъалибаргличи хIехъили
Калун дуцIар дигили
Анкъили хъали къяйда
УркIбира ванадарес..?

Дунгъа акIубхIейчибад
ШурбикIули ил кавлан,
Ца мер цIализибХIели,
Ца мер шиннизиб сабли.

Нешанала децIана
Дяхъибти децIла уркIби
Чула ванадиахъес
КIапIбуцес, гIязиз уршби.

Къаркъагъунти чIумадеш.
ДакIура дарахъили.
Бархъси дякъкад укили
ГIур хапли къябудути.

Цунни гIелаб калунти
ЦIуръабиуб биштIати,

Амма, или биалра,
ХIяйранхIейэс вирару.
Пергерти гIямруличи,
ГIур хапли къябудути.

ХІЯЙРАНХІЕЙЭС ВИРАРУ?

ХІяйранхІейэс вилару,
Дила ахІер Дагъистан,
Хамтачир хамти сарти,
ХІела ахъ дубуртачи ?
ХІяйранхІейэс вилару,
Гъубзнала гъунартачи,
ЧІумал къаркъубигъунти
ХІела мурхъ къадурбачи?
ХІяйранхІейэс вилару,
Нешлара уркІиличи,
Муртлисалра кавлуси
ГІяхІсили умусили,
Арц къайда лямцІбикІуси,
Тяп цІубаси дяхІи къайда,
ХІела хам дубуртачи

ХІяйранхІейэс вилару,
Исбагъи жагъилтачи,
Сахаватти ва хъярхъти
ЧяхІ-чяхІиби къайдали,
ХІела дубуртачирад
Диркъаличи урцути.
ХІяйранхІейэс вилару,
ХІед дезнани бучІули,
Чучил дарх дихутачи,
РухІ ахІерси Дагъиста!
ХІяйранхІейэс вилару,
Хала бегІтала васият,
Чуни хъумхІертутачи,
Дила ахІер Дагъистан?

ДУНЪЯ

ХІянцІалабиуб дунъя
Чили тІашину вара?
Яра дунъя хІебургар,
Саби адамти бургар.

УркІира децІлизиб саб,
Дунъя багъандан цІакъли,
Гъанбиркули ках балагъ
ЧебяхІ ВагІа дургъбала.

Хала бегІтани бурул
Ахир замана вара?
Нушара шакХІейкили,
Нушачи сабаили?

БиштІатала гъунарра,
Агарси гІякълуличил,
Дунъя бутІес гъалакли
Саб халал къайгъилизиб.

Гъалакли саби лебил
ХъярхъбикІули ва тахъли,
Чина-сабил, се-сабил
Чунира хІебалули.

Лебил халкъ вявбикІулри
«Ванза нушала» или
Ванза саб шивкІивбухъи:
«ХІуша дилара» или.



Фазу ГИЯЛИЕВА
Дагъиста халкъла поэт



БЕКЛИЛРА

УрхІла хъуцІрумачира
ХъархІехъили,
АцІи къайгъибарили
ХІеркІла бехІбихъудличи.

ВерхІел рангли алкунси
ЗурхІябла рангличилси,
Алки, хІед гъунибиур
Ахъ дубуртала шала.

БегІтала букъурла мас
БекІлил гІягІнили ахІен,
Дигайла гъая саби –
Дила уркІилис гъуни.

Чумал гъаяличибад
НабчибяхІли ганз кацІа,
Рирусну илхІели ну
ХІед къакъбяхъили мурталра.

ТАМАШАМАЙРУД, ЮЛДАШ

Тамашамайруд, юлдаш,
Гъанналичи бикайчи
Ишкъяйда хІеррирнилис.
Хіисабра хІерарили
ХІеррирули сарри ну,
Чичилра ритІхІейкІули,
Къаркъала къякъ къяйдали
Ахъ дубуртала ургаб.

ХІуни, виради багъес
Дурхъаси къаркъализиб
БерхІи агарли гІергъи
Я лямцІли хІяз хІебирни.
Наб берхІи ветаурри,
Даршал дус дикаллира
ШайкІур мерлариубли
Ретарус хІед шалали.

ДИЛА УРКІЕЦИИ ДУЛХЪАН

Дила уркІецидулхъан
Дирихъла кІаналичи,
ДягІути ва духъанти
ДегІун авлахъунала
Чекадли арбякъунси
Ва бацІили бекІибси
Забла кІантІ батхІеили
Заклизиб кІунбацІибси.

Илкъяйда язихъдулхъан
Дила адамличира,
Муртлисалра вашули
ГІямрула гъуйчивадли,
Халкъла гъанбикуназиб
Селра кахІелахъунси:
Я сунела марси у
Яра гІяхІси баркъуди.

Шурдатурси Зубалжат ГІямарова

МяхІяммад
ТАХСУРМАНОВ,

НЕШЛИ ХІЕРКЪИБСИ УЗИ

Къуппакан ГІиса ГІямаровлис

Нешли хІеркЪиб узира
Вирусигу гЪарилла,
Дила пергер узи сай
Къуппакан гЪалмагъ ГІиса.
Мурт къаршидикахІелра,
Нуша хЪябруцдиркехІе,
Цаличи ца разили,
Лякъирра бумжахЪехІе.
Нуни пахрубирулра
ХІу гЪалмагъ виЪниличи,
ХІела ГІякълу-дагЪрили
Ну шалаирниличи.
КъугЪати чарх-бекІла вегІ,
ПасихІкар ва пагъмучев.
Бугаси къаламла вегІ,
Далдикибти гЪайла вегІ,
Пергер хЪалибаргла вегІ.
Ши-шантас ГІибратла вегІ,
ЯхІ-ламус сунечилси,
ДерхЪибти унхЪрала вегІ,
Дила къуппакан узи.
БерхІиван дяхІ ухуси
Сайри бархЪдеш дигуси,
Вава-къарван валгунси,
Шантаци хІулукІибси,
Дубуртани вяркъурси,
Хабар халал къуппакан.
Цала ГІякъван сакІубси,
МирхЪи къяйда узуси,
Дин-ГІягІятлис вахЪ марси,
КЪиянтазив верцибси,
КЪушумлизив валгунси,

ДагЪистайсера хІяжатси,
ДахЪал жузи делкІунси.
ГІякълу-дагЪрила ГІиниз,
НасихІятчи урибси,
Музей цалабахЪибси,
ГЪар се-секІал далуси.
БегІтазирад касибти
Адамдешра иманра,
Дай уркІила кайхЪили,
МяхІкамдируси гЪабза.
ХІял-ГІабигІят ва кабиз
МургЪиличир ахІерси,
Сабурра яхІ-хІяяра
ЧархІизир ламдикІуси.
ГІямрула хІябкъяйтачив
ЧевхІевалкІи вашуси,
Дин-ислам ва шаригІят
Дурусли дузахЪуси,
ХІяяла байрахЪличил
ХІяндешли кІапІуцибси.
Кагибти баркъудлума
Халкъла хІурмат сархибси.
Шала пІякъдикибхІели,
Дубуртикад вашуси,
Савли-дугила манзил
КЪадурби къяйцІируси.
ГІямрулизив мурталра
ГІяхІдешуна виркъули,
МасЪулти бекІдирули,
Шанти разибируси.
Заб-маркали авлахЪван,
КЪушумра шадбируси,


БерхИли дунъя къяйда,
УркИби ванадируси.
ХИеркИван башути гИяхИлас
Мурталра къяпу гьаргси,
Биршул кьумур сахават,
Адам хИйранвареси.
Диндаличир гимиван,
ХИялалти гьалмагьунар,
Галгаличир кIапИриван
ТИнтИбиуб тухумла вегI.
ХИела музейла кабиз
МяштИбиру адамгани,
ХИуни дурул хабурта
ХИйранбиругу гИяхИли.
Халатачил халаси,

БиштIатачил виштIаси,
Лебтачил валикибси
Къуппакан ГИиса-ащи.
Хамдешра, халадешра,
Пахрула уктемдешра,
Къясдешра чурхадешра
Мурхьли харидарибси.
ЧеалкIуси наслулис –
ГИибратла дубурари,
ИшХИелила жагьилтас –
ХИу сихИрула жуз сайри.
Къаламра бугабикIаб
ГИякьлу-пагьму мурхьдикIаб,
ХИела музейра берхъаб,
БиштIатира бахъбааб!





Нушала аслу - мина



Къади
ГЯЛИСУЛТАНОВ

ГЯДАТУНИ ЧЕДААХЪИБ

Дубурла шимала тарих дебали давлачебси саби. Сецад къиян-жапа чедур-къуб диалра, мурталра гъалабяхЦун башули, душмантас мутИгІхІебакИли, гъабзадешра ламусра нешла ниъличил дарх чузир минадиубти адамти хІерби-рули саби илаб.

Азирти дусми гъалаб хала бегІта гІелар датурти гІядатуни, гІяхІти къиликъ-уни, низам-зегъа бусагІятра дузахъули сари. Сецад хІейгеси биалра, гІергъиси замана дубурла шими дацІкадулхъули сари, берхІилара заблара асарлиур юртани гъятІкадиили сари. Илгъуна аги саби Ахъушала районна Цугнила шилара. Совет хІукуматла замана илар 250-300 хозяйство хІердирутири, школала бучІанти биалли 400 личи абикили бири.

БусагІят шилизир 60 хозяйство сари калунти, илдирра ишгъуна даража калалли, 20 дусла духІнар деткайхъур.

Шимазибад бахъал дура арбашули саби, хІербиэс сегъунтилра шуртІри ва хІянчи агни сабабли. Жагъти хъалибаргунас илаб хІербиэс дебали къиянни саби.

Шила тарих давлачебси саби. Целдубачирти баянти хІясибли ши азир дусличибра имцІали биубли саби. Шила у акІнила тарих ишгъуна саби: жяв заманаличибад лерилра алавти сирхІяла шимазиб бучибси сабухъ, гъанна бусагІят Цугнила ши лебси мерличиб цуг-цугли буртІули кали саби, – иличибли «Цугдеш» ибси, гІур биалли «Цугни» бетаурли саби.

Дахъал сари Цугнила шилизир тарихла памятникунни. Илдазибад ца саби 18 ибил даршдуслизиб тІашбатурси мижит, сабира ЮНЕСКО-ла хазнализикабурхуси. Бахъал саби ил чебаэс башути тарихла гІялимти, гІядатла адамти ва ГІярасайлизибадти туристунни.

Бара гъаларван Цугнила шилизи гІяхІлад ракІиб РГВК-ла «Дагъистан» телерадиокомпанияла «Адамти ва замана» передачабала ведушая Зубайдат ХІусейнова.

Цуглантани бакІибти гІяхІлас разили гъунибаиб ва гъар-урла гІядатуни чедаахъиб. Буркъунза секъяйда дурабуркІул чебаахъиб. Илкъяйдали цІкуруи шери аркниличил дархдасунти гІядатуни, ил аркухІели гъуйчир цІами адилкъни, илала мягІна лерилра вайти цІали дигубли, умуси уркІихІяйчил сагаси хъалибарг акІахъни саби. ЖявхІелла заманала делхъ дариб ва далуйти делчІун шила культурала юртла хІянчизарти ЦІибацІ ШяхІбановани, МяхІяррам ХІяжиевли ва Мустапа Тагъзировли.

Шила тарихличила къантІли буриб шила школала тарихла мугІяллим Шейхов МяхІямадли. Илкъяйдали цуглантани гъаларла берклуми дариб. Разити аги-хІяйзиб бетерхур ил байрам. ГІурра дахъдикІаб илдигъунти байрумти.

ЦУГЛАНТАЛА ГЯДАТУНАЛА ХАСДЕШУНИ

Цуглантала гьар-урла Гядатуни гьачамлис чедетаахъили дяркърли ахен. Динничил дархдасунти сари, адамтас зараллати сари или Совет хУкуматла замана къадагъадирули калунти гЯхИцад Гядатуни детахъиб. Гядатунала далуйтазир цуглантала пикруми, хЯлани, хьулани ва итхИелла Гямрула даража чедаэс вирар. Гядатунала далуйти учидяхъибти, дучИути бархИиличиб бархИи камбикИули саби. Гьаб-убла культурала хазна чеалкИуси наслуличи хЕбаили калнила урехи леб. Ил хазна чузиб бихИути бухъна адамти лебалли, илди дучес ва дяркъес гЯгИниса саби.

Ванза бузахъниличил, мицИраг адилкъниличил ва тIабигIятличи дугъабилзухИели ва цархИилти анцIбукъуназир цуглантани дучИути далуйти жявлил лертири.

Нушала пикрили, илдигъунти далуйти алкIес дехИдихъибтири 4-5 ибти даршдуслихъуназир. Бусурман дин тIинтIбиубхИели, дахъал аллагъуначи хасдарибти пикруми духИнадуцибти далуйти бусурман динничил далхИедикибтили урдулхъули сарри. Илбагъандан динна вакилтани Гядатунала далуйти, чула мурад хЯсибли дарсдарес халаси къайгъи бариб.

ИтхИелла адамтас гъанбиркусири, сегъунти биалра баркъудлума, яра далуйти делчИи, аргъличи асар барес вирар или: хъянибиубси аргъ баршахъес яра дегъбиубхИели заб дарахъес.

Цуглантани жявхИейчибад бузахъули саби, берхИиличи дугъабизурли, аргъ баршахъес дурабуркИуси гЯдат. Касили урца кура иличи адамла бекI суратбирусири ва чегърли иличи палтарра,ши бухИнабад бихусири. Гьарил хъайзи къутIдахъили, сегъуна биалра савгъат сайсусири.

**Ва берхИи бекI берхИи бекI,
БархИи бакIла кIатIа бяхI,
БархИиличи хIерлира,
ХIерейчи хIясратлира.**

ДахъхИи заб хИедарили дегъбиубхИели, лебилра шантI «Урхъхур шара» бикIуси мерличи бякъи, шара-алав булгули башутири, цаличи цали шинра чяхИдирули. Адамтани чучил дарх берклумира дихутири. Ил гЯдат дураберкИили гIергъи, делчИи къулгъу-алхИямра, бекIибтала рухИлис багъишладарили илдира, чарбулхъутири. ИмцIати замунтазиб ил гЯдат дураберкИили гIергъи заб дири.

Цугланталайчи мешути заб дарахъес гЯдатуни цархИилти дарганталара лер. ХIера, илдигъунти сари цуглантала цацадехI гЯдатуни.

Дагъиста цархИилти миллатуналарала лерниличил тикрарбарилли бурулра. Ил анцIбукъли биалли бикъридеш дирули сари гъалаб Дагъиста халкъани цаван хIербирули кали биънилис.

Гъайгъайра, лерилра илди секIай заманала бухъяндешли белгити дарсдешуни акIахъуб. Гядатуни мешути диубли хъалли, декIар-декIарти миллатунала ва хIятта шимала мераначир дарсдешуни дагъардухъи сари.

ДАРШЛИЗИ УЛХЪУСИ ГЪАБЗА

Даргантазиб ишгъуна бурала лебси саби, шилизив яра тухумлизив духуси, бахълис кумекируси, тямяхIкардеш агарси адам виалли, ил бегIла къяндикиб замана музаулхъан. Илгъуна сай шанти-ургаб хIурмат сархибси, сай гIямрулизив жагъли левай виаллира гIякълу дагърили вицIибси пергер гъабза ХIясанов ХIясан МяхIяммадсягIидович.

ХIясан районнизибра бурибси халибарг-лизирад сай. Илала дудеш МяхIяммад-СягIид дахъал дусмазив Ахъушала районна шила хозяйствавола управлениелис бекIдеш дирули калун. Илала хIялалси бузери районна ва республикала органтани чуйнара чихъли кьиматлабариб. Илгъуна пергер хъалибарглизив акIуб ХIясан МяхIяммадсягIидович. Университетлизив учIухIелил илини деклар-декларти комсомолла организациябас бекIдеш дирули вири. ГIяхIцад дусмазив ил жагътала, спортла ва культурала министерствобазив узули калун. Илала бузери чихъли кьиматлабариб, ва чуйнара хIурматла грамоталичил шабагъатлава-



риб. Гъанна чумал дус ХIясан МяхIяммадсягIидович Ахъушала районна культурала ва спортла управлениелис бекIдеш дирули узули сай. Ил узес вехIихъили, илини бекIдеш дируси Управление гIяхIцад гъалабяхI арбяхъун. Иш бархибси манзиллизиб арагIеб районна управлениелис гъуни чебиахъес гъамадли хIебургар, или биалра мурталра гъаларти къяяназиб бирар. Республикализир ва илала дурарар дурадуркIути лерилрара-сера далдуцуназир бутIакъандеш диру. ХIулилипIла манзиллизив гIяхIтира вайтира шалуби белгидарес балуси, гъар секIайс бархъси кьимат кабатес бажардииркуси адам сай ХIясан. Уктемдеш агарси, сунечила гапъала хIейгахъуси, гъарил баркъуди биалли гапличи лайикъсилициун бируси, гъарил дев кагахъили буруси, адамтачи уркIецIичевси, жагътала ва халатала ургаб, хIурмат сархибси, хIял умуси дубурлан сай. Нуни илизир кьиматладирули вирус адабдешла мурхъти къиликъуни. Журналла подписка бехIбихъибхIели, ну иличи дугъаизурсири кумекбарахъес. ХIясай сегъуналра уъ-муъ агарли журналтас къулбасбариб. Бахъбааб илдигъунти дарганти. ХIясай ва иличил барх бузутасра гIямрулизир ва бузерилизир сархибдешуни дулгулра. Чарх арали, уркIи шадли калаби, ХIясан МяхIяммадсягIидович!



Хизри ЮСУПОВ



ДИЛА ХЪУМИ

Уркџџили виџира
Ши алавти хъумачи,
Мешудизурли, марли,
Лайбакџбти дурхџначи.

Дила бегџгани илаб
Кертџиб майџа урхъуцад,
Гџяшул шурми дехъубли
Хъу барес чџянкџли хъатцад!

Юх, Семирамидала
Унхъри наб селпра ахџен,

Шурмачирти хъумала
Дурхъадеш багъурхџели.

Сепайда, дила хъуми
Сар гъанна детихъули
Гуждан дарибти хъуми, –
Хъатлар гџянжи дихули.

Гџярасайла анкџили
Диџибхџели усурби,
Хъалта-къарли дуџили
Сари хъуми шимала.

БАРХџЕХЪ

Берхџили гџергъити нур
Чертџиб шила хъарличи,
Къадалабси хъарша къатџ
Шурбатур дяхџџиличи.

Галгубала арани,
Сар ширли дакибтиван,
Гавгъарла гавлизибси,
Къада – къугъал суратван.

Хџедургира лишанти
Анџдукъунти янила,

Чехџебиалри хџуррум
Гъигъбарибси гъавала.

Дукџ-дураз сагадарес
Кахџели сай унрара,
Мартла житнала дезнас
Риргули сар хухура.

Багълали билшули саб
Дунъяла хугџла шала,
Азир рангла тџамразиб
Дагъли саб ши нушала.

ХЪУБЗАРА

Байхъу даршдус булхѣхъи
Ил ухънани ургуба,
ХІябра хІяйрандирахъи
Унци – малхІямти дугъба.

Суратчиван калзи ил
Хъула дублав маргъличи.
Някъ хІебелкъи хІянчила,
ГъамхІейри бурושличи.

Бикъурси аршила ранг
Бири ухънала къибла,
Къиянси хІянчис гІергъи
Бужи хъаба гъарушла.

ХІерги иш дунъяличив
Илван Ванза иргъуси,
ГІявал гІянжила гъегълис
Илван дезаикІуси...

ГІянжилизи гъайки
Ухъна – адамтазиван,
ГІяжизхІебири урки
Ухънала – дегъхІеливан...

Вархъиб гъачам колхозли
Ил ухъна хъарахълизи,
Велхъи дуцІрум берхІили,
Кайкиб ил ухъализи.

Абзур дус хІякачевли
Вири ил дубуртазив,
Амма хІебиуб лами,
Гъаннаван, биркІантазиб.

Диркъаличив убкІуси,
Улги ухъна зубрази:
– ГъачамгІи ваахъаба
Хъумачи, дубуртази...

ИШБАРХИЛА ХІЯКЪИКЪАТ

Гъалаб Дунъя балхуси,
ВатІан белтІун някъ-хъусли,
Чина хІеризадлира –
Шаддикъ-пякъир сай хъусли.

ГІяршлизи гъуни абхъиб
Дила ВатІанна халкъели,
Амма гъуни бархъдешла
Буцахъиб хъалта-къарли.

Далайличибра ахъли
Бикъур гІянцІ-гІянцІси симкъла,

Вялхъя инсан уцила,
Мискин яшавла тІимкъели.

ЦІакъла вегІ – аричи сай,
Къиматла вегІ – къакъла вегІ,
ХІякимтас дигахъуси –
Чус гъабурцуси умеГІ.

Амма судурли саби
ХІялал-залал адамти,
ХІертиван чардухъайчи
БурхІни умут бухІнати.

ГЪАННА НУ УЗУЛИРА

Агъ, дила кепти бурхІни, –
БурхІни дила жагъдешла!
Чис хабарри хІушала
Шала билшни шаддешла.

ХІуша лерхІели тугъи,
Дилкъи набзир дулхъули,
Гъанаван дагърила аргъ
Хъябхъяли хІебирхъули.

Дила кепдеш!.. Урцира
ХІурхъла чІакначив ахъли,
ГьуцІли далайикІира –
АгархІелира ахъри.

Гъанбирки, Орфейлаван,
Дила сихІру лер или,
Дила халкълис лерилра
СихІру дуртІисра или.

Илди кункти тугъала
АрбякъунхІели манзил,
ХІергар инсан дунъяла
Нукъяйдали ялгъузил.

МутигІхІейасра, вари,
АхІенра гъанна хамли –
МехІе лукъули сари
Гъанна пикри-урхамли.

ИтхІели заманала
Агарсири авара,
Гъанна ахІерли саби
ХІули липІла манзилра.

ИтхІели дев каргъира
МягІнала хІял хІергъили,
Гъанна дев луцІулира
Азир ранг гъаргдарили.

ЩуцІлан делхъли дулхъути,
Сари-сарил алкІули,
ЧІянкІли пикруми сари
Гъанна набзир дилкъули.

Илди уркандирхъули
Назмуртала тугъази,
Гъанна ну узулира,
Дебш лугули дугъбази.

КЪИСМАТЛИС

Дила къисмат – къаршикар!
Къисмат – гъалмагъ гъалабла!
ХІейуб дахъал сабабти
ВикІес хІези баркалла.

ХІела бястІдешла гъаршдукІ
Даим бири абзлизиб,
Зарулти дубгуси дукІ –
Мурталра гъазализиб.

Чумра чІала дячунри
Дила къасла ганзила,

Чумра къялти дишунри
Дила умутла цІала.

ЦацахІели валтира
РухІлизир дяхъурбачил,
ЦацахІели калтира
Гъавла кутурдешличил...

Къисмат – дила къаршикар!
Къисмат – гъалмагъ гъалабла!
ХІу агарли хІедири
Дила ишди тугъира!

ХІЕРГЪИДРА КЪАДИН...

Дугъбачи дугъби каргъни,
Мачниван бакилизини,
Дила санигІят биъни
Бурес вираси хІези.

Амма хІергъидра къадин
МягІна хІуни пикрила,
ХІедалалра къадри-дин
ХІебубкІуси шигІрула.

ХІела хІясибли поэт
АхІен уста-дугъбала,

Поэта баркъуди хІед,
Сабливан хІязла пукъа.

ХІуни хІебалад сен-сен
Дев балгунси луцІусил,
Секъяйда пикри-лусен
Иличил алкІахъусил...

УркІи-къалам кабурхар,
Харждирар хІи рурхъути,
Ца тугъ алкІан – хамдирар
Поэтла рухІ дурхъати!

ХІЕРЛИРА

Закла хъанцІдешлизирад
Маркаван чяІрухъунри,
Милиги хІехъахъили,
Миъличи шуррухъунри.

ДяргІибгу дигай хІела,
Аргъ-бархІиван чиллала,
Я децІ дила хІергъули,
Я тІама дила – жила...

Закла мурхъдешлизирад,
Зубарван пархрухъунри,
Ца иштяхІ хІехъахъили,
Нурличи шуррухъунри.

Дишунгу карцІай хІела,
Ламиван цІукла цІала,
Ну хужаим варили,
Цундешла иш дунъяла.

БацІси уркІи бихулра,
Шинжиртиван ясирли,
Закла мурахасличи,
Сайливан даим хІерли.

БерхІи агарси шала,
ЧертІили саби шихъван –
ХІуни хІейгиварила,
Къудкъусиванра шуркъван.

ТАЛИХІ

ТалихІ – пигъала ахІен,
Чархаралис бужуси.
ТалихІ – хІярира ахІен,
МяхІкамдешлис лушуси.

ТалихІ – дезара ахІен,
Дугъбазибад луцІуси.
ТалихІ – давлара ахІен,
Маслизибад бурчуси.

ТалихІ – байрамра саби
Зубартаув акІнила,
ТалихІ – шадлихъра саби
Дигайли хІу варгнила.

Илала гІергъи цархІил
ХІебалас нуни мягІни,
Дигай агарли вебкІес –
ГІяхІси саби ахІекІни!

ЦА БАРХІИЛА ХІЯЛ

Назмургала малаик
Вашули ахІен набчи –
ЛягІнатбушили виэс
ДяргІибти гІямруличи.

Гъирира гІяхІял къяйда,
Рах-рахлигу башуси,
Ца бараван ахъбуцес
РухІла гъава билшуси.

Я умутла агара
Гъеч авара набчила,
Я хъулли къирхІебиру
УркІилизисби чилла.

ЧІянкІли чІинкІир пикруми
ИшбархІи набчил сари,
Илди гъарахъдикахъес
ХІейрулигу гужлира.

НУШАЛА САНИГИЯТ

Хебла вавнала хала
Хуни бурчулри хамли,
Жура-журала вавни,
ИштяхИличил луцУли.

Гур вавни ранг хИясибли
Дурцулри халализи –
ЗурхИябла рангла гъайкар
Ухули саб илизиб.

Хуни хебла вавниван
Нуни дугъби луцУлра,

МягИдунти гъаргдиранван
Ну илдагИв умцУлра.

Гур дугъби зай хИясибли
Дурцулра къяянази,
Мегъ-шанданна зянкъярай
ЗайбикІахъес илдазиб.

Илгъуна саб нушала
Дунъяличиб санигИят –
Жагабарес дигулра
Нушаб Ванзала уммат.

ДИГАЙЛА НЯКЪИШ

Гъачам хИеризурра – абалкун лами,
Лебалгу гъаннара уркИи ухули,
Цаибил девличил буун аргъала –
БекИлизиб калунси лагъдеш гъанбикла!

Уммайра чархлизир ружерван калун,
Илдада зим набзиб бацИиб тяп хутИван.
Дугира цаибил – гибси Аллагъли –
Секъяйда белсунал лаззатла лагъли.

БуцІарси хІер, шивкИив, алкунти гъаргъдеш...
УркІбала гъамдешли дацІахъиб чурхри,
КІел дунъя дархдикиб – акІуб сагаси,
ИлхІели ванзара нушаб биштІалри.

ДаршдехІ гІямру галри рахли Аллагъли,
Азир дус гІямру наб гІеркъадитІалри,
Баласра, цаибил БерхИи нушала
Гъеч тикрархІебирни гІурра хІуруцІли...

ЯШАВРА ГЪАВРА

(къудкъуси масхара)

Арц кадерхур – Хьунуйчи
ХІял саби чебакІили –
Дабрилис кадихьибти,
Канилис харждиубли.
Аргьиб студент уршили
ДягІ бухъни кисализи:
КъурушлигІив къяйцІикІар
Уббихьибси жузлизи.
КІиибил урши гІяшли
СуравикІар нешлизи,
ВецІал къуруш дигули
Билет касес цирклизи.
Сирилавсилис гъачам
Арц хІяжатли хІедургар –

ГІурхІейс хІядурдарахьес
Ил чІярикІуси ургар.
Илала цІиркІси чІярли
ХІекъли хІяйранбарили,
ТентІ саби дукІличибад
УркІбухъи хІербикІули...
Дураб ургьесбяхІили
Дурадикиб дукІари,
Назмурти кадяхьибти
ДемХІахъур дила кІапІри.
Уршила чІяр... ДукІари...
Хабчабла хІумур-гъумур...
Ишав Моцарт виалри
Макъамра белкІес вири.

П О Э Т

Бамсур уркІилизи хІялбатахьесра,
Къасагар бекІилизи гьигьбатахьесра,
ВакІили, кайилтра шарала дубла –
Шавлати нурлиув шалахъси бацла.

Къяшмала шулгІирад вяшдикІар шинра,
Багълали шявгьбикІар шинкІаси дягІра.
ХІедамсур гъачамлис залум шурмугра,
Далайчи чякала къарла сигугра...

Шакалра хІейкили, бакІиб дугира,
ЦІикуруиван жагал бетаур бацра:
Чебиултра пергер сурат шаралаб –
Гъаникиб чевяхІси далайчи Ли Бо¹

Марли, гъарли-марси поэт хъяша сай –
ХІебалта шаралаб къягІяхьес бацра,
Сунела уркІила кертІили карцІи,
Ардику анцІкъира далайла дармай.

Умутра урхъула поэт маяк сай,
Бархъдешла анкъила къараулчи сай –

¹ Ли Бо – Бац берцахъес Сиху шарализи тІяхІкавхъунси Китайла чевяхІси поэт (701-702).

Мардешла дякълчир занзби хІекІахъес
ХІасратли улгуси хІайран гІябид сай...

Шарала дяхІимцаЙ бац дуклабуциб –
ГІяжаибси зимли уркІира буциб...
Ли Боли барибси барес хІейубси,
Ну поэт хІейиша или, гъанбикиб.

ДУНЬЯ

*Дунья – гІяхІси мер саби...
Э. Хемеингуэй*

Дунья – инса тавхана, –
Марли, гІяхІси мер саби:
ГІяхІлас хІядурбарибси
НигІматла анкъи саби.

Гъалаб тавхайзи ярагъ
Инсай гъамхІебирахъи,
Сунела гІяхІлас шадли
Хъали гъунибиахъи...

ГІяйиб саб, чятла дабри
Ганздирулира илар –
Инсайзиб лебсив ахъри
БихІес гъаргъдешла ургъур?!

Дунья – инса тавхана –
ЛутІулира гъарали!
Хъяшниван, абздикили,
Булъулира заяли!

Дунья – инса тавхана –
БицІилира ярагъли:
Ца хъулирти инсант
ХІедалтутира чили?!

Дунья – гІяхІси мер саби,
ХІербарес диахІелли,
Дубурлай тавханаван
АхІерли бихІахІелли!

ДЕВ

Дев – дуньяла аричи,
Инса гъунарла хъулчи –
ХІелацад къувагла бегІ
Се леба Ванзаличиб?

Бируд къалп марбаресра,
Урузра хІебнубли,
Бируд хІябгІерхъаличиб
Къяна хъяблабяхъесра.

Дев – пикри саб гІяскарла
Гъалаб башул байрахъчи –
ХІелацад гъирала бегІ
Се леба дуньяличиб?

Бируд хІуни къугънира
Халкъаначи гІингІдарес,
Бируд багъти пачнира
Тахличибад дугІаэс.

Дев, бируд децІра алкес
Адамтала уркІбазиб –
ТалихІра рамчбикІахъес
Инсантала хІулбазиб.

Дев – дуньяла аричи –
Мабулъад хІела улгу!
ГІянцили, тилхъавли кален
Илгъуна буйрухъличи!

ГІЯДАБЛИ САБИ ИШАБ

Чумал юрт сар калунти
Шилизирра нушала –
Дусма эскидарибти
Зиланти даршдусмала.

Ца юрт – дила бегТала –
Дурхъаси саб хаслира.
ИшбархИ ну иличи
ГІяхІладли вакІибсира.

Сепайда, юрт бацІли саб:
Агара анкъилаб ца,
Харабси ужагълизиб
Цунбухъи саби къямца.

ГІенбала чІябарличир
Няс сари, палда сари,
ДахъІила дукІарили
Урглуми дуи сари.

Щударли цІябли сари
Лерил бяхІяни юртла,
Мурт-саррил тІемдикІути
Киражли Леслиула.

Муръаличирван сари
Бурхлиурти духъбира,
Ухънаван къяхІили саб
Тавхилизиб зехнира.

ГІямзилаб палакатли
БацІли саб устахана,
Балагъли дуунтиван
ТІутІули сар тІалхІяна.

ШипІагарли лехІли сар
Хала дудешла пушни,

Къасиличир хІерли сар
Устала матяхІуни...

Агъ, вегІебш! иш замана –
Гъигъван пяхІли бульуси!
Даг ахІенрив пушназив
Хала дудеш узуси?!

ХІулбала гъалаб сурат
ТІашли саби гъанбикла,
ХІерли чедибирхъялра
Гъарил гІямзи хъалила.

ХІера, гъаларван тІашли
Хала нешла чирхлара,
Къигли някъиш дуунси
Хъар-хайдакълан къанира.

Ругбяхъили саб, пяхъир,
Халалгъуна кІалтІара,
Беръубли саби гъаруш
КертІул халал чармара...

ГІурра уркІи зимбухъун
Гъандикили байрумти,
Мекълис гъаруш кертІули,
ГІянтІикІа тІем дикІути.

ГІядабли саб хІерикІес
Ишаб гъарил секІайчи,
СенкІун илдала тарих
ДелкІину уркІилизи.

ЦархІилтасван къисматли
Илдас жан хІедедибси,
ТІашлира ну юртлизив
Дергъ агарли буунси...



САГАЛ ДУСЛА МУБАРАК!

Гъар дус вашаб хІушачи
ДяхІила хала дудеш,
ДяхІила кІиликІмачил
Бихаб дуслис сархибдеш.

ДяргІибти дяхІ-някъличил,
Ванаси уркІиличил,
Амъурти дагъриличил,
Вашаб мубаракличил.

Диги ил хала дудеш
Лебтас виубли дудеш,
Дудешлагъунти гъайли
Барили уркІи ряхІят.

Лерилра балагъуни
Аркъуси дусли хибти,
Дигулра ардухили
Дусли шалгІеббулхъуси.

ГъарХебизни, пашмандеш,
ЗягІипдеш ва къиркъирдеш,
Илдачил дархли къясдеш
Дигулра хъумартурли.

Гъанагар балагъуни
Лебтас декІмахдулхъути,
Щали игул вацІурби,
Хъябхъяли дулъул хъуми.

Гъандушибти лерилра,
УркІила хІедакІибти.
ХІерудилиур калаб
ЧевяхІ къудратла вегІла.

АдмакІаб дунъяличиб
ГІур Наполеон, Гитлер,

Ца миллат ахъбарили,
ЦархІилти къирдирути.

Тикрармабиъ Чернобыль
Дунъяла тарихлизиб.
Гъар даим бузаб атом
Даршу бузерилизиб.

Хиросима хъумартаб,
Нагасаки гъабилзаб.
БилтІикІайчи ядерла
Чилалра хъул мабиаб.

Нешла уркІилизибад
Лебил дунъя тимхъбикІаб,
Иларад касиб диги,
Улкни-ургар тІинтІдираб.

Сагал Дусли гъарилла
Детерхахъаб къасани.
ГІяхІдешла лерил балгни
Къабулдараб Аллагъли.

Чедиб ухаб БерхІира,
Барсбираб ил БацІира.
Барсбарес дунъяла лас –
Хъурамабиаб ил къас.

Дунъя булъути дару
Аурли калаб бару,
Дураб кахти хабурти
Гъаларцун кадикибти.

Сагал Дусли гъариллис
Хаб сунес хІебиуси:
Дагъри камсилис – дагъри,
ГІякълу агарсилис – гІякълу.

РяхІму агарсилис – ряхІму.
Адаб камсилис адаб.
Багъуди дигусилис –
Ил сархес халаси къас.

Даршудеш дигусилис –
Дигуцад даршу бурхІни.
Къяркъдеш дигхІейгусилис
Пешкешдараб малхІямдеш.

Вай пикри башусилис
Хаб пикри чІянкІли гІяхІси.
ХІурматагар зяхІматчис
Къадардараб сархибдеш.

Къунби макрумазивси
ВицІахъаб хІялалдешли.
Габ асил бузерира
Гъар адамлис хІяжатдеш.


Халкъличила къайгънани
Мурталра биаб къагъли.
Халкълис хаинбирути,
ХІябТерхъначи чейхъули.

Дигулра Сагал Дусли
ТалихІ гъарилис хили.
Азад бурхІни ванали,
Урузси Бац шалали.

Дунъя диги даршули
Гъар инсан талихІчевли.
ТалихІ, даршудеш гъанни
Даим лебил къакъали.

Сагал Дусли сархибдеш
Разидеш ва хІулкІудеш
Изайзибад мяхІкамдеш
Пешкешдараб гъарилис.





Зубалжат
ГІЯМАРОВА

БУРАЛАБИ

Дунъяличир авал секІал сари чардарес хІейрути:

- 1) Къаркъа – игъубли гІергъи.
- 2) Гъай – бурили гІергъи,
- 3) АнцІбукъ – буцес хІейубси ва замана – арбякъунси.

Палтар хІясибли гъунибиур, гІякълу хІясибли гъунивалта.
Палтар гІяхІти сари сагати, юлдашуни – бахъІила.
Юлдашдеш цугти сари жузличил,
Бигес вирар ца гъигъла манзиллис, белкІес биалли дахъал дусмазиб.
Дунъя шалабиру – берхІили, адам – багъудили.
БиштІал мирхъи биалра, дебали бузар.
Дахъал дален, камли гъайикІен.
ГІяхІси масхарали юлдашдеш хІедулъа.
Хъярхъикадли халкъ дукарбирхІур.
Ибес бурсихІейадли, палтарла уста ветхІеруд.
Масхаралис – ца минут.
ХІянчилис – сягІят.
Ручкали лукІа, гІякълули арку.
ХІулбани гъарахъли чебиу, гІякълули – гІуррара гъарахъли.
Вацас житара – жанивар.

* * *

Эгер хІева бурдали,
Сагаси бирбес вирар,
ВатІан бетахъахъадли,
Ил чарбарес гІур хІейрар.

Неш-дудеш бекІаллира.
АхІенри хІу цІуръа,
ВатІан бетахъахъадли,
ИлхІели сайри цІуръа.

* * *

Игит мурталра убкІхІебкІар, илала гъунар даршдусмазиб кавла

* * *

Хіера сегъунти сарил гІямру.

* * *

Нешла дяхІ – берхІила дяхІ.

* * *

УркІи лехІли бисалли, ца Аллагълицун бикъу
ДягІ агарли чІигІя шишхІедикІар
Чи узхІевзалра, ил укхІевкар.
Къукъу хІеили заб хІедиру
КІалтІа бячун шин ардякъун.
ХІебла бархІили дус валха.
Адам ухънавиур, устадеш – хІедиур.
Душман кайкахъес кур мавкъидну,
Юлдаш хІериахъес юрт тІашбати.
Лебил хІербикІар заманаличи,
Замана биалли чичилра хІерхІебилзан.
ВахъІи хъунуйгІив умцІусилис,
бегІла вайси къаршириркур.
Устадешли гІякълу луга.
Баркаллали кани хІелукъахъу.
МухІли муръил гурда бирар.
Марси къимат бирар вегІли барибси хІянчилацун.





Къади Пялисултанов ДГУ-ла ва ДГПУ-ла филологияла факультетла даргала отделениела студентуначил.

ISSN 0235 - 0149

Индекс годовой ПС808-0
Индекс полугодовой ПМ961-0

